





2





# MONVMENTA VATICANA

ANTIQVARVM ARTIVM

VERSIBVS ILLVSTRATA

CVM NOTIS

INSCRIPTIONES

ALIAQVE PROSA ET POETICA

FRANCISCI MASSII



—  
Editio Secunda locupletior  
Nobiliorem Musei Vaticani partem complectens  
—

ROMAE

EX TYPOGRAPHIA R. C. APOSTOLICAE

1869



201 78.4 22



MONUMENTA VATICANA  
ANTIQUARUM ARTIUM  
VERSIBUS ILLUSTRATA

CUM NOTIS

---



# MONUMENTA VATICANA

ANTIQUARUM ARTIUM

VERSIBUS ILLUSTRATA

CUM NOTIS

INSCRIPTIONES

ALIAQUE PROSA ET POETICA

FRANCISCI MASSII

ELOQUENTIAE ET HISTORIAE

IN ROMANO ATHENAEIO DOCTORIS DECURIALIS

BIBLIOTHECAE VATICANAE SCRIPTORIS



Secunda Editio locupletior  
Nobiliorem Musei Vaticani partem complectens



ROMAE

EX TYPOGRAPHIA R. C. APOSTOLICAE  
1868





## ERUDITAE IUVENTUTI

---



Vaticanus Artium thesaurus ea floret ubique gentium celebritate ut romana maiestas, quae in dirutis Caesarum monumentis umbrae similis apparet, in Musea Pontificum Maxx. velut in arcem nobilissimam se receperit, ubi civibus advenisque humani ingenii miracula profert oblivionis atque ignorantiae tenebris vindicata. Statuis, picturis, anaglyptis, ceterisque operibus divinus quidam spiritus inest, cuius impetu mirifice Poesis excitatur. Neque ullum, iuvenes optimi, reperietis altioris animi virum qui Periclis aut Augusti marmoreas imagines contemplatus gloriam Quiritium, vel Athenarum pulcritudinem mente non repetat, qui Laocoonte inspecto non declamet versus Aeneidos. Haec olim fuere Italiae decora, haec posteris exempla, haec ingeniorum voluptas. Scio de vetustatis pretio sermonem habere adverso hoc tempore inconsultum videri apud antiquae sapientiae obtrectatores, qui rerum civilium ordinem, leges atque instituta maiorum novis commentis pervertere grande et luculentum iudicant. Scio praeclara studia more illo incor-

rupto feliciter adhibita regnis tutandis, patrio decori provehendo, bono privato ac publicae laudi, fere omnia ab excelso loco ad vulgi fortunaeque ludibrium recidissee. Vehementer doleo mutatas vices, et consuetudinem parentum stultè neglectam. Non tamen huiusmodi inertia atque incuria latini nominis a forti me proposito deterruit quin circa penates meos ( dico audacter quippe in Vaticana domo natus imbutusque literis sum ) omne scribendi studium conferrem, huc illuc iaciens nova semina Poeseos, vere florido iuventutis, quae me longe praeteriit, excolenda in fructus uberiores.

Ad vos itaque me converto profugae latinitatis amicos, honesto Lycei pulvere laureisque insignes. Vos demittere animum, sequi ignavos, obrepere ad honores ad magistratus cum muliebri veste et fucu quo degeneres cinaedi ornantur pro ignominia habetis. Ac certe in re tanta desciscere idem facinus esset quod strenuo militi post praelium acriter inceptum ad hostium signa transfugere. Accipite diuturnos labores, vigiliasque dulces in Museo degustatas, ubi a vulgari strepitu remotus otiis Virgilianis operam dabam inter fontes silvasque Iulii secundi, Leonis decimi, Raphaelis memoria celebres. Ne prolixius disseram, liber meus, futilibus argumentis abiectis, patriae monumenta ac virorum illustrium facta depingit, quo splendidius tam cara pignora romanae ac graecae dignitatis, quae in sinu gerimus, hodiernam superbiam, ingratos animos, iniustam pulcri rectique oblivionem arguant. Princeps men-

tio de sanctissimo Petri templo, secunda de Saccello Sixtino. Bibliothecam summam attingo; ad Museum Clementis et trium Piorum <sup>(1)</sup> propero, magis philosophiae, historiae, virtutibus ac vitiis, ubi materia postulet etiam cum iocō satyrae, stilum intendens quam fabularum dulcedini fluxisque Venerum pigmentis. Equidem non sine trepidatione sublimes heroum imagines exprimere aggressus, quodam me labyrintho implicitum sentiebam. Calcar adiecit domesticus usus; altaque Castilionis vestigia in Cleopatrae cantu <sup>(2)</sup> viam floribus mollitam aperuerunt. Plura tibi immortalis Raphael in Regia Leoniana tribuere mens erat si minus fessum atque imparem excepissent divinae imagines tuae, quibus nulla respondet describendi facultas. Brevitatem meam Virgilius excuset.

« Sed fugit interea fugit irreparabile tempus  
Singula dum capti circumvectamur amore. »

Post hanc quasi apricationem per graecas atque italicas artes Inscriptionibus etiam in ipso Musei vestibulo Pii Septimi iussu collocatis mens advertenda. Quantam enim supellectilem in hoc tam vario tamque iucundo genere eloquentiae clarus ille vir Caietanus Marinius ab omnigena vetustate complexus ordine pulcherrimo digessit! Quanta in iis lapidibus flamma elucet! quam

(1) Clementis XIV. et Piorum VI. VII. IX. Pont. Max.

(2) Lege carmen Balthasaris Castilionis prope statuum Cleopatrae.

dulce studium, quam opportunum vitae specimen! Itaque nonnullas Inscriptiones meo filo deductas in medium protuli, non venales in laude virtutis, ut fons ille veterum titulorum uberrimus aliquem nostrae imitationis rivum ostendat. Finem libro faciunt Oratio de latina lingua, alia severa, pauculus.

Quidquid hoc operis mei sit, provectae aetatis fructum colligo non horridum fortasse neque barbaricum, vestraeque humanitati commendo. Nihil puto suavius quam per amoenos Vaticani montis recessus, quo voluptas eruditionis impellit, egregios iuvenes cum sene itineris duce pervagari. Vos ego me circum intuens aspernor inglorios cives, genere solum fortunisque potentiores, qui largas opes conviviiis, equis, choreis impendunt, doctrinae ac libris negant. Vivite ad melius aevum, et pollete sapientia.

---

## BONARROTIUS

## DE TEMPLO VATICANO (1)

## ELEGIA

Advena, terrarum matrem qui suspicis urbem  
 Lauriger aeterno quam secat amne Tiber,  
 Miraris tanto libratam pondere molem  
 Pingere caeruleum sole oriente caput?  
 Saxaque Pontificum cineres amplexa vetustos,  
 Et decora et sanctae tot monumenta domus?  
 Fecerat haec olim templi primordia Caesar  
 Qui fera Maxenti reppulit arma Cruce.  
 Ille ubi pugnantis prostravit colla tyranni;  
 Delevitque aras et simulacra Iovis,  
 Fundamenta loco statuit quo Petre sederes  
 Romani princeps maximus imperii:  
 Membra triumphali tua condidit ille sepulcro,  
 Victricem glebis supposuitque manum.  
 Aurea tunc aedes crevit superaddita Circo \*  
 Sanguine Christiadam qui modo sparsus erat,

(1) Nemo opportunior ad mirificam templi imaginem digne exprimendam quam ipse illius artifex Bonarrotius

Fortia cum nigris arderent corpora bustis,  
 Aut obiecta feris pabula saeva darent.  
 Relligio custos sacris penetralibus adstans  
 Audebat turmas pellere barbaricas:  
 Nec quisquam Italiam ferro populatus et igni  
 Horridus illuvie miles hyperborea  
 Insiluit stricto metuenda in limina telo,  
 Aut retulit praedas, corripuitve facem.  
 Hinc magni sceptrum reges gladiumque solebant  
 Poscere, quo staret vindice tuta Fides;  
 Hanc simul et cives peregrinum et vulgus ad aram  
 Per noctem cantus ingeminare pios.  
 Munera divitiaeque inerant, tabulisque colores  
 Eximii: prisca vixit in arte decor.  
 Longa sed incubuit tectis labentibus aetas;  
 Ceu quercum innumeras vincere suetam hiemes  
 Praeliaque adversi boreae durasque bipennes  
 Absumit tacito lenta senecta die.  
 Iulius ille meus triplici diademate frontem <sup>(1)</sup>  
 Cinxerat, atque animo grande movebat opus.  
 Nam, victis bello populis quos vana subegit  
 Libertas domini solvere fraena sui,  
 Disiecit veteresque trabes et putre lacunar,  
 Aequivitque imo culmina vasta solo.  
 Pulcrius antiquo surgat de pulvere templum  
 Invida cui labem saecula nulla ferant:

(1) Iulius secundus Pont. Max. Basilicam Constantinianam a fundamen-  
 tis instaurari iussit. Commissum opus Bramanti architecto. Bonarrotius Inlii  
 mausoleum statuis ac tropaeis insigne vixum inchoaverat cum Pontifex  
 decessit, et subinde Bramantes. Huic celeberrimi eius aevi architecti per-  
 peram succedere. Sequuta est Borbonica Romae vastatio. Paulus denique  
 tertius in nnum Bonarrotium aedis perficiendae curam coniecit.

Hic dabimus placido mortalia lumina somno;  
 Hic decoret sculptus nostra sepulcra lapis.  
 Dixerat. Artifices una concurrimus; ardor  
 Idem omnes stimulis acribus impulerat  
 Principis egregii meritos extollere honores,  
 Addere et inceptis vela secunda novis.  
 Aemula Bramantes rerum molimina volvens  
 Rumpebat caecas subter humum latebras.  
 Ast ego marmoribus gaudebam Iulia bella  
 Digerere, et centum fingere signa modis,  
 Oppidaque et domitas urbes, partosque triumphos,  
 Nec non historias claraque gesta patrum,  
 Teque adeo Isacidum rector sanctissime Moses <sup>(1)</sup>  
 Portantem digito foedera scripta Dei.  
 Quid memorem tantos ut mors inimica labores  
 Perdidit? ut carum praeripuit columen?  
 Ut decus omne meum et dilecti lumen Iulî  
 Extinctum assiduis prosequerer lacrymis?  
 Moerentem senioque gravem tu Paule vocabas? <sup>(2)</sup>  
 Quo me vix celeri laeta iuventa gradu  
 Egisset cupidum laudis. Nova scilicet aedes,  
 Quam belli rabies impia distulerat,  
 Tandem humeris innixa meis fastigia tollens  
 Constitit indomito firma adamante magis.  
 Vos duo Pontificum fortissima pectora testor,  
 Vos mecum claris addita coelitibus:  
 Semper ad ingentes ausus animosaque coepta  
 Praebuerat vestri numinis aura viam;

(1) Moisis praeclarum signum ex tot tantisque operibus quae sublimis illa mens cogitaverat in Iulii II mausoleo fere solum insculptum.

(2) Paulus III. Pont. Max.



Hoc tamen insolitis spatiabar in aethere pennis

Altior: haec operum laurea summa fuit.

Hospes, honoratae supplex dabis oscula terrae

Quae servat fido pignora tanta sinu:

Post ego te gradibus convexa per ardua ducam

Lumine qua rutilo splendet ahenus apex.<sup>(1)</sup>

Hinc ubi squalentes Capitoli valle ruinas

Effossis late videris aggeribus;

Tarpeiae cecidere arces, inscribe metallo;

Strata iacent flammis templa superba deum:

Tuta sub hoc saxo dominaris Roma per orbem,

Donec in extremo corruat igne cinis.

(1) Ingens templi vaticani tholus.

## NOVISSIMUM DEI IUDICIUM

AB EODEM BONARROTIO PICTUM

IN SACELLO SIXTINO

## CARMEN

Progenies aeterna Dei, quae sidera primum <sup>(1)</sup>  
 Aurea spargebas coelo, terrasque nigrantes  
 Antiquum per inane, gelu tenebrisque solutis,  
 Floribus et claro variabas lumine lucis,  
 Te Patris é gremio labi ad mortalia vincla  
 Iussit Amor, caecisque novum diffundere solem  
 Gentibus, et nostrae tolerare piacula culpae,  
 Mox Diti rapientem animas vitaeque potentem  
 Ferrea disruptis evincere Tartara claustris;  
 Summe opifex mundi procul hanc procul eiice nubem  
 Quae meme involvit: da sanctos pingere vultus,  
 Fulgorisque tui parvas monstrare favillas,  
 Qualis eris veniens manifesto lumine iudex  
 Ardentem late flammis ubi straveris orbem.

Hac prece divinum meditans penetralia Sixti  
 Lustrabat Michael; necdum correpta furore  
 Dexterâ primam operis tanti signaverat umbram,

(1) Divinam opem Bonarrotius invocât priusquam difficillimae picturae manum admoveat.

Cum subito impulsae ventis tonuere procellae;  
 Contremuit templum; densae caliginis horror  
 Perculit artificem; dilapsi pectore sensus:  
 Mens tamen arcanum carpebat libera visum.

Aethere ab immenso glomeratis agmina nimbis  
 Aligerûm huc illuc celeri permixta volatu  
 Ingentemque Crucem et victricia signa ferebant,  
 Nec non terribili radiatum luce volumen,  
 Aerisonasque tubas, quarum clangore sub ima  
 Valle cavi mugire sinus et opaca sepulcra;  
 Corporaque attonita et membris cõeuntia membra  
 Pars faciem exerere, et murmur pavitare diemque,  
 Pars fugere e tumultis, nisuque erumpere ad auras.  
 Qualis ubi nemorum spelaea per ardua fulmen  
 Incidit, excussis flagranti turbine saxis,  
 Praecipitat sese longe commota ferarum  
 Turba, neque assuetis haerere cubilibus audet,  
 Sed ruit in silvas, malefidaque deserit antra;  
 Non aliter trepida scelerum formidine vulgus  
 Pallebat iubar invisum sortesque futuras.  
 At sancti reges et prisco heroes ab aevo,  
 Qui mores docuere pios, qui sacra dedere,  
 Foederaque et stabili veneranda altaria cultu,  
 Erecti virtute caput sublime levabant  
 Aërios procul in tractus: coniuncta vetustis  
 Gens nova cum patribus florebat, splendida mortis  
 Instrumenta suae portans, et honesta tropaea,  
 Quae retulit, populorum omnes dum sparsa per oras  
 Fallaces ritus fallacia numina sternit.  
 Iamque tubae siluere: venit Deus ecce; resultat  
 Cardine ab immoto tremefactum limen Olympi;

Nubila diffugiunt vasto rutilantia gyro.  
 Quis nutum iratae frontis, quis verba severae  
 Sustineat vocis, maiestatemque Tonantis,  
 Quem Styx atra pavet tellusque et concita fluctu  
 Aequeora, flammiferos cui plaudunt astra per orbes?  
 Sola tegens vultum casto velamine Mater <sup>(1)</sup>  
 Fit propior caro lateri, sed lumina torquet  
 Non abiecta metu, divinae at fulgura dextrae  
 Quod nequit eripere, et nati placare furorem.  
 Ille minax tollitque manum, sotesque repellit  
 Conatos ab humo spatia alta invadere, turmam  
 Carceribus sacvis Erebi aeternisque catenis  
 Damnata, torvos immani mole gigantas.  
 Innumeri circa praedam stridentibus alis  
 Pocnarum horrenda volucres de nocte ministri  
 Funduntur: mora nulla, sinu amplexuque parentum  
 Implicitos frustra divellunt ungue, feroque  
 Dilaniant morsu; ast alios super hispida terga  
 Imposuere, ruuntque simul: premit ira tremendi  
 Iudicis, et rabies crudelibus insita monstribus.  
 Scinditur in barathrum vallis, lacrymosaque pandit  
 Regna lacusque imos, ubi ripa dirus averna  
 Stat daemon, miserumque gregem vada nigra petentem  
 Colligit, et medios vectat Phlegetontis in ignes.

Talia miranti (neque enim sopor ille, nec umbrae  
 Noctis erant, sed certa Dei splendebat imago)

(1) Deipara ad latus Filii se colligens, vultus ludicis ira terribilis intuentium animos pietate ac metu in operis summa percellunt. In ceteris partibus mira creandi ac distribuendi varietas est: neque ex infinita multitudine imaginum alteram alteri similem ullam invenies.

Insignis facie superis e civibus unus <sup>(1)</sup>  
 Adstitit, ornabant virides cui tempora gemmae,  
 Pulcrior et stella fulgens lyra tacta fremebat  
 Pollice. Non equidem patriae terrestres amore  
 Iungor, ait, tecum, profugae quae somnia vitae  
 Exiliumque dedit, sed robore mentis, et ausu  
 Ingenii similes animique ardore movemur.  
 Proin ego te forti iampridem ad grandia cantu  
 Exacuo vates, secreta per infera ducens  
 Sidereasque domos: ego coelo imponere templum  
 Edocui, Mosis simulacrum, saxaque et aera  
 Fingere, et alternos pariter miscere colores.  
 Idem ego postremo comes hortatorque periclo  
 Immortale tibi patefeci exemplar: ab ipso  
 Numine conceptis esto nunc viribus audax:  
 Pinge diem quae colla metet calcanda superbis,  
 At patriam iustis et ademptum reddet honorem.  
 Dixerat, arripuitque manum; scintilla per artus  
 Fervida prosiluit: sese erigit ille, Deumque  
 Cernit adhuc, vatisque sacri spiramina sentit.

(1) Dantes Aligherius.

T

PINACOTHECA <sup>(1)</sup>

—

## CARMEN

Ecce sub apricum, boreae de parte serena,  
 Picta micant italae tandem exemplaria dextrae  
 Sedibus aucta novis, et amico lumine gaudent,  
 Quae prius innocuam coeli spirabilis auram  
 Claraque purpurei quaerebant spicula solis;  
 Non secus obscura quam tempestate carinae  
 Ventorum adverso iactantur flamine, donec  
 Perfundunt sese radiis freta caerula ponti,  
 Lintaeque in zephyros alte suspensa relucunt.

O pater, o decus egregium atque insignia Romae  
 Ornamenta novo rerum qui munere ditas,  
 Priscum palladiae revocans virtutis honorem,  
 Te sequimur; tibi dulce sonant in limine carmen,  
 Et lapidem adversa descriptum in fronte coronant  
 Pierides; per te superum simulacra moveri  
 Cernimus, et vivas hinc atque hinc surgere formas.

(1) Scriptum est carmen cum viveret Gregorius XVI. Pont. Max. a quo Pinacotheca translata est in novas aedes.

Ille senex, torvum ante pedes cui stare leonem (1)  
 Corpore prostratum magno et cervice refusa  
 Prima in luce vides, quamquam vix languida coelo  
 Lumina deficiens supremo funere tollit,  
 Ut vultus tamen impavidos et vivida mentis  
 Robora magnanimae praeportat! Ut ardet amore  
 Aetheriae dapis, et conceptos exprimit ignes!  
 Hunc quondam populos oracula sacra docentem  
 Assyrii, Graiique, Oriens miratus et omnis,  
 Mirata Ausonia, et tyrrheni Tibridis undae,  
 Vel tegeret canos ardenti murice crines,  
 Vel iuga silvarum nudus per opaca lateret  
 Impia mendacis fugiens convicia linguae.  
 Nos templo ingenti celebres sacravimus aras,  
 Dilectamque viri effigiem laudesque fovemus.

Ecce autem iuga floriferis redimita viretis (2)  
 Apparent contra; longeque renidet imago  
 Sideris in morem aut candentis ab aethere lunae.  
 Agnosco frontem roseam flavosque capillos,  
 Incessumque Dei. Sic te formose, priusquam  
 Morte obita Patris in gremium ad tua regna redires,  
 Thaboris umbrosi memorant felicibus arvis  
 Humana haec spolia atque humilem posuisse figuram,  
 Cum pavidi comites insuetum effulgere lumen  
 Et faciem stupuere novam, nimbumque sonantem  
 Desuper, et liquidas velamina fusa per auras,  
 Dulcia carpentes manifesti gaudia visus. —  
 Margine purpureo, tenuem qua lucidus undam

(1) Divus Hieronymus moriens; tabula Dominici Zampierii.

(2) Christus in Thabore; insigne Raphaelis opus.

Rivus agit, denso circum fremit agmine vulgus.  
 In medios iuvenem miseri rapuere parentes,  
 Amplexique tenent: furit ille et brachia nisu  
 Terribili intorquet: credas confusa frequentum  
 Ora virûm, atque omnes compleri murmure campos.  
 Non haec graeca tulit, non haec romana vetustas,  
 Nec tantum artifices decuit sperare profanos;  
 Relligio sed enim caelestes diva colores  
 Ipsa tuis Raphael manibus permisit, et alte  
 Numinis exemplar speciemque reclusit Olymphi.

Aspice ut adversi radiat qua linea solis (1)  
 Tres rutilant gemmae; quarum pulcherrima turres  
 Fulgini procul et campos ostendit apricos.  
 Aëra per liquidum iactu pila concita Martis  
 Sulphureo gravis igne volans (mirabile) in arcem  
 Incidit, et nulla tonuit metuenda ruina.  
 Prospectu puro nitidam crebrescere nubem  
 Aligerûm dicas. Medium tenet aurea Virgo  
 Picta sinus rubro fulgentis murice pallae;  
 Caeruleos humeris Infans praetendit amictus:  
 Maternus color huic, et lactea colla manusque,  
 Maternaeque genae: curvo tum leniter arcu  
 Flexa sub obscurum nebulae sese explicat Iris.  
 At violae crevere solo, circaque rosarum  
 Germen odoratum viridi perfunditur herba.  
 Coelicolae divam per gramina laeta salutant.  
 Ante puer tenero similis collucet Amori,

(1) Duæ Raphaelis picturae; Deipara, dicta de Fulgino; eademque in Coelis corona donata: tertia tabula ipsius argumenti, auctoribus Iulio Pippio Romano, et Francisco Pennio.



Mollia puniceis figens vestigia calthis,  
 Qualis ubi tremulis hyacinthus roribus humet,  
 Perpetuusve rubet vernis amaranthus in hortis.  
 Quidquid imaginibus lusit Pictura creandis  
 Corporis in parvi collectum est omne figura.  
 Cetera quae propius mentem dulcedine tangunt  
 Commemorem? Ut sese tumuli pallentibus umbris  
 Terrarum Coelique potens Regina levarit,  
 Que modo virgineos letho demiserat artus  
 Languida iucundi carpens obliviam somni?  
 An fratres dicam attonitos haerere sepulcro?  
 Vel permixta rosis ut fundat lilia marmor?  
 Centum aliae superant tabulae, si forte voluptas  
 Tectorum longos iubeat penetrare recessus;  
 Non tamen invenies quidquam formosius. Hic flos,  
 Hae sunt primitiae, haec urbis decora inclyta nostrae;  
 Nocte velut pura stellis innubilis aer  
 Cum micat et varios huc illuc dividit ignes,  
 Altius oceani miramur surgere ab undis  
 Pleiadas, auratamque lyram, fulvumque puellae  
 Gnossiacae crinem, aut flammantis cornua tauri.

At tu magne pater, quando haec ingentia dona  
 Auspiciis perfecta tuis, inopinaque rerum  
 Copia parta loco est, sanctas impendere curas  
 Artibus ingenuis dulcemque urgere laborem  
 Ne dubites. Viden ut pateant tibi mille reperta,  
 Quae modo sub dio primum spectanda locantur (1)  
 Aeraque, et argillae tenues, et pocula pictis  
 Ornata historiis, auriue immensa suppellex

(1) Museum Etruscum.

Pulvere tyrrheno et squalentibus excita bustis?  
 Sic quondam Leo magnanimus, qui nomine dici (1)  
 Alter ab Augusto meruit, sic fortis Iulus,  
 Urbibus Italiae felici Marte receptis,  
 Gaudebant lapides et grandia tollere signa  
 Heroum, semperque domos aperire recentes  
 Lauricomos inter lucos, ubi pulcher Apollo,  
 Antinousque, et membra fero circumdatus angue  
 Laocoon, ubi graiugenum simulacra deorum,  
 Candidaque aoniae complerunt limina Musae.



(1) Leo X, Iulius II.

DIVI HIERONYMI LAUDATIO <sup>(1)</sup>

## CARMEN

Te quoque, dum patribus stabunt sua templa vetustis,  
 Dive senex memorem, fulvo metuende leone,  
 Macte animis, macte eloquio. Tibi palmifer Hebron  
 Iordanesque sacer, tibi grandibus ardua cedris  
 Plaudit odorato Libani de vertice rupes.  
 Nam neque Idumaeae nemora aspectumque ferarum  
 Horrueras, neque tecta cavis inventa sub antris,  
 Quamquam purpureae praefulgens murice vittae  
 Romuleos inter procures venerabilis ires.  
 Libertas sed enim illa tua atque interrita virtus  
 Urbe procul taciti rapuit per devia montis  
 Nescio quae praeclara animis incepta moventem.  
 Tempestate illa fines allapsa latinos  
 Barbaries gelida veniens pervaserat Arcto;  
 Ferreaque ingenia et vesanae caedis amorem

(1) Studia viri doctissimi in solitudine bethlemica, libertas in vitiis obiurgandis, robur animi contra invidos obtrectatores Christianam Poesim vehementer alliciunt ad peculiarem laudem sapienti ac forti dedicandam.

Imbuerant; neque honos pulcris erat artibus usquam,  
 Aurea nec veterum florebant scripta virorum  
 Tela inter media atque horrendi praelia Martis.  
 Omnia quae tecum firma dum mente volutas,  
 Ire alacrem contra tanto in discrimine visum est.  
 Nam perhibent olim Lagidae regis Ptolemaei  
 Auspiciis longe populis lateque receptas  
 Isacidum historias primaeva ab origine mundi,  
 Fortia bella ducum, victoque ex hoste tropaea  
 Reddita Graiorum linguis Pelopeia circum  
 Litora florentesque Asiae volitasse per urbes.  
 Quae quoniam patrio nondum sermone Quirites  
 Attigerant, cupidas vulgi deducis ad aures:  
 Neve palestinae maiestas regia formae  
 Nativusque decor pereant labentibus annis,  
 Floribus et niveo Latii depicta colore  
 Provehis in cunctas divina volumina terras.  
 Ac veluti aëriis si forte e montibus imber  
 Pulsus abit zephyris, roseoque apparet ab ortu  
 Sol nitidus claro diffundens aethere lucem,  
 Omnes tunc speculae ac gelidas iuga summa perAlpes  
 Attollunt capita et radiis perfusa renident;  
 Non aliter nebulis sese explicuere remotis  
 Antiqui heroes, pulcherrima gentis origo,  
 Isacusque parens, et candida Labaninae  
 Rachelis soboles Aegypto cara virenti,  
 Et Mosis gravis umbra, et belli fulmen Iudas  
 Rapta gerens humero saevi Nicanoris arma.  
 Qui tum adeo cupide affusi complexibus omnes,  
 Una omnes placido lustrabant lumine amicum:  
 Ac sua quisque novae captus dulcedine linguae .  
 Facta recensebat, legesque et foedera ritu

Instaurata pio; et divinae oracula mentis,  
Quae quondam populis fuerant oblita profanis.

Salve o facundae clarum decus addite Romae,  
Seu mage Romanus gaudes seu Dalmata dici;  
Nam te montosa genitum Stridone togati  
Viderunt cives summis de rebus agentem  
Cum Damaso, imperiique alto sub pondere fortes  
Inclinantem humeros, ni gens foedissima contra  
Movisset caecam invidiam atque odia aspera vulgi,  
O ubi magne tui secreta in parte recessus,  
Et nemorum latebrae dulces! Ubi longa silentum  
Otia camporum, et solae sine murmure valles!  
Te-ne sinu placido fessum sanctissima tellus  
Accepit? Te-ne extremae sub fine senectae  
Funere composuit mollique amplexa sepulcro est  
Cara Deo tellus et Nazaridi Heroinae?  
At mihi nonne vides pater (ut primaeva iuventus  
Purpurea similis violae gracilive ligustro  
Excidit, et viridem demisit languida florem,)   
Dum sequor instabiles annis fugientibus umbras,  
Praemia nequidquam contemptis debita Musis  
Expectans, facilemque manum et solamen amicum?  
Proin, duce te, qua nulla hominum vestigia, nulla  
Occurrat facies, aut importuna sequantur  
Murmura, quadrupedesve citi currusque volucres,  
Certum est Carmeli rupes ac Thaboris altum  
Culmen et Hermonis desertos quaerere fines,  
Quotque tenet gremio silvas Galilaea lacusque;  
Certum est Bethlo tecum vigilare sub antro.  
Nam procul a turba strepitus si forte resedit,  
Nec iam turrigeris apparent moenibus urbes,

Omnia muta, silent campi, silet aequor, et undas  
Candida per tremulas lunae scintillat imago,  
Aetheriae sedis dum contemplator apertis  
Indulges spatiis, tacitoque vagantia gyro  
Sidera prospectas, tunc mens divinitus ignem  
Concipit, ac pennis invecta nitentibus alte  
Erigitur terris, et libera gaudet Olympo.

## BIBLIOTHECA

## EPIGRAMMA

## I.

Ingredere, at tacitus. Custos veneranda silenti  
 Pauca tibi nullo murmure verba loquar,  
 Ne placidas veniat sapientum rumor ad aures,  
 Qui mentem libris applicuere meis.  
 Pontificum auspiciis crevi fundata vetustis  
 Doctrinae ut lumen praesidiumque forem.  
 Quidquid ab antiquis collectum est nobile chartis,  
 Quas neque ad exitium barbara praeda tulit,  
 Invida nec flammis aetas vel tabe peredit,  
 Cuncta sinu mater sedula composui.  
 Maximus hanc aedem statuit mihi Sixtus; honorem (1)  
 Provehit, en, cultu splendidiore Pius. (2)  
 Haec te scire hospes satis est. Nunc scripta revolvās.  
 Libera largimur munera nostra. Sede

(1) Sixtus V.

(2) Munificentia Pii IX. marmoreo pavimento, novo thesauro numismatum aliisque divitiis Bibliothecam auxit.

## DE TERENTII ET VIRGILII

CODICIBVS VETUSTISSIMIS

IN BIBLIOTHECA ASSERVATIS

## II.

Hic geminus Charitum fons est: hoc alma liquore  
 Pieris, hoc gaudet tingere labra Venus.  
 Silva nitet circum felici candida myrto;  
 Sparsaque purpureis labitur unda rosis.  
 Hinc haurire decet, iuvenes. Externa cavete  
 Pocula, quae flavo melle venena tegunt.  
 Illa creant dulcis patriae fastidia; nectar  
 Mentibus hoc italis pabula prima dedit,  
 Aeternumque dabit; quamquam atro gurgite torrens  
 Spumeus, heu, campis ingruat ausoniis.  
 Andria, noster amor, salve pulcherrima! Salve (1)  
 Aenea, genitor maxime Romulidum!  
 Vivite florentes ambo. Vos ferrea secla,  
 Indignam Latio vos prohibete luem.

(1) Andria princeps Terentii comoedia. Aeneas Virgiliani poematis heros.



DE MUSEI ORIGINE <sup>(1)</sup>

## CARMEN

Musae, quae gentes italias quaeque inclyta Martis  
 Moenia dircaeis olim venistis ab undis,  
 Pandite claustra deûm vulgo secreta profano,  
 Templaque odoratos inter candentia lucos.  
 Quae quoniam nulli cecinerunt carmine vates,  
 Ne male dispereant veterum monumenta Quiritum,  
 Primus ego ingrediar cithara. Iuvat omnia longe  
 Metiri spatia, et sacris requiescere in umbris,  
 Phidiacos vultus heroaque signa moventem  
 Iampridem insueti correpta cupidine cantus.

Principio, quacumque loci sese ardua tollit  
 Maiestas, cum sole novo felicibus acr  
 Intepuit zephyris, et culmina summa relucet,  
 Mons erat, exiguique lares, et aprica viarum  
 Virgineis dilecta choris iuvenumque palestrae.  
 Atque aliqua hic divûm iam tum surgebat imago  
 Saxeae, nobilibus ccu saepe videmus in hortis  
 Stare vel Alciden vel amantem tela Dianam.  
 Nondum amplexa sinu vicinos area fontes  
 Porticibus magnis gelidaque incluserat umbra:  
 Tantum inter platanos vario de flore coronae  
 Pendebant Nymphis. Ea rerum fertur origo.

(1) Brevem narrationem ordimur de Aula Vaticana, quae ab antiquis hortis, ubi aedes erant Innocentii octavi et Alexandri sexti, in tantam crevit monumentorum copiam totque partes artium ditissimas perpetuis curis Pontificum ut nihil dignius videatur cantu romano.

Donec signa patrum campis inventa latinis  
 Romanosque deos aeterni robur Iulī <sup>(1)</sup>  
 Pulvere ab ignoto superas erexit in auras.  
 Ille recentis aquae latices et myrtea Tempe  
 Fecerat hospitibus viridique sedilia musco,  
 Unde urbem clivo ex alto septemque tenerent  
 Prospectu colles, et apertis undique campis  
 Acciperent clarum surgentis lumen Eoi.  
 Regales etiam turres et grandia primus  
 Fundamenta dedit: sed enim fortissimus heros  
 Martem agitans victor post praelia longa reliquit  
 Partem operis tibi magne Leo, quem romula tellus  
 Augusto similem celebri suspexit honore.

Tempore non alio sacris errare viretis  
 Gaudebant, coetuque domos complere beatas  
 Egregii iuvenes, quibus idem rector et auspex  
 Non impar superis aurem inclinabat amicam,  
 Si quando ludis animum fidibusque levarent.  
 Martius ante omnes positus processerat armis <sup>(2)</sup>  
 Castilio, Tyrtaeus uti, magnumque sonabat;  
 Vel rigui fontis praeclsa in parte iacentem  
 Reginam saevo quae brachia nexuit angue  
 Diceret, et miseros manes umbramque cieret;  
 Coniugis aut carae fidum meminisset amorem  
 Hippolytes, pulchraeve lyram laudaret Elisae.  
 Tunc primum strepere ingenti penetralia plausu  
 Miratus frontem aetheriam convertit Apollo.

(1) Iulius Secundus et Leo decimus Pontifices Maximi Vaticani Musei fundamenta coniecere.

(2) Vide pulcherrimum Castilionis carmen de Cleopatra ad latus ipsius statuæ marmore inscriptum.

Ipse nova Raphael tactus dulcedine mentem  
 Ad sonitum citharae doctas pingebat Athenas,  
 Concilioque sedere viros, mediumque Platona,  
 Aut vatum aoniis volitare in montibus umbras; (1)  
 Nec procul hinc Solymae pavidas accurrere matres,  
 Disiectumque hostem sacro de limine templi  
 Turbine provolvi, et sparsas tellure rapinas.  
 Contra autem Latio, frustra indignantibus Hunnis,  
 E Coelo iussum deflectere signa tyrannum;  
 Vastaque misceri tremulis incendia flammis.  
 Parte alia certant alacres describere alumni (2)  
 Isacidum historias ab origine prima animantum:  
 Atque aliquis leviora operum miracula textit  
 Centauros Dryadasque, et corpora mixta ferarum,  
 Singula quae varia fingant sub imagine lusus  
 Naturae similes. Viden alto in fornice ut omnis  
 Maeandro paries implexa et fronde renidet?

Iam sol tercentum volvens circumvagus orbes  
 Divitis Ausoniae moderantem sacra videbat  
 Fraena Pium, et placidas tanto sub praeside terras. (3)  
 Cuius in imperio postquam se maxima Roma  
 Composuit, viridique caput praecinxit olivo,  
 Aurea Pieridum risit domus; aurea late  
 Aggeribus crevere novis fastigia montis;  
 Ceu memorant Rhodon antiquam aut Danaeïa tecta  
 Purpureos ex imbre Iovis duxisse colores  
 Cum deus argivae subiit penetrale puellae.

(1) Praecipuae Raphaelis picturae in Aula Leoniana.

(2) Peristylia depicta a primoribus e schola Raphaelis.

(3) Pius sextus Pont. Max. quod Iulius et Leo inchoaverant perfecit. Ceterae Musei partes additae a Pii VI. successoribus.

Protinus ecce silex duro sonat incita ferro;  
 Murmure complentur late loca: nectere funem  
 Hi properant, tardosque rotis impellere cippos; —  
 Illis cura solum pictis variare lapillis:  
 Pars vehit excisas tyrrhena rupe columnas,  
 Erigit et multo vastum molimine pondus.  
 Iamque adeo, gemino discretis ordine signis,  
 Panditur immensum nullo via limite, quantum  
 Vix cursu rapido valeant superare quadrigae.

Prima tenens divûm genitor, qua plurimus aether  
 Funditur, et minio sparsum rubet omne lacunar,  
 Qualis erat tarpeia sono cum templa moveret,  
 Desuper aetnaeos compescit fulminis ignes;  
 Nec longe pennas in ventos explicat ales.  
 Proxima frondoso nemoris sub tegmine Pallas  
 Gorgonis horrisonae vultus molemque rotarum  
 Abdiderat, dein rore comas perfusa liquenti  
 Prodiit inachios referens pulcherrima cultus.  
 Ante oculos divae sese Herculis attollebant  
 Exuviaeque caputque ingens et grandia membra.  
 Non illum thalamo coniux molliyerat Hebe  
 Fortis adhuc memorem luctae domitique Erymanthi.  
 Iam Venus, atque iterum Veneri comes ibat Adonis;  
 Ibat Amor, curvumque ferens Latonia sidus,  
 Et Maiiae puer, et phrygia qui raptus ab Ida est;  
 Mille super clara iuvenes e stirpe deorum.

Nec vero sedem angustam, loca pervia vulgo  
 Indigetum, Musae, aut humiles duxistis honores. (1)

(1) Musae, statuæ pulcherrimæ, in villa Adriani prope Tibur inventæ, cum Apolline Citharedo atque insignibus hermis sophorum oratorumque Graeciae, conclavi proprio continentur.

Nam velut ascræae quondam per culmina rupis  
 Unus amor fuerat socias agitare choreas,  
 Nunc quoque virgineo Saturnius agmine iussit  
 Carmina nota sequi citharam moderantis Agyei.  
 Hic mihi, dum studiis florens puerilibus aetas  
 Ludere Virgilii primum gaudebat avena,  
 Saepe defūm insolitis sub noctem visa figuris  
 Magna dabant simulacra metum; saepe atria longo  
 Implentes fremitu iunctis discurrere Faunis  
 Maenadas, aut dubias errantem Pana per umbras  
 Mirabar tacitus carae post terga Thaliae.  
 Illa simul vultus et nomina prisca docebat  
 Heroum, gemino vel Laocoonta dracone  
 Implicitum, vel te Perseu, cui torva Medusae  
 Ora manu saevique rigent pro crinibus angues,  
 Antinoum parii lapidis candore nitentem,  
 Et iuvenem Oenidem, et solis Minoida saxis:  
 Cana simul celebri devinctos tempora lauro  
 Monstrabat vates, galeisque insignibus alte  
 Tela movere duces magnorum robur Achivūm.

Nunc quoniam veteres acuit mihi diva furores,  
 Igneus et firma crevit vigor ille iuventa,  
 Pierio turbam hanc animarum accendere cantu  
 Experiar, capiti divini innixus Homeri.  
 Scilicet hunc patriae memorem sacrare laborem  
 Nitimur, et sparsum cinerem atque erepta favillis  
 Pignora cara tui genitrix antiqua fovemus:  
 Cetera barbaricae clades avidaeque rapinae  
 Abstulerunt, vel longa tegit squalore vetustas,  
 Aut ipsi inter se civilia bella gerentes  
 Infandum! ferro atque igni stravere nepotes.

CARIATIS<sup>(1)</sup>

## EPIGRAMMA

## I.

Moenia Cecropidum flavus qua lambit Ilissus  
 Vertice Pandrosium sustinuisse feror.  
 Quinque aliae mecum valida cervice sorores  
 Fulcibant tremulae saxa vetusta deae. <sup>(2)</sup>  
 Ipsa caput solvens ingrato pondere veni  
 Graiugenum e domibus romuleum ad Tiberim.  
 Integra in ausonias arces et libera surgo:  
 Pandrosii moles pulverulenta iacet.

(1) Venetus dux Morosinus Athenis potitus an. MDCLXXXVII Cariatidem hanc e porticu Pandrosii transtulit cum fragmine sculpturae phidiacae ex Parthenone. Opera huiusmodi primum Venetias perducta dehinc Romam Pius septimus ex aede Iustiniana in Museum Vaticanum inferri iussit.

(2) Palladis quae ministram habuit Pandrosion.

CAPTIVUS DACVS<sup>(1)</sup>

## II.

Barbarus appellor? Potius me dicite fortem.  
Rex et liber eram: defendi libera regna;  
Subieci impavidus romanae colla securi.  
Barbarus ille fuit qui me non iure sed armis  
Oppressit, qui sanguineo Capitolia curru  
Invectus iusto regem spoliavit honore,  
Impia qui statuit virtuti praemia mortem.

(1) Caput pileatum opere eximio, pars captivi regis qui arcum Traiani ornabat.

7 SILENVS<sup>(1)</sup>

---

III.

Te Silene relinquerem sub antris  
 Montium nemorumque fabulosum  
 Numen Arcadiae; sed es magistra  
 Arte sculptus, et inter altiora  
 Heroum simulacra vindicandus.  
 Vivit spiritus igneus; micantes  
 Nervi prosiliunt, tumentque venae.  
 Stat Bacchus puer hispido reclinis  
 Pectori, validosque per lacertos  
 Nectit brachia lusitans; coronam  
 Florentes hederæ ligant capillis.  
 Non senex temulentus in iocosis  
 Nympharum choreis utrinque nutans,  
 Et manu implicitos levans racemos,  
 Sed torosus et impiger videris  
 Crura tendere mobilesque plantas.  
 Sublimis fuit artifex, virilem  
 Informavit imaginem palestra  
 Dignam, non trivio levique turba.

(1) Nulla huic grandi signo laus par est, vel mentem in puero Baccho  
 defixam mireris, vel corporis motum alacrem ac vividum. In aedibus Ruspo-  
 liis erat.



AVGVSTVS ET POETA<sup>(1)</sup>

## SERMO

Aurea vicini montis de vertice luna  
 Tollitur, et radiis pellens crescentibus umbram  
 Infert se dominam tectis ubi dulcia Musae  
 Inter odoratas posuere sedilia myrtos.  
 Lumine tacta novo spirantia marmora fulgent  
 Semideum. Iuvat Augusti prope signa vagantem  
 Ferre pedem. Citharae gaudebat munere Caesar;  
 Pulse mus citharam. Viden' ut capita alta moventur?  
 Ut lorica nitet variis distincta figuris?  
 Salve Auguste. Tuam longo post tempore Romam  
 Venisti: Ausoniae column tutelaque salve.

*Aug.* Quis tu?

*Poe.* Virgilio Flaccique haud vilis amator.

*Aug.* Nomina cara mihi. Veteri de pulvere surgo.

Quid nova fert aetas, quid cogitat itala virtus  
 Scire velim. Narra

*Poe.* Dicam. Mercator avarus

Qui male collectis opibus fit publicus auri  
 Venditor; auriferi saltatrix diva theatri,

(1) Signum hoc praeclarum Augusti in villa Liviae nostro tempore inventum est. Dialogus miseram sortem artium optimarum deplorat.

Subdolus arcanæ fraudis scelerumque magister  
 Cui iocus in populum varios miscere tumultus,  
 Vel qui venales tacita sub lege potentum  
 Spargit ephemeridas, vel qui milesia fingit  
 Somnia, corruptor morum, pestisque iuventae,  
 Regna tenent. Pravis scriptoribus adde tribunos  
 Plebibus invisos, aut lingua aut ense furentes;  
 Hic rerum color, haec aevi praesentis imago.

*Aug.* Italia infelix! Ergo studia inelyta patrum  
 Factaque degeneres proculcavere nepotes?  
 Nuncius es veri? sapientum florida nutrix  
 Infœcunda iacet?

*Poe.* Caesar, ne dixeris orbam  
 Ingēniis terram quam dividit Apenninus,  
 Quam mare et oppositis circumdant frontibus Alpes  
 Non valet errorum nubes, non decolor aetas  
 Italicae mentis nativam extinguere flammam.  
 Luctamur pauci fortes, animosque leonum  
 Fortunam contra gerimus. Non limina Crassi,  
 Non colimus mensas Luculli opulentaque rura.  
 Doctrinae clausere fores? Ridemus, et inter  
 Frondosas platanos, vel aprico in margine fontis  
 Versamus libros. Tranquilla fronte Minerva  
 Spernit inane iugum et miseri ludibria fastus.)

*Aug.* Mecoenas Flacci villam parvosque penates  
 Visebat facilis, cum diceret ille nitentes  
 Bandusiae rivos et mitia Tiburis arva.  
 Pollio sicelidis laudabat grande Thaliae (1)  
 Carmen, et ipse ausus tragico miscere cothurno  
 Dalmaticas lauros. Quid te Messala recorder?

(1) Si canimus sylvas, sylvae sint consule dignae - Virgilius de Pollione

Teque gravis Lolli praeclaris vatibus usos <sup>(1)</sup>  
Iure sodalitiî? Nunquam haec illustria facta,  
Nunquam animas tales posthac cernetis? Amice  
Cur defigis humo vultum taciturnus et anceps?

*Poe.* Sola magisterium terris pulcherrima Roma  
Instaurare valet. Quercus radicibus altis  
Firma solo, complexa orbem, si vere recenti  
Foecundos imbres et dulces sentiat auras,  
Germina prisca feret. Sapiens Leo, fortis lulus<sup>(2)</sup>  
Alter ab antiquo genuerunt aurea sccla  
Aequa tuis, celebres studiis florentibus aulas,  
Magnanimos proccres exoptatumque favorem  
Artibus

*Aug.* Ignoro

*Poe.* Civilia bella memento,  
Sanguineos Haemi campos, Brutumque peremtum.  
Tempore non illo poterant assurgere Musae;  
Languebat placidi Sophie regina Lycei;  
Oppida fumabant flammis. Tute ipse triumphvir  
Non sceleratus eras? Non truncum ad Rostra sinebas  
Ire caput Tullî?

*Aug.* Quorsum haec?

*Poe.* Cedentibus armis  
Clausisti Ianum; mutataque fata repente.  
Scriptorum coetus illustravere superbi  
Tecta Palatini: Marcellum Octavia flevit

(1) . . . Non ego te meis  
Chartis inornatum silebo:  
Totve tuos patiar labores  
Impune Lolli carpere lividas  
Obliviones — Horatius

(2) Leo X- Julius II.

Percita divini cantus dulcedine mater; (1)  
 Graiorum numeris certavit Horatius audax;  
 In nova mutatas depinxit corpora formas  
 Sulmonis vates; elegi placuere Tibullo:  
 Vatibus egregiis nil, te regnante, negatum.  
 Non aliter post saevam hiemem, cum mollibus auris  
 Crispatur pelagus, nebula fugiente per undas,  
 Vela nitent; surgit clamor; dant aequora sulcos  
 Argento similes forti sub remige; proram  
 Cingit nauta rosis, et litora cara salutat.  
 Quid loquor? Obrigit marmor; tristissima nubes  
 Fronte sedet gelida. Procul, o, procul omina dira.  
 Carminibus patriae longum mulcere dolorem (2)  
 Conamur; miserae patriae solamen amicum  
 Quaerimus, et vanas non expallescimus umbras.

(1) Hen miserande puer, si qua fata aspera rumpas  
 Tu Marcellus eris - Virgil. Aeneidos VI.

(2) Scribebam mense septembri an. MDCCCLXVII: quam Latium perduelles  
 caedibus ac rapinis funestarent.

## LVCIVS VERVS (1)

Principis ambitio divûm sibi poscit honores.  
Lucius en Verus. Si contemplere micantem  
Caesaris effigiem, tam pulcro in marmore credas  
Eximium spectare virum. Reiecit amictum,  
Candidus ut Pollux; romanaque signa triumphi  
Ostentans dextra mendax attollitur heros.  
At longe dispar fuit isti vita; nec ulla  
Facta probant formam, non laus tranquilla togati,  
Bellica non virtus, non regna externa Quirini  
Adiecta imperio. Simulacrum deme, sepulti  
Nil clamant cineres; nil grande aut utile narrat  
Scriptor ab antiquis removens obliviam fastis.  
Ingenium artificis pretium sibi vindicat. Artes  
Quidquid in humanos usus natura creavit  
Nobilitant. Saxum hoc quondam deforme latebat  
Aut monte inclusum pario aut lunensibus antris.  
Docta manus vivam iussit spirare figuram  
Culmina romulei stantem super ardua collis.  
Nos post horrendam nubem saevasque procellas  
Annorum foedo detersum pulvere signum  
Eruimus terra, et patrias revocamus in auras,  
Ut stellam, tremulo vincens quae lumine noctem  
Sublimis nigra pelagi scintillat ab unda.

(1) Marci Aurelii consors in imperio, nulla laude ornatus, praeter corporis pulcritudinem, quae ab optimo artifice expressa nobiliter fuit.

MINERVA MEDICA <sup>(1)</sup>

## ELEGIA

Talis eras, love nata, leves delapsa per auras  
 Cum premeres niveo Cecropis arva pede,  
 Inter et argivas ires veneranda puellas,  
 Inachiis quae te fontibus abluerent,  
 Si forte horreres phlegraeae sanguine pugnae,  
 Vel nigram libyco pulvere sparsa comam.  
 Splendidior vitreo surgens de flumine cristas  
 Tollebas galeae purpureumque iubar,  
 Et torvam imposita velabas aegida palla,  
 Ne septum diro Gorgonis angue caput  
 Terreret placidae florentes Hellados urbes,  
 Neu Danaos rigidum verteret in lapidem.  
 Cincta dehinc nebulis, nulli manifesta profano  
 Thessala cum sociis per iuga virginibus  
 Certatim celeri volitabas flammea cursu,  
 Nunc gelidas Haemi vincere sneta nives,

(1) Minervae Poliadi nomen fecere Attici, templumque statuere secus Pandrosium. Notam graecae severitatis praecipuum, integrum marmor, numinis maiestatem in hoc signo contemplamur. Erutum fuit ex aede Minervae Medicae in Exquilino.

Nunc rapidum Eurotan, ubi caestu armata iuventus  
 Exercet ludo fortia membra fero.  
 Sed te Praxiteles resoluta nube nitentem  
 Vidit Erectheo stare super tumulo;  
 Marmor et in parium divinae lumina formae  
 Transtulit, ut signis aemula phidiacis  
 Incoleres docti felicia rura Lycei,  
 Grataque honoratis frondea tecta sophis.  
 Obstupuit pulcra percussus imagine mentem  
 Ingenio pollens nobiliore Plato.  
 Ille quidem, dea magna, tuo suspensus in ore  
 Ignea stellarum templa tenere animas  
 Carcere disrupto atque aevum immortale docebat:  
 Quem circum intenti Cecropidum proceres  
 Et sacri vates et mixti vatibus ibant  
 Heroes, lento turba verenda gradu.  
 Tu celebres sapientum aedes fidissima custos  
 Servabas densis alta sub arboribus.  
 At postquam Graiis latiae fulsere cohortes,  
 Armaque tarpeii sunt tibi visa lovis,  
 Hospes laurigeri venisti ad Tibridis undas,  
 Theseas gaudens posthabuisse domos,  
 Mitibus ut studiis cultu et meliore ferocem  
 Magnanimi Aeneae progeniem imbueres.  
 Auspice te victrix turrato vertice Roma  
 Emicuit claris aurea porticibus:  
 Zeuxidos inspectae tabulae; monstratus Apelles;  
 Lysippi in pretio sive Myronis opus:  
 Nec minus eloquium curae, dilectaque Musis  
 Otia, vel medio murmura crebra Foro,  
 Rostraque, et attoniti linguae ad certamina cives,  
 Curia seu gravibus splendida consiliis.

Hic etiam coluber formosae carus Hygiae  
 Accubuit plantis candida diva tuis.  
 Nam memorant, cum saeva lues deformia late  
 Funera per campos sterneret Ausoniae,  
 Delectos ex urbe viros, qui numina Phoebi  
 Consulerent, Delphis applicuisse ratem.  
 Pythia fatidicum quassans caput, ite Epidauron,  
 Ite, ait; hinc fessis quaerite rebus opem.  
 Quo simul ac zephyri volucrum advertere carinam,  
 Asclepi sanctis thura dedere focis.  
 Dumque graves auro pateras votivaeque ponunt  
 Munera, dum cultris victima caesa cadit,  
 Ecce deus qui membra fovet vitalibus herbis,  
 Serpentis placidam versus in effigiem  
 Insiluit puppim, et rutilo fulgore coruscans  
 Arduus Ionium per mare flexit iter:  
 Dein vada Tyrrheni transvectus ad ipsa Quiritum  
 Moenia flumineis nabat amicus aquis.  
 Aggere in herboso phrygiis tibi diva columnis  
 Limen et implicitis frondibus ara fuit.  
 Ille trahens lentos ripis declivibus orbes  
 Te prope marmoreo corpore pressit humum:  
 Unde tibi Medicae nomen, quod flamma Minervae  
 Clarior ardescit cum viget alma salus.  
 Heu quid inoffensum patitur longaeva vetustas?  
 Ingruerat ferro barbara colluvies;  
 Molibus aggestis putri tellure iacebas  
 Seclorum gelido squalida facta situ:  
 Rupisti caecas tandem indignata cavernas  
 Cuspide, ab ignotis prosiliens latebris.  
 Nunc te coetus habet divum, nunc purior aura,  
 Et citharae et dulces Pieridum choreae;



Quaque oculos vertis spirantes undique Achivos,  
Undique Romulidum lumina prisca vides:  
Libera fulminei laudas Demosthenis ora,  
Sed magis adversum suspicis Euripiden.  
Hasta tremit; sacro dat lucem in pectore Gorgon;  
Excitus ipse draco squamea colla movet;  
Semidei tacuere; at plenus numine vates  
Iactat adhuc tragico grandia verba sono.

7 PVDICITIA (1)

---

# EPIGRAMMA

## I.

En ego romuleas inter pulcherrima divas,  
 Tradita cui morum cura pudica fuit,  
 Illuvie putri templisque educta profanis  
 In medium veni conspicienda iubar,  
 Gentis ut ausoniae conarer tollere luxum  
 Indecorem, atque artes perdere femineas,  
 Ostendens specimen formae coelestis, et ignem  
 Divinum gelidis insinuans animis.  
 Plurima spectatum volitat me turba; nitentem  
 Hic faciem, hic pallae nobile laudat opus;  
 Rara Pudicitiae sequitur praecepta iuventus;  
 Rara facit castae vota puella deae.  
 Heic vicina mihi Venus est, quae me imbroba ridet,  
 Pectora quae falsis abstrahit illecebris:  
 Virtutem haec italiam patria depellere terra,  
 Haec iubet externam discere mollitiem,

(2) In fronte habet Minervam. Romanum signum est, nobilitate formae aemulum graeci.

Cantibus et choreis aurum dare, spernere Musas,  
Et Sophiam in vili deseruisse luto.  
Dedecus hoc tolerare diu piget. Aut mea ferte  
Imperia, et foedo solvite colla iugo,  
Aut me, iam signum infelix et inutile marmor,  
Pulveris antiqui proiicite in latebras.

## TITVS (1)

—

## II.

Cerne favum pedibus. Titus est. Benefacta piumque  
Principis ingenium sedula monstrat apis.

(1) In calce statuæ favus apparet.

NILVS <sup>(1)</sup>

## III.

Nile iaces: pueri circum tua corpora ludunt;  
Hic per crura salit; possidet ille humeros.  
Altior e cornu qui sese attollit opimo  
Parvula coniungens brachia laetus ait:  
Faecundat genitor pleno iam flumine campos.  
Agricolae surgant. Ridet amica Ceres.

(1) Leonis decimi iussu in Museo locatus, recenti scalpro egregie instauratus in pueris.

7 FORTVNA  
ET  
BIAS SAPIENS (1)

---

SERMO

*For.* Cur me docte Bia risu contemnis amaro?  
Non sum diva potens? Non fert mea dextera remum  
Mortalis dominum pelagi? Non divite cornu  
Iucundas telluris opes sub imagine florum  
Pomorumque gero? Cinctum diademate crinem  
Arripe: magnus eris

*Bi.* Laudet tua munera vulgus;  
Proculcat sapiens

*For.* Sed me Periander adorat,  
Me sapiens Amasis

*Bi.* Sunt reges: ille Corinthum,  
Hic premit Aegyptum. Sequitur sua cura tyrannos:  
Liber ego

*For.* Sed palliolum tibi putre; sed alges  
Paupertate: brevis tibi mensa, et lectulus asper.

(1) Fortunae statuum in novo claustro Pii VII. vides, hermam Biantis in Aula Musarum. Hic iunguntur philosophice in divitiarum contemptum.

*Bi.* Candida me Sophie coelesti nectare pascit:  
Esse deus videor

*For.* Demens, venerare potentem  
Germanam Fati

*Bi.* Sperno

*For.* Haud impune lacessis.

*Bi.* Percute: maior ero. Nihil importuna dedisti;  
Nil potes hinc auferre

*For.* Dabo, si tendere dextram  
Incipias

*Bi.* Pura est sceleris. Iam percute; cernes  
Nudum opibus, sola tectum virtute Biantem.

## ANTONIA

GERMANICI MATER<sup>(1)</sup>

## CARMEN

Claudia progenies crinem circumdata lauro  
 Tollebar fama coniux Antonia Drusi,  
 Fortunata parens cum tu Germanice dextra  
 Tarpeium quateres fulmen Rhenum inter et Albim  
 Littus ad oceani, patria virtute superbum  
 Arminium sternens, Vari fortissimus ultor.  
 At postquam invidiae stimulis flammantibus arsit  
 Caesaris ambitio, teque ipso in flore iuventae  
 Perdidit occulta deceptum fraude veneni,  
 Heu nate infelix, mihi detestata senectus,  
 Et iuges lacrymae et furiali terror in aula.  
 Ire per antiquam silvam nocturna videbar.  
 Semirutum circum valli, dispersa iacebant  
 Ossa inter cumulos galearum, squalida pila,  
 Deformes aquilae. Turbata fronte cohortes  
 Spectabant capita horrendis extantia truncis  
 Barbaricum in morem. Tu vasta aperire sepulcra  
 Dilectis animis, lacerataque signa Quirini  
 Auferre indécori limo glebisque cruentis:  
 Tu coniuratos bellum ad civile maniplos

(1) De Antonia senioris Drusi uxore Caesaris Germanici matre Tacitus in secundo Annal. flexanimi eloquentia narrat, vetuisse Tiberium ne misera parens ad exequias Germanici communi urbis luctu celebratas in publicum e Palatino prodiret. Hoc carmen describit illustrem feminam filii casus plorantem.



Sistere terribilis verso in tua pectora ferro.  
 Te scopuli abruptis e verticibus pendentem  
 Cernebam vento sparsas revocare carinas,  
 Te gelidas lecto palmas cum voce suprema  
 Tollere, nudatis gladiis accurrere amicos  
 Iurantes, superosque deos Erebumque cientes. (1)  
 Has mihi pingebam formas; haec somnia moestae  
 Portabant noctes, longis cum tecta querelis  
 Implèrent dirae volucres, et turbida nimbo  
 Luna sub antiquas caderet moribunda cupressus.  
 Gaudebat nostro crudelis Livia fletu.  
 Arbiter invisus miseram prohibebat inanes  
 Fundere singultus, testari et voce dolorem.  
 Cumque tuos cineres fidissima conderet uxor,  
 Martis et in campum turmatim ad funera cives  
 Corruerent, gemituque virum fractoque ululatu  
 Audirem longe misceri Tibridis undas,  
 Sola palatino captiva in limine mater  
 Tristibus excubiis duroque adamante tenebar.  
 Rupit vincla dolor: stygias penetravimus umbras  
 Coniuncti manes, tacitaque in nocte vagamur  
 Dulcia quaerentes ingratae obliviae vitae.  
 Romulidum pietas statuit mihi nobile marmor,  
 Solamen luctus: sed habent monumenta nefandi  
 Artifices etiam scelerum; nec libera virtus  
 Concessum indignis facile amplexatur honorem.  
 Aspice; non procul hinc cervice Tiberius alta  
 Imperium ostentat. Video spirare ferocem  
 Sanguine respersum; fumanti lumine taedas  
 Eumenidum cerno tortosque agitarier angues;  
 Et matronali frontem velata rubore  
 Aversor diram effigiem saxumque tyranni.

(1) Vide Taciti Annales

CLEMENTIA <sup>(1)</sup>

## CARMEN

O bona regnorum praeses, cui templa per omnem  
 Ausoniam, clauso bellantis limine Iani,  
 Caesare sub magno placidi statuere Quirites,  
 Tu pateram dextra profers, mortalibus aegris  
 Coelicolum fundens latices et amabile nectar.  
 Tu dea suspensas captiva in colla secures  
 Excutis, et nigri portam praecludis. Averni.  
 Tu dulcem in patriam revocas quem barbara tellus  
 Et mare nubiferum tectis natalibus arcet.  
 Ecce miser dura constrictus membra catena  
 Nocte sub horrenda septus feralibus umbris  
 Coniugis amplexum fidae natosque relictos  
 Ingemit, et caram quaerit per somnia matrem.  
 Protinus advolitans niveis placidissima pennis  
 Ferratos reseras postes, vinclisque solutum  
 Ducis in antiquos, mutata sorte, penates.  
 O nimium flecti facilis, lacrymisque precantum  
 Credula, qui toties fictae sub nomine pacis  
 Ingeminant sine fine dolos, et caeca retexunt  
 Crimina per tenebras, quantum formosior esses

(1) Amabilem deam Imperatoribus comitem antiqua numismata ostendunt.  
 Haec statua praecellens fortasse in Palatino colebatur.

Utiliorque bonis Themidi coniuncta severae,  
 Praesidio Themidis monitisque virilibus utens!  
 Ut viridi nutrita solo prope flumen amoenum  
 Luxuriante coma ramisque ingentibus arbor,  
 Si ferro agricolae sterili viduetur honore,  
 Et gelidum tegmen deponat inutilis umbrae,  
 Vere novo flores, autumno mitia poma  
 Proferet uberior campo votisque coloni,  
 Sic tu Iustitiam non aspernata sodalem  
 Parcius, at melius, populo tua dona merenti  
 Ordine distribues. Forsan suspensa requiras  
 Quo sit diva loco? Non coetibus illa clientum  
 It medio stipata Foro; non tecta frequentat  
 Aurea servilis plausu resonantia turbae,  
 Sed vultus deiecta graves, incompta capillos,  
 Ingreditur sapientum arcem, fruiturque piorum  
 Alloquiis, ubi prisca fides, ubi candida veri  
 Apparet facies; monstrat gemebunda iacentes  
 In gremio lances, et sancta volumina legum  
 Fraudibus irrisa, aut ferro violata potenti,  
 Flet libertatem scelerum, flet tristia bella,  
 Caedibus eversas urbes, et vindice poena  
 Deiectos reges, quos raro invenit amicos.

## P. SYLLA

—

## EPIGRAMMA

## I.

Cives hunc lapidem cavete; Sylla est,  
Qui tantum patriae cruoris hausit.  
Vultum si bene cernitis, videtur  
Ira turbidus, incitus furore  
Adhuc purpureis micare guttis.

## II.

Quam bene divinae menti respondet imago  
Haec tua, rex tragici carminis Euripide!  
Ardua frons, grandesque micant in corpore nervi,  
Mascula dircaeum pectora numen habent.  
Talem cecropio vidit dare iura theatro  
Amplexa ingenti Graecia te fremitu.  
Aeschylus abreptam torva sibi fronte coronam  
Flebat, Orestaeas voce vocans Furias:  
At tibi mel purum Charites, tibiserta rosarum  
Fundebat pleno Pieris alma sinu;  
Te communis amor patria super arce locabat  
Spirantem celebri marmore semideum.

(1) Quoties mihi iste Euripides per silentia noctis lunae radiis fulgens ac spiranti similis profuit in condendis versibus! Intuere tragicum poetam, intuere proximum huic Demosthenem, et frigidus abi, si potes.

DEMOSTHENES <sup>(1)</sup>

ET

POETA

—

## III.

- P.* Cur eadem est lapidi quae vivum accenderat ira  
Quum plebs obstreperet garrula Cecropidum?
- D.* Quod patriam oblita est, nec graium neve latinum  
Sed loquitur pubes itala barbaricum.

(1) Obiurgare videtur Athenienses. Utinam hoc aevo increpet obliviae atque inertiae in studio graecae ac latinae eloquentiae!

M. ANTONIVS

---

## IV.

At tu, pernicies Romae, quid deseris umbras  
Antoni? populos ad nova bella vocas?  
Linque auras italas, nostroque abscondere coelo;  
Merge caput barathro quo Catilina sedet.

7  
AMAZON (1)

—

## V.

Saucia non vili sum dextra. In marmore scribe:  
Reginam Theseus perculit Hippolyten.

(1) Severa vetustate insignis.



FABVLA ALCESTES  
IN LAPIDE SEPVLCRALI SCVLPTA

---

## VI.

Alcesten cari subeuntem fata mariti,  
Herculeum robur, tartareumque Iovem,  
Et reducem ex umbris pallentibus heroinam,  
Quae stupet Admeto consociata suo,  
Admiror, dicoque: Haec est pulcherrima laudum,  
Exemplar fidi sculpere coniugii.  
Hinc bene morati iuvenes, hinc discite nuptae  
Fortia quae monstrat facta pudicus amor.

(1) Lapis non arte sed ingenio et sapientia laudandus in superiore parte inscriptus est C. lun. Evodo et Mitiliae Acti Coniugi sanctissimae. In ambulo Pii VII.

## T FRAGMEN SCVLPTVRAE (1)

## EX PARTHENONE

## VII.

Partem phidiaci vides laboris  
 Qui templo stetit aureo Minervae,  
 Equestres iuvenum micare ludos  
 Vivo e marmore, nobilemque pompam  
 Ductam fervere Cecropis per urbem.  
 Pars longe melior iacet superbum  
 Congesta ad Tamesim. Potens britannus  
 Armorum sibi iure vindicavit  
 Hellados monumenta, quae recondit  
 Densis insula nubibus sepulta  
 Et longo oceani remota tractu.  
 Quanto rectius artibus pelagis  
 Consultum foret, artibusque nostris,  
 Si possent italam videre lucem,  
 Si darent cumulos beatiores  
 Thesauris quibus alta Roma pollet !

(1) Opus Phidiae asservatur in Museo londinensi. Hoc fragmen in ambulacro Musei Pii VII.

## VIII.

Aspice ut Augustum frons exprimit; ut micat acre  
Ingenium iuvenis consiliiue vigor.  
Iam patris ultor adest, iam volvit mente Philippos  
Libera iam Romae subdere colla parat;  
Arma inter stragemque ferox, post civica bella  
Magnanimus princeps et pater imperii.  
Omnia portendit vultus: lapis ipse nitenti  
Purior et gemma est et nive candidior.  
Salve auspex vatum! Sacra haec tibi limina Caesar;  
Haec habita; hic Musae te statuere deum.

(1) Caput formosissimum in tabula marmorea positum

## IX.

Cinge caput lauro, maiestatemque propinqui  
Augusti simula. Non est tibi romula virtus,  
Non decus imperii. Lascivia mollis et exfrons,  
Crudelis timor, et praerepti caede nepotes  
Regales fastus heroaque marmora turpant.  
Quam melius, ferro abiecto, positaque coróna,  
Seiano fultus, non inter signa virorum  
Nobilium, comitem imbellem execrata, sedēres  
Mollibus aut Capreis aut Misenensibus hortis !

(1) Grandis pulcraque statua Veiis reperta, ut supra diximus in Antonia

CATO<sup>(1)</sup>

—

## X.

Ferrea libertas, ira implacata Catonis  
Emicat in rigido viva supercilio.  
Abstinuit gladio sculptor, ne caede superba  
Offensi avertant lumina Romulidae

(2) Prostat non longe a Mario

## C. MARIUS

—

## XI.

Quid me saeve Mari torvum aspicias? Haud ego Cimber  
Coniiciens trepida tela inimica manu:  
Nec tua me facies, verum impia secula terrent,  
Quae Syllas iterum, quae generant Marios.

DE EODEM MARIO <sup>(1)</sup>

## ELEGIA

Ite procul miseras bello qui perditis urbes  
Impia civilis cum rapit arma furor,  
Quos iuvat insontes inopino absumere ferro,  
Et placidos tristi spargere caede lares.  
Me Pietas primis florentem nutrit ab annis;  
Uranie sancto me tenet alma sinu,  
Pellit et ultrices, quae conscia pectora vulgi  
Sollicitant atris anguibus, Eumenidas.  
Vera loquor. Rapti in caedem et sua damna feroces  
Instabant ferrum stringere Romulidae.  
Ipse infelicis patriae crudelia vitans  
Funera, qua densis conditus arboribus  
Rauca fluens Anio tiberinas fertur in undas,  
Quaerebam natis hospita tecta meis.  
Roscida iam sero fulgebat vespere luna  
Vix dubiam praebens per loca sola viam:

(1) Fabulam teximus quae seculi nostri discordias ac bella significat, umbram C. Marii visam prope Anienem, ubi ferocis viri sepulcrum extitit. Sic Lucanus monstra depinxit quae civilia bella praecessere.

» Tollentemque caput gelidas Anienis ad undas  
« Agricolae fracto Marium videre sepulcro.

Ecce autem tumuli squalentibus horrida saxis  
 Umbra viri magno surgere cum fremitu  
 Visa mihi: tremulam fundebat ahenea lucem  
 Cassis, et ingenti lancea stricta manu.  
 Utque solet rapido propelli turbine nimbus,  
 Huc illuc sese per vada circumagens  
 Me super attonitum simulacraque dira timentem  
 Clamabat torvis flammea luminibus:  
 Quas fugis ignave in latebras, dum praelia Mavors  
 Ad prisca imbellem suscitât Ausoniam?  
 Non pudet abiectum cithara torpere? Neque audis  
 Quantus tarpeia clamor ab arce sonet?  
 At studia hæc ingrata et inertes spernere Musas  
 Suetus ego Cimbrorum agmina terrificis  
 Cladibus urgebam, atque hostili sanguine mixtam  
 Potabam galea pulverulentus aquam.  
 Scit libycum robur; scis tu metuende Iugurtha,  
 Quem vinclis duro et carcere perdomui.  
 Nec me Sylla atrox vicit, nec libera colla  
 Flexi ego; Minturni vel malefida palus  
 Me tegeret, simili stratum vel sorte ruinis  
 Carthago aspiceret stare superba suis.  
 Veni ultor, veni; Syllam dare terga cœgi:  
 Accepit nostrum Roma subacta iugum.  
 Ille nihil de me potuit nisi triste sepulcrum  
 Diruere, et sparsos in fluvium cineres  
 Proicere incensus rabie, occisisque meorum  
 Corporibus caeca longum inhiare siti.  
 At tu cui nulla est pugnandi nota voluptas,  
 Nullus amor caedis mollia corda tenet,  
 I propere, et Marii caveas accumbere busto,  
 Frangere vel blando carmine fortem animam.



Haec ait impatiens irae: pernicibus alis.  
 Abstulerat longe pignora cara metus.  
 Acrior irruere atque hastam protendere imago.  
 Collustrans crebris aëra fulguribus:  
 Cum matutino Veneris formosior astro (1)  
 Advolat in rosea candida nube dea;  
 Quae mihi caeruleo praetendens tegmen amictu  
 Perfusum ambrosiae mulcet odore caput;  
 At lemurem indignantem oculis et voce coercet  
 Talia coelesti verba locuta sono:  
 Nam quid stulte meos nequidquam incessis amicos?  
 Quid gaudes stygios deseruisse lacus?  
 An saevi manes imo venistis Averno  
 Ut scelerum poenas impia secla luant?  
 Ferte faces alio, ferte arma horrenda per omnem  
 Europam; aggestis addite membra rogis;  
 At sinite innocuas animas, neu tangite vatem  
 Cui dedimus castam numina sancta lyram.  
 Vix ea, nocturnas evanuit umbra per auras  
 Territa; ceu nigris sub specubus latitans  
 Turba fugit volucrum, radiis orientibus ut mons  
 Pingitur, et nemorum culmina summa rubent.  
 At dea pallidulum violae dedit ore colorem;  
 Intremuitque udis lucida gutta genis.  
 O mihi care, inquit, tenero de flore iuventae,  
 Si quidquam nostro dulce in amore fuit,  
 Moenibus infidis placidam praeferre quietem  
 Ne dubita, et caecis abdere te scopulis.  
 Nulla super regio est, tyrrheno a litore ad oras  
 Extremi boreae sarmaticumque gelu,

(1) Sapientia furociam vesaniamque repellens.

Ferrea quo sese non insinuarit Erinny:  
 Sed tibi ego aethereo lumine purpureas  
 Ostendam sedes, et regna negata profanis,  
 Quo nisi mortales non licet ire pios.  
 Qualis per montes errans peregrinus opacos  
 Fert gressum horrisonis quercubus implicitum,  
 Nec dubios flexus potis est evadere, donec  
 Arripuit celsi lubrica saxa iugi;  
 Hinc longe campos prospectat et oppida, fessum  
 Gestit ubi certa ponere in aede latus;  
 Talis ego, nebula circum fugiente, videbar  
 Insuetum puro cernere sole diem.  
 Non deformis ager, non turbida fluminis unda,  
 Vere sed aeterno laeta rubebat humus.  
 Tum fons perpetuos interlabens amaranthos  
 Spargebat plures se vagus in latices.  
 Silva erat et platanis et odora frondea lauro,  
 Quam super aligeris ludere cum zephyris  
 Audires avium strepitus, totumque deorum  
 Vocibus ignotis concinuisse nemus.  
 Fida comes centum monstrabat ab aggere vates:  
 Ire leves alios margine florifero,  
 Et iuvenum blando passim certare susurro,  
 Vel de puniceis nectere sarta rosis;  
 Incessu graviore alios multaue comantes  
 Canitie tardos agglomerare choros.  
 Ille, ait, ardenti qui suspicit aethera vultu, (1)  
 Quique omnes cantu tam facile exsuperat  
 Quantum aquila in nubem celeres rapit alta volatus,  
 Dux fuit italici maximus eloquii.

(1) Dantes Aligherius.

Mente ausus lustrare Erebum, dein proxima Coelo  
 Regna, caput stellis arduus inseruit.  
 Ipsa ego transvectum pennis mirabar; at illi  
 Insolitum maior diva parabat iter. (1)  
 Hunc tamen et scelerata odia et vesana tyranni  
 Libertas, cives hunc pepulere sui  
 Lugentem dulces natos et quidquid acerbum  
 Est mage dilecta linquere cum patria.  
 At vos fortunae flectit levis aura, nec imo  
 Tollitis heu miseri pectora fixa solo!  
 Vertit ad haec lentos oculos nutuque probavit  
 Umbra deam. Sed me lux nova fulmineo (2)  
 Perculit aspectu; lapsus vigor; omnia volvi  
 Turbine et obscuras corruiere in nebulas.  
 Vix bene cognovi redeuntem ad sidera divam;  
 Talia magnanimi lumina vatis erant!  
 Undique inhorrebant tenebrae; camposque silentes  
 Mulcebat media languida nocte quies.

(1) Beatrix

(2) Umbra Dantis

## HERCVLES

PVERVM AIACEM SINV GERENS (1)

## EPIGRAMMA

## I.

Alma Thetis puerum Chironi tradit Achillem:  
 Aiacem Alcidae dat puerum Telamon:  
 Illum silvosis abscondit Pelion umbris;  
 Hunc tenet angusto regia clausa mari. (2)  
 Ambos ad Troiam bellantes evehit, ambos  
 Aeternat sacro carmine Maeonides.

(1) Alii dicunt Telephum.

(2) Insula Salamin, ubi regia Telamonis amici Herculis.

## HERCVLES TRVNCVS (1)

AD

IVNONEM.

## II.

Hic iaceo quod me ruptis dea saeva lacertis  
 Et capite et trunco poplite stare iubes.  
 Surgentem Alciden et fortia facta videbis,  
 Membra quibus careo si mihi restituas.

(1) De sublimi hoc-fragmento, cuius auctor Apollonius Atheniensis (nomen in basi est) ita canebat Augustinus Favoritus, saeculi decimi septimi scriptor in carmine quod legimus ad Cleopatrae latus exsculptum.

Hunc tamen informem licet et sine nomine truncum

Miratum huc Ararim veniunt Rhenumque bibentes »

Ante monumentum P. C. Scipionis Barbati sedet: E Pompeiani theatri ruinis emersit.

## CORNELIVS LVCIVS SCIPIO

BARBATVS (1)

## III.

Fortibus est decori virtus. Non mole superba  
 Glorior antiquus Scipiadum genitor,  
 Sed lapide albano; et factis, quae scripta sepulcro  
 Romanos animos priscaque bella docent.

*Inscriptio quae legitur in P. Cornelii Scipionis  
 monumento haec est.*

CORNELIVS . LVCIVS . SCIPIO . BARBATVS . GNAIVD  
 PATRE . PROGNATVS . FORTIS . VIR . SAPIENSQVE - QVOIVS  
 FORMA . VIRTUTEI . PARIVMA . FVIT . CONSOL . CENSOR  
 AIDILIS . QVEI . FVIT . APVD . VOS . TAVRASIA  
 CISAIVNA . SAMNIO . CEPIT . SVBIGIT . OMNE . LVCANA  
 OPSIDESQVE . ABDOVCIT

(1) In vestibulo Mus. Pii-Clementini.

MELEAGER <sup>(1)</sup>

—

## IV.

Quid mirum, Oenide, si te formosa Atalanta  
Arserit? Eximius fulget in ore decor,  
Qualis inest divûm signis. Calydonia cessit  
Palma tibi: trahitur pulvere victus aper.  
Tu Nonacrinam spectas. Quam pulcrior esset  
Hic etiam caro iuncta puella viro!

(1) In vestibulo Musei Pii VI.





Sensit auratae sonitum pharetræ  
 Victa dircaeî nemoris sub antro,  
 Quo tibi centum statuit iuventus  
 Delphica ludos.

Virginum seu te choreis amicum  
 Nutriit ridens gremio Dione,  
 Sive Lysippi labor esse mavis,  
 Vel Polycleti,

Dulce Neptuno tacitisque Nymphis  
 Antium et molles placuere ripae,  
 Hospes Augusti deus ut tenères  
 Caesaris aulam.

Unde te vasta positum ruina  
 Molis antiquae latebrisque mersum  
 Iulius flavi Tiberis propinquas (1)  
 Duxit ad undas.

Nullus intonsum caput et micantem  
 Corporis vivi speciem notarat  
 Squalor, aut pulcrâ clamydem vel imos  
 Laeserat ungues.

Iamque mutatis laribus, pelasgum  
 Undique heroum redimita signis  
 Tecta collustrans, medius sereno  
 Colle nitebas.

Protinus toto volueris sagittae  
 Murmur auditum resonare luco, et  
 Aureos cervix agitans capillos.  
 Visa moveri,

(1) Iulius II. hoc simulacrum a Caesareis Antii ruderibus effossum ad hortos vaticanos transtulit.

Vt semel Troiae miserandus augur  
 Ante conspectum stetit, et revincti  
 Parva serpentum iuvenes ab isdem

Brachia nodis.

Hercules trunco propior lacerto  
 Sedit, ac telo Meleager audax,  
 Torva quem iuxta capitis ferini

Horret imago.

Heu nefas! Heu quid melius latinae (1)

Barbarus genti rapuisset hostis,  
 Gallicus cum te furor ad remotas

Impulit Alpes,

Thessalo qualem memorant Olympo

Exulem fugisse metu tremendi

Fulminis lauro niveae tegentem

Lumina frontis?

Flevit e concha timidum marina

Verticem tollens Venus, et superbi

Militis vultus iterumque diros

Palluit enses.

At ferox crinem galea premebat

Cincta pallenti Iove nata nimbo,

Sola quae fulgur rigidaeque torquet

Ora Medusae.

Sequanam supra Rhodanumque Mavors (2),

Laevus obscura sonuit quadriga, et

Miscuit bello populos, Quiritum

Maximus ultor.

(1) Apollinem nostrum cum optimis sculpturae picturaeque operibus Parisios advectum vidimus, deinde Museo Vaticano redditum.

(2) Bella gallica innuimus, poetico more diis ipsis Musel contra raptorem pugnantibus

Tu manu frangens inimica primus  
 Vincla tyrrenum placidus per aequor  
 Laberis : denso redeunt volantes

Agmine divi.

Te sine aeternum cecidisset Urbis  
 Prisca maiestas, iterumque pulsus  
 Artibus tristi propiora ferro

Secula redirent.

O potens certo iaculator arcu  
 Mitte Titanas Niobesve prolem;  
 Mitte luctantes agitare saeva

Caede dracones.

Aureis mecum fidibus canorum  
 Barbitem tangas. Per aprica montis  
 Ecce sub lunam properant choreas

Iungere Musae.

T K

LAOCOON<sup>(1)</sup>

—

## EPIGRAMMA

## I.

Verus es, et natos inter religata draconum  
 Nexibus intorques brachia Laocoon.  
 Ut patrius micat ore dolor! Spirare supremum  
 Pectore anhelanti sentio te gemitum.  
 Corpora parva tremunt horrendo saucia morsu:  
 Heu frustra palmas tendit uterque puer!  
 At mî animus refugit: variis ego sensibus anceps  
 Differor: hinc terror me premit, hinc pietas:  
 Nec tamen avelli possum: mens omnis in uno  
 Stat visu; et lacrymis lumina fixa madent.

(1) Paucis de signo tam celebri. Quis enim audeat post divinam Virgilii descriptionem in secundo Aeneidos aliud tentare ingenio ac stilo? Sadoletus acer et perpolitus scriptor, non parum laboris adhibuit quum Laocoonem in thermis Titi suo tempore inventum cecinit. Artifices signi Agesander, Polidorus, Athenodorus.

## ANTINOVS (1)

SEV

ATLETA

## EPIGRAMMA

## II.

Sum pugil ; haec testis mihi palma. Ignobile nomen  
 Aufer, et imbellis dedecus Antinoi.  
 Non me servitio torpentem Caesàris aula  
 Ad molles puerum nutriit illecebras.  
 Sparta mihi patria est, spartanum corpus: Adonin  
 Mascula Pollucis non decet effigies.  
 Me pulvis, me dura iuvant certamina. Saxo  
 Scribe: Lacon pugnae victor olympiacae.

(1) Vetus at falsum nomen Antinous, recens Mercurius. Veriore titulo dices Atletam, si palmae truncum animadvertis prope statuam pario marmore nobilem, aetate Pauli tertii repertam in Exquilino.

## PERSEVS ET PVGILES

OPVS CANOVAE

## III.

O Venetum lumen, civis romane, Canova,  
 Antiquos inter lapides tua signa probantur;  
 Et merito; neque enim te fugit graeca venustas  
 Robur et artificum quos aurea protulit aetas.  
 En tuus hic Perseus levat ora tremenda Medusae  
 Ostendens niveo spirantem corpore formam.  
 Surgunt elaei pugiles duo: iunior ille  
 Deposuit caestus Greugas, capitique superbo (1)  
 Brachia contorquens mortalem firmus ad ictum  
 Praebet inerme latus: periura Damoxenus arma  
 Stringit adhuc religata manu, quae foedere pacto  
 Solvere debuerat, mergitque in viscera dextram.  
 Indicat immanes animos rabiemque ferocem  
 Fronte senex torva. Si longius ire liceret  
 Ut forti ingenio, sociae sic viribus artis,  
 Et lapides cumulare novos, divine magister,  
 Elida monstrares iustas consurgere in iras;  
 Crudelem patria tellure Damoxena pulsum  
 In montes fugere et caecis latitare cavernis;  
 At iuveni extincto signum victrice corona  
 Erectum, et positis placatam altaribus umbram.

(1) Greugantem pugilem a Damoxeno fraude interceptum occisumque narrat Pausanias in Arcadia. Haec tria marmora insignem Canovae laudem peperere. Perseus venustate formae, duo pugiles (praesertim Greugas) fortitudine luctae notandi.

## CLEOPATRA (1)

## IV.

Saxea sim quamvis, testabar voce dolorem  
Cum vates cantu me pius alliceret.  
Nunc linguae vis illa tacet. Mihi lumina somnus  
Iampridem miserae ferreus urget. Abi.

(1) Verius Ariadna; sed Castilioni, poetae eximio saec. decimi sext. placuit cretensem puellam vertere in Aegypti reginam. Hinc de Cleopatra altius carmen, quod parum antiquis invidet.

Marmore quisquis in hoc saevis admorsa colubris  
Brachia, et aeterna torpentia lumina nocte  
Aspicias etc.

In fronte est Aulæ Piae-Clementinae, ubi Posidippus et Menander.

CVPIDO PRAXITELIS <sup>(1)</sup>

PHRYNE, PRAXITELES

## V.

*Phr.* Quae tibi prae cunctis pulcherrima ridet imago,  
Hanc volo. Da nostri pignus amoris

*Pra.* Habe.

*Phr.* Tu iudex; dic quae potior

*Pra.* Venus Aphrodite

Pulcrrior est; vultus exhibet illa tuos.

*Phr.* Hei mihi! Praxitele, vicina incendia surgunt:

Accedit laribus flamma inimica tuis.

*Pra.* Heu heu! Ne pereat saltem meus ille Cupido.

*Phr.* Ergo pulcrrior hic?

*Pra.* Subdola, iam tuus est

(2) Celeberrimum artis exemplar. locus Phrynes, quem describimus, nemini ignotus.



DANAIS <sup>(1)</sup>

—

## VI.

Fabula non vana est Danaïs, quae vindice poena  
Nequidquam stygiis dolia mergit aquis.  
Significat cupidos sapientia graeca tyrannos,  
Quī fraude ac ferro sceptrā aliena petunt.  
Praeda fugit manibus; sed praedae aeterna cupido est;  
Inque novas artes itque reditque furor.

(1) Danaï filia urnam manibus tenens. Quae sequuntur statuæ in conclavi Cleopatrae locum habent usque ad Venerem et Adonidem; pars optima e centum operibus.

PENELOPE <sup>(1)</sup> •

## VII.

Quid fles Penelope? faciem mentitus Ulysses,  
 Nescis? auxilio Palladis ultor adest.  
 Tu gemis extinctum; celeres iacit ille sagittas,  
 Fidaque in adversos induit arma procos.  
 Iam tibi se reddet stillantem caede peracta,  
 Amplexu et longas discutiet lacrymas.

(1) Graeca imago sortem Ulyssis meditari videtur.

## VIII.

Quidquid mente potens concepit artifex  
 Componunt digito virgine Gratiae.  
 Aut saxo aut tabula reddat imaginem,  
 Dant vitam Charites, dant operi decus.  
 Parvum Praxiteles monstrat Apollinem  
 Gaudentem iaculis figere primulis  
 Reptantem viridem sepibus abditum.  
 Latona genitus crescit in insula  
 Delo, ceu tenero cespite germinans  
 Myrtus vere novo floribus albicat.  
 Illum si videas marmore in altero, (2)  
 Miraris iuvenem viribus integris,  
 Coelesti specie, tela sonantia  
 Gestantem pharetra, vel petit horridas  
 Turmas anguipedum montibus arduis  
 Scandentes superum regna, vel impiae  
 Affigit Niobes progeniem solo.  
 Quaeris purpureo numen in aethere  
 Portantem populis auricomum iubar?  
 Surgebat Charitum pictor amabilis, (3)

(1) Lacertae occisor. Quanta snavitas in puerili ludo expressa!

Opus est Praxitelis in Palatini ruinis inventum an. MDCCLXXVII.

(2) Apollinem Antiatem, de quo ode sapphica.

(3) Guido Renius bononiensis Apollinem solem divina arte pinxit Romae in aedibus Rospiliosis. Detur mihi venia si parum divertor a lapide pulcherrimo ad pulcherrimam picturam.

Quem de turrigero vertice Felsinae  
 Cives romulei traximus hospitem.  
 Hic mixtis varia luce coloribus  
 Auroram croceo lumine splendidam  
 Expressit violas canaque lilia  
 Spargentem manibus, tum celeres rotas,  
 Maioremque deum fraena volantibus  
 Dantem quadriugis, quem preit Hesperus  
 Pennis caeruleis excutiens facem.  
 Mortales oculi nubiferam super  
 Tellurem et pelagi frigida marmora  
 Cernunt implicitis ludere dexteris  
 Horas, quae volucrem distribuunt diem,  
 Sublatas zephyri flamine candido.  
 Sed me praevolitans spiritus ingeni  
 In diversa tulit. Dum loquor, ultimi  
 Conduntur radii. Vultus Apollinis  
 Nuper fulgidula vividior rosa  
 Obductus nebulae tegmine palluit.

POSIDIPPVS ET MENANDER <sup>(1)</sup>

## IX.

Quis mihi tam subito mentem novus incitat ardor?  
 Quo rapitis Musae? Veteres contemplor Athenas.  
 Panditur ingentis pulcherrima scena theatri.  
 Hic gravis apparet sella Posidippus in alta,  
 Illic iucundo nardi perfusus odore  
 Implicitusque comam populari fronde Menander.  
 Cecropidum video properare volubile vulgus  
 In caveam, rapido sparsae ceu turbine frondes  
 Pervolitant nemore in magno, cum saeva remugit  
 Vis boreae, subitusve ruit de montibus imber.  
 Purpureas inter violas formosa puella  
 Ambulat ante choros, trepidumque fatetur amorem  
 Ingenuo inveni tacitis coniuncta hymenaeis.  
 Conclamant cives: O pulcra Perinthia, melle <sup>(2)</sup>  
 Dulcior hybleo, salve! Facunde Menander  
 Filius es Charitum, salve! Sparguntque recentes  
 In scenam myrtos. Non ergo pauper oberrat  
 Veste carens Sophie. Colitur divina Poesis;

(1) Graecae comoediae principes ad salutandas Musas invitant. Reperti in ruderibus Viminalis Sixti V. villam tenere: a Pio IV. melius heic in basi conspicua positi sunt custodes loci

(2) Menander fecit Andriam et Perinthiam-Terentius in Andria

Optima scripta vigent; donatur honore coronae  
Qui decus ingenio meruit. Malecauta iuventus  
Respue fallaces nugas; venerare magistros  
Italiae Graios.....Heu somnia vana! Recessit  
Dulce oculis visum. Posidippe, Menander, utrique  
Marmorei simulacra inter taciturna sedetis.  
Regnat ubique sopor; blandam philomela querelam  
Vicina canit in silva, nostroque dolori  
Fit comes, et miseri repetit suspiria vatis.

## ISIS

—

## X.

Dulce mihi ridens Isis fragrante labello  
Hae ait: Aegypti me pudet esse deam.  
Quid flos hic loti solitus mihi pingere frontem,  
Quid sonitu rauco barbara sistra iuvant?  
Da graecam citharam, da Pindi laurea sarta;  
Mutato dicar nomine Terpsichore.

## M. TVLLIVS CICERO (1)

PROPE AVGVSTVM

—

## XI.

Maximus orator, sacram cui Fulvia linguam  
Transfixit diro sanguinolenta ioco,  
Erigitur volvens flammantia lumina circum.  
Murmure semideûm porticus alta tremit.  
Deicit Augustus faciem, desertor amici  
Qui fuit, et decôris proditor ipse sui.  
Roma ferox, memorans civilia bella, perempti  
Consulis ante pedes tacta dolore iacet.

(1) Rarum caput Tibure effossum.



## CARACALLA IMPERATOR (1)

—

## XII.

Trux oculorum acies, frons turbida, labra superbam  
Constricta in rabiem, crispa brevisque coma:  
Agnosco monstrum; proles Caracalla Severi est,  
Romanus Caesar nomine barbarico.  
Impius ense ferox ipsa inter brachia matris  
Occidit fratrem. Spirat ab ore scelus.

(1) Dici de illo potest quod Cicero de Verre—Toto ex ore crudelitas eminebat.

# AIAX <sup>(1)</sup>

---

## XIII.

Defensor Patrocli convertit in Hectora frontem  
 Aiax. En vultus ira dolorque movent.  
 Vox horrenda viri, quam fervidus hausit Homerus,  
 Heic inter mutos conticuit lapides;  
 In campis Asiae, pugnans ubi constitit heros,  
 Tollitur, et vasto concitat arma sono. <sup>(2)</sup>

(1) Sunt qui Menelaum appellant: sed Aiax, heros ab Achille secundus, dignior est marmore

(2) Scripsi an. MDCCCLXVII, quum Asia bellis tumesceret.

## SCIPIO AFRICANVS (1)

—

## XIV.

Maxime Scipiadum, trepidae spes unica Romae,  
Cui fera Carthago moenia victa dedit,  
Te-ne ducem invictum patria procul urbe iacentem  
Condidit obscuro pulvis et alga solo?  
Laudibus e tantis, tam claro e fulmine belli  
Vix parvum cives restituere caput?  
Hannibal hoc cernens cum risu clamat amaro:  
En qui me invitum traxit ab Italia.  
Egregia haec habeat romanus praemia victor:  
Non aegre patiar dedecus ipse meum.

(1) Notandus romanorum princeps heros. Caput opere egregio super tabula marmorea positum.

## 7 VENVS ANADIOMENE

—

## XV.

Pulcrum pulcra Venus petens amantem  
Concha prosiluit super marina.  
Colludunt zephyri, siletque pontus.  
Mollem Cyprin Adonidi relinquo,  
Caram foemineae deam iuventae.  
Alter dixerit auream, decoram,  
Stringentem ambrosios manu capillos.  
Me nec Virgilius meus probaret,  
Nec ferrent Heliconides pudicae,  
Si vellem teneris iocis amorum  
Fortis ingenii ligare pennas.  
Ad cantus propero severiores.

ADONIS <sup>(1)</sup>

—

## XVI.

Formosus iaculum gerens Adonis  
Surgit candidior nitente gemma.  
Nondum saevus aper latus momordit.  
Rosam dixeris imbribus benignis  
Disclusam et placidi tepore veris,  
Cui non improba vis furentis austri  
Caput cespite languidum reflexit,  
Nec sol abstulit igneus colorem.

(1) Pari forma sunt duae statuæ Adonidis et Veneris in parvo conclavi Pio-Clementino, Musivo, et recenti pictura illustri, veluti duo gemmae artis locatae.

## IN AVLA MVSARVM

MVSÆ ET POETÆ

## XVII.

*Mus.* Limina sacra patent. Non est hic fabula Pindus;  
Non hic vana sumus numina Pierides.

Fugisti vulgus? Pulcras amplecteris artes?  
Libera pauperies, integra vita placet?

*Poe.* Vester ego, Musæ, nil præter carmina quaero,  
Execror indecores ambitionis opes.

*Mus.* Cinge caput lauro: priscis te vatibus aude  
Iungere. Virgilii sit comes umbra. Veni.

DIOGENES ET POETA <sup>(1)</sup>

## SATYRA

*Poe.* Heus cynice, existi latebris? Haec regia sedes  
Cara tibi?

*Dio.* Cippo me fixum conspicias: odi  
Lucem importunam

*Poe.* Dicas ignobile vulgus  
Tot celebres animas?

*Dio.* Pars maior fabula: reges,  
Semidei, vates, oratoresque, sophique  
Turba sumus. Ferro prosterne, aut obrue terra,  
Quae nos condiderat, per me licet

*Poe.* Improbe, semper  
Oblatras

*Dio.* Saltem contra me pone Bianta,  
Vel Zenona meum, vel amici Antisthenis ora:  
Tolle hunc Silenum. Stringit deus ebrius uvas;  
Nudam ego protendens palmam de fonte bibebam.

*Poe.* Irridet cynicos

*Dio.* Imo te, stulte poeta,  
Qui lapidem adversus garris

*Poe.* Monumenta vetusta  
Concelebro liber iudex

*Dio.* Nocturnus oberras;

(1) Herma Diogenem exprimens ita vere ut nil supra, in aula Musarum prope statuum Sileni. Dialogus mores hujus aetatis arguit.

Totus es in nugis; umbram tete inseris umbris.  
Cui labor hic?

*Poe.* Famae

*Dio.* Non es ridendus ineptae  
Sectator fama? Regina pecunia cives  
In transversa rapit: censu qui paupere vivit,  
Sit Plato, sit Lysias, divino certet Homero,  
Spernitur: ad choreas et equos convertitur aurum.  
I, pete subsidium ingenio, studiisque favorem:  
Divitibus torpent animi, torpetque crumena  
Largior astutis assentatoribus. Olim  
Magnus Alexander lacta me fronte rogabat  
Quid vellem de se. Tolle umbram; da mihi puro  
Sole frui, respondebam liberrimus. Alter  
Regis adulator plures cumulare philippos (2)  
Versibus incultis potuit. Perianther amicis  
Lauta ministrabat doctis convivium. Dic tu  
Quis procerum vel adire sophos, vel tendere dextram  
Dignetur facilem Musis. Ego nescio; tantum  
Divinor quo se vertant haec saecula fato.

*Poe.* Tangis acu. Ingratos animos auresque sinistras  
Iamdudum patimur..... Sed erit felicior aetas  
Postera; sed nostrae vincent obliviae chartae.  
Haec spes me lactat

*Dio.* Nempe ut laudare sepultus  
Tabescis vivens? Docta haec insaniam multos  
Decepit. Cur non potius mercaris agellum?  
Et dulce et salubre est valido exercere ligone  
Brachia cum natis et coniuge sole perusta,

(2) De Chaerilo vide Horatium-Gratus Alexandro magno regi fuit ille-Chaerilus etc.



Cui sit cura coquendi oleris mensaeque parandae;  
Vertere tellurem, defessaque membra sub alta  
Ilice vel pinu tranquillo ponere somnō.

*Poe.* Quas mihi delicias pingis! quae gaudia campi,  
Speluncae sylvaeque darent!

*Dio.* Aut vive beatæ  
Libertatis amans, qualem me pristina secla  
Viderunt herbas pura detergere in unda,  
Aut, si te studium lucri, si fervida tentat  
Ambitio laudis, pete Gallos atque Britannos,  
Quaere alibi patriam

*Poe.* Satis est mihi gleba lapisque  
In gremio Romae

*Dio.* Dum te iucundus habet sol  
Auraque coelestis, leviolem suscipe curam;  
Verte animum ad satyras

*Poe.* In dedaleum labyrinthum  
Ingredere; nec, quo regerem vestigia, filum  
(1) Pulchra Ariadna daret, Cerno Automedonta superbum  
Praetereunte rota pavidum disperdere vulgus.  
Hunc ego si feriam versu, respondeat alto  
Iratu feriens mihi vultum ac terga flagello.)  
Lumina mille fugant per vasta palatia noctem;  
Discumbunt avidi nebulones divite mensa:  
It matrona nitens gemmis, ceu regia Iuno,  
Et formosa puella simul, pictosque tapetas  
Cyclade praelonga verrit, male cauta pudoris  
Et decoris custos. Ride, vel tange capillum,  
Iracunda tumens ultores iactat amantes.

(1) Haec argumenta satyrae inertes tantum et degeneres potentiores feriunt: bonorum aestimationem laudesque imminuere nefas puto.

Virtutem heroum novi. Furibundus Atrides  
 Coniuge pro rapta movit fatalia bella.  
 Ecce ruit magno clamore caterva forensis  
 Astreae minitans iras calidumque tribunal  
 Si violare ausim iuris legumque peritos.  
 Nolo stridentes vespas incessere fumo  
 Ne pungar; nolo saxum iactare molossis  
 Ne me discerpant

*Dio.* Iaculis incede timendus  
 Archilochi, geminans ictus impune

*Poe.* Velut tu,  
 Qui, cum prodiret pleno conferta theatro,  
 Pulsare audebas adverso pectore turbam.

*Dio.* Fortis in hoc semper

*Poe.* Temerarius atque protervus.  
 Non hoc Roma ferat; non hoc ferat itala tellus.  
 Malo verecunda me ostendere fronte. Valeto.

## MILTIADES

T

## EPIGRAMMA

## I.

Miltiade infelix, animae sub nocte volantes  
Te circum horrendo prosiliunt fremitu.  
Purpureae nutant galeato in vertice cristae;  
Dant lucem gladii fulminibus similem.  
Cecropii iuvenes, sumptis qui fortiter armis  
Te duce cum persis conseruere manus,  
Incusant patriam immemorem, deformia vincla,  
Crudelem egregiis civibus invidiam.  
Tu spectas placido victricem lumine turbam. (1)  
Sola rapit mentem, sola oculos Marathon.

(1) Imago serena est, indicatque magnitudinem animi in rebus adversis:  
Aulam Musarum tenet.

## THEMISTOCLES

—

## II.

Miltiadi nomen Marathon, salaminia pugna  
Mi dedit. Ingratas ambo ploramus Athenas.  
Xersem ego magnanimum laudo. Sed corde sub imo  
Stat patria. In cives inimicum vertere ferrum  
Flagitium est civi. Sed regi obsistere amico  
Me pudet. In dubia quid restat sorte? Venenum.

SOCRATES <sup>(1)</sup>

## III.

Sublime ingenium, vultus deformis, imago  
Socratis haec. Scriptum posuerunt nomen Athenae;  
Debuerant patriae communem scribere culpam.  
Dicam ego quae fuerint sapienti praemia. Ferro  
Straverat hostiles acies, impleverat urbem  
Lumine doctrinae, lingua victrice superbos  
Garrulitate sophos removens, altumque Platona  
Instituens clari decus immortale Lycei.  
Perfidus ecce Anytus crudeli compede vinctum  
Proiecit in tenebras; et iudex Areopagus  
Intemeratae animae dat pocula nigra cicutae.  
Exemplum infelix! Vetus haec iniuria nullo  
Desuevit seculo. Pravos ad sidera cives  
Tollimus; egregios meritis in pulvere turpi  
Sternimus ingrati. Virtus extincta remordet?  
Sacramus lapides; et honorem reddimus umbris.

(1) Unus de praecipuis hermis socraticis prope Apollinem citharedum.

AESCHINES <sup>(1)</sup>

## IV.

Eminet impavidum caput Aeschinis inter achivos  
Eloquio insignes. Non illum fulmina terrent,  
Quae iacit Antipatri regis firmissimus hostis,  
Cecropidum columen libertatisque pelasgae.  
Donatum vidit celebri splendere corona;  
Exul abit magno victus certamine linguae;  
Non tamen abiecta est securae audacia frontis.  
Clamat adhuc: Stetimus contra Demosthenis arma.

(1) Orator Demosthenis aemulus qua fronte hic describitur vere emicat in herma ad latus Uraniae. Inventus fuit in ruderibus villae Cassianae apud Tibur, uti maior pars imaginum hujus aulae.

PERICLES <sup>(1)</sup>

—

V.

Quod me, Romulidae, patria rapuistis ab urbe  
 Haud doleo: tellus attica nuda iacet;  
 Quaeque ego tollebam divûm simulacra vel aedes  
 Calcavit Thracum lurida barbaries.  
 Palladis hoc vere templum est; hic florida vatum  
 Concilia, hic priscos noscere cecropidas  
 Lactor; et umbra silens Prytanei pulcra vireta  
 Cum sacris videor concelebrare sophis:  
 Hic sequor Augustum Pericles. Felicior ille  
 Stare videt Romae tot monumenta suae.

(1) Secus hermam Periclis lege oden italicam Vincentii Montii  
 « Io de' forti Cecropidi  
 Dell' inclita famiglia » etc.

## ASPASIA

—

## VI.

Cara meo Pericli, dum stabat Graecia, coniux  
Nunquam ego sum tanto dissociata viro.  
Floruimus pariter; Thesei de moenibus ambo  
Venimus in Latium : marmora iunxit Amor.



## LYCVRGVS (1)

## VII.

Ductor eram Spartae: positum dein Tibure saxum  
Me tenuit gelido Cassia villa sinu.  
Romula progenies non passa iacere Lycurgum  
Ecce iterum claro dat mihi sole frui.  
Vellem equidem argivas urbes et regna videre  
Quae surgunt scythico libera facta iugo:  
Sed melior Tiberis. Quidquid felicibus annis  
Graeca dedit virtus, aemula Roma tenet.

(1) Statua proxima hermae Biantis

TRAGOEDIA ET COMOEDIA <sup>(1)</sup>

—

## VIII.

Diva severa comam regali splendida vitta  
 Euripidis grandi praecipit ore sonos.  
 Diva minor praecineta caput pendentibus uvis  
 Gaudet Aristophanis commemorare sales.  
 Utraque respondet praesentis moribus aevi;  
 Illa ciet fletus; inserit ista iocos.

(1) Ingentes hermae eximin pulcritudine dextra laevaue fulgent in limine conclavis rotundi, cum signis primoribus quae sequuntur usque ad bigam.

IUPITER <sup>(1)</sup>

—

## IX.

Numen habet marmor: spirat mihi numinis auram  
Iupiter, et placidus tranquillo ridet Olympo.  
Maestas fronti pulcherrima, tempora circum  
Funditur umbra comae, lenis ceu flamine venti  
Erigitur coelo nubes, et plurima vasto  
Pectore barba sedet. Melior non fulsit imago  
Phidiaci Iovis inachias dominata per urbes.  
Non eboris pretium, non grandia membra Tonantis  
Roma videt. Sacro Latii de pulvere solum  
Prodiit immortale caput; super alta Quiritum  
Signa micans flavi prospectat Tibridis undas  
Caesareasque domos; et tanta luce superbit.

(1) Caput hoc Iovis, Phidiae manu dignissimum, repertum est in solo Coloniae Ocriculanae.

## ADRIANVS ET NERVA CAESARES (1)

—

Helius est pulcher; sed vitae sordibus illum  
Infamem sperno. Nullus amor lapidi.  
Te Nerva admiror, cuius pulcherrima saxo  
Effigies, virtus Caesare digna fuit.

(1) Adrianus prope eius mausoleum effusus; Nerva in Laterano.

## HERCVLES AENEVS (1)

## CARMEN

In lucem redeo gremio telluris opacae  
 Abditus Alcides. Non Ditis pallida regna  
 Tartareumve canem vidi, sed nigra cavernis  
 Saxa et funereas valida cervice ruinas  
 Sustinui victor. Me Pompeiana tenebat  
 Curia praecelsi florens splendore theatri,  
 Nunc seclis et barbarico deperdita ferro.  
 Aurea poma gero, quae quondam Atlante subacto  
 Hesperidum ex hortis rapui. Salvete Quirites.  
 Purpureus mihi sol orienti lumine sacros  
 Ostendit colles; spirat levis aura per umbras  
 Altorum nemorum et vernos diffundit odores;  
 Antiqui vates, bellatoresque pelasgi  
 Regibus etruscis mixti ducibusque latinis  
 Circumstant. Video galeas squalore nigrantes, (2)  
 Sparsos telorum fascēs et pendula scuta.  
 Candidior matutino supereminet astro (3)  
 Arcitenens: te Laocoon miserande tuosque  
 Amplexi natos lapide obriguere dracones;

(1) Recens inventus in solo Curiae Pompeianae, ac munificentia Pii IX in museum translatus.

(2) In museo etrusco.

(3) In Pio-Clementino.

Saxea flet Theseum scopulis Ariadna marinis; (1)  
 Laodamia sui vocat umbram Protesilai;  
 Pierides moestas cithara solantur amantes:  
 Regia Pieridum est. Licet hic deponere clavam,  
 Et meliore domo placidam captare quietem.  
 Nam, fateor, cum me veteris dementia Romae  
 Thure vaporaret graiae genus heroinae  
 Sedibus adscribens superis, cumque ardua coelum  
 Scandere tentarent victis Capitolia terris,  
 Tristibus angebar curis, et plura videbam  
 Monstra super Tiberim quam quae dedit africa tellus,  
 Tuque Erimanthe ferox, et torvo Hispania vultu.  
 Brutus inhaeret adhuc menti defixus, et alte (2)  
 Pendentes gladii contra tua pectora Caesar.  
 Infelix! non virtutis non immemor irae  
 Coniurata manu depellens arma ruebas  
 In turbam, ceu magnanimus perrumpere gaudet  
 Tela inimica leo; sed Bruti ora impia cernens  
 Umbrabas tristem lacero velamine frontem.  
 Fugerat attonitus discordi mente senatus;  
 Pallebat coelo Titan; deforme cadaver  
 Tectum incestabas. Fremui, populumque vocavi  
 Criminis ultorem. Civilia bella sequuntur.  
 Ecce caput Rostris pendet venerabile Tullî.  
 Incendunt urbem vesani iussa Neronis;  
 Sternuntur ferro insontes: Nil liquit inausum  
 Aut vulgi furor aut scelerum suprema potestas:

(1) Ariadna, falso Cleopatrae nomine, tum nobilitate operis tum carmine Castilionis notissima; Laodamia Protesilaum alloquens, graecum opus anaglyphum in pariete Musei Pii-Clementini.

(2) In Curia Pompeiana Iulius Caesar occisus. Monstra in morte Caesaris, divinum Virgilii carmen lib. II Georgicon.

Donec ab extremis emersae finibus Istri  
 Romuleam in caedem geticae irrupere phalanges:  
 Utque solet crebris percussa bipennibus ilex  
 Vertice nutanti tremere, et frondentia terrae  
 Brachia demittens vasto procumbere trunco,  
 Sic mole eversa, fractis spoliata columnis  
 Ingenti sonitu collapsa est Curia: Tiberis  
 Prosiluit retro, et colles gemuere propinqui.  
 Ipse ego signorum cumulata strage sepultus  
 Cogebam putri cervicem ponere limo  
 Assuetam duos olim perferre labores.  
 Fugit longa dies: nova rerum apparet imago:  
 Nocte sub aeterna latitant vestigia Circi,  
 Quo Nero venalis turbae cum laude solebat.<sup>(1)</sup>  
 Exercere rotas, et viva absumere flammis  
 Corpora, per tenebras sceleratae lumen arenae.  
 Disiectam supra caveam radiante metallo  
 Surgit apex templi late spectandus adusque  
 Tyrrhenos fluctus et nimbiferum Apenninum:  
 Nobile portentum! Quae lux inopina? Quis ille  
 Insignis triplici frontem diademate? Roma  
 Unanimes clamore patrem regemque salutat.  
 Vertice ab aethereo fulgens altissimus heros  
 Protendit dextram, verbisque potentibus arcet  
 Horrendam belli nubem, quae fulgura longe  
 Mittit in Europam et latias circumtonat urbes.

(1) Vide Taciti historias. Super Neronis Circo Vaticanum templum conditum est. Poetice hic depingimus augustam Pii Noni P. M. imaginem arma impia ab Urbe repellentis.

## ANTONINVS PIVS

—

## EPIGRAMMA

## I.

Caesaribus titulos adiecit vile senatus  
Obsequium, et stulti principis ambitio.  
Ille salutatur victo fortissimus orbe;  
Dicitur hic felix, et deus et dominus. (1)  
Tu meliore Pius laude Antonine vocaris.  
Publicus haec Romae nomina iussit amor.

(1) Martialis de Domitiano — Edictum domini dei que nostri — De Traiano — Dicturus dominum deumque non sum —



## IVNO

—

## II.

Elidis in templo Iuno mirata Tonantem,  
Cur me phidiacae praeteriere manus?  
Dixit, et egrediens obscuro candida nimbo  
Advenit magni limina Praxitelis. <sup>(1)</sup>  
Ille deam sculpsit qualem super astra sereno  
Ridentem vultu coelicolae aspiciunt.  
Iupiter eleus cecidit : Saturnia, victis  
Argivûm terris, maenia Martis habet.

(1) Sit Praxitelis necne incertum est; sed pulcherrima deae maiestas facile tantum artificem sibi vindicat. Reperta est in Viminali.

DVO DISCOBOLI,  
AVRIGA, ALCIBIADES, PHOCIO  
IN CONCLAVI BIGAE VOTIVAE

---

III.

Quam bene laurigero tiberini in vertice collis (1)  
 Apparet ludi splendor olympiaci!  
 In medium rapitur currus; furit ardor equorum;  
 Erigitur cervix, involitantque iubae.  
 Auriga ostentans victo certamine palmam  
 Stringit adhuc laeva concita fraena manu.  
 Flos graiûm validos ingenti robore nervos  
 Protendens disco lambere gaudet humum.  
 Alter praecipiti iacit impete, cogitat alter (2)  
 Metiturque viam qua suus orbis eat.  
 Filius en Cliniae vibrato in praelia ferro  
 Hostilem calcat sub pedibus galeam.  
 Phocio primores iustissimus inter Achivos (3)  
 Tollitur, et iuvenum fortia facta probat.

(1) Conclave bigae ceteris editius hortos vaticanos prospectat.

(2) Discobolus alter Myronis, alter Nautidis.

(3) (2) Signum e praecipuis Musei, ob formae simplicis nobilitatem Phocio-  
 nis creditum.

## IV.

*Sex.* Aureli

*Poe.* Quae vox nocturna silentia rumpit?

*Sex.* Huc ades Aureli

*Poe.* Clamas tu Sexte?

*Sex.* Vocavi

Magnum Antoninum. Sed tu romane potentum  
Servus es an liber?

*Poe.* Liberrimus

*Sex.* Haec mea dicta

Civibus audacter memora. Cur Sextus in altis  
Sedibus heroum primos invenit honores?

Optimus at Caesar, quem suspexere Quirites  
Principis atque sophi geminata laude probatum,  
Sub Iove tarpeio ventis percussus et imbre  
(Indignum visu!) lento consumitur aevo?

Roma sui decoris vindex huc nobile signum  
Inferat, et caros iterum coniungat amicos.

(1) Philosophus et orator fuit M. Aurelii Caesaris magister. Postulare hic fingitur quod est in votis Romae, ut signum aeneum M. Aurelii positum sub dio ante Capitolium, in Museum Vaticanum ad iatus amici dignius inferatur.

MVSEVM AEGYPTIVM <sup>(1)</sup>

## CARMEN

Me patrii colles et amica nitentibus euris  
 Rura vocant lauros inter cantusque volucrum,  
 Vaticanus apex celso qua fulget olympe.  
 Hic mihi floriferis Erato pulcherrima campis  
 Heroum sedes aperit placidosque recessus,  
 Seu libeat gelidis captare sedilibus umbram,  
 Seu numeris mulcere deos citharaque sonanti.  
 Vidi egomet, dum nota vagor penetralia circum,  
 Laocoonta feros manibus torquere dracones,  
 Aut tremere in nivea Phoebi cervice pharetram :  
 Vidi saepe Iovis nutu vicina moveri  
 Atria, divinasque comas frontemque serenam  
 Nocte sub obscura claros variare colores.  
 Quid referam herculeo spirantem pectore flammam?  
 Vel te suspensum tegeae virginis ore  
 Setigeri Meleager apri capita alta trahentem?  
 Silenumve patrem, et dociles ad pocula lyncas?  
 Non tamen haec quaecumque olim misere Pelasgi,

(1) Conditum a Pio VII. auctum a Gregorio XVI.

Aemula felicitas Latii vel protulit aetas  
 Marmora semideum celebres referentia vultus  
 Sola domos habitant laetas, aut carmine gaudent.  
 Cernis ab etruscis ut aeneas signa ruinis  
 Excita romuleas primum micuere sub auras,  
 Armaque, crateresque, et fulva monilia matrum?  
 Haec quoque virginibus dedit oblectamina Musis  
 Aurea qui placidi moderatur fraena Quirini  
 Gregorius; solemque novum, nova divitis aulae (1)  
 Limina detexit, longeque effulgere iussit.

Ecce autem insolitae species et monstra deorum  
 Omnigenum apparent, quae sollers fingere Memphis  
 Primaeva Aegypti sub religione creavit:  
 Legiferique patres, antiquae lumina gentis,  
 Inveniunt dulces secreta in parte latebras,  
 Et laribus certis certa statione residunt.  
 Protinus impulso panduntur cardine postes,  
 Ianuaque insonuit rigido perfecta metallo.  
 Vestibulum late phariis inventa sepulcris  
 Grandia saxa tenent, et vasto pondere moles  
 Niliaca Tiberim transvectae nuper ab unda.  
 Nomina describunt lapides; similisque coronae  
 Maeander variis ambit monumenta figuris.  
 Lignea praeterea circumstant tegmina pictis  
 Interfusa notis minioque superlita rubro,  
 Dulcis ubi myrrhae nardique liquentis odore  
 Compositi reges per secula longa iacebant.  
 Nos faciem antiquam et tumulos miramur inanes.  
 Tempa paraetonii credas lustrare Canopi,

(1) Pulcherrima Antinoi statua inventa fuit in villa Adriana prope Tibur.

Aedibus Isiacis vel moestas ire per umbras.  
 Nam neque pulcra Venus nec florens ridet Iacchus,  
 Lascivaeque choro Dryades; sed torva ferarum  
 Ora nigro Libyae nutant minitancia saxo,  
 Membraque trunca virum, et miris capita ardua formis.  
 Sunt etiam tenui praesignes arte puellae,  
 Mollia circumeat niveus si corpora candor.  
 Aspice surgentem contra turresque ferentem  
 Vertice marmoreo, dominam seu dixeris Isin,  
 Sive ortam priscis de regibus heroinam,  
 Quae Pharon imperio tenuit nigramque Syenen,  
 More habituque deae quondam celebrata per Afros.  
 Reginae pedibus gemini accubuerunt leones, (1)  
 Ingentesque solo deiecti molliter armos  
 Ostendunt placidos ungues, et colla reclinant  
 Obtutu tacito: gelidus de marmore terror  
 Emicat, atque horrens membrorum spirat imago.  
 Nunc age, quis dextra iuvenis supereminet heros?  
 Quae lateri assistunt divae? Te-ne inclyte fama  
 Accipimus Ptolemaee, prior qui bella genusque  
 Isacidum memori descripta volumine Mosis,  
 Iura patrum, legesque pias, ritusque sacrorum  
 Aegypto in media Numidumque per oppida Graiis  
 Evolvenda tuis graio sermone dedisti?  
 Salve dulce decus vatum, felicibus auspex  
 Ingeniis; tuque o caro coniuncta marito  
 Arsinoe, quem fronte pari et cervicibus aequas,  
 Regalem sacro praetexens tegmine vittam.  
 Scripta silex vestras dicit cum nomine laudes.

(1) Fontem prius ornabant secus Diocletiani Thermas: inde huc translati iussu Gregorii XVI. Sculptura aegyptia vetustissima.

Altera formoso tollens se corpore nympha,  
 Vel minor Arsinoe vel flava comas Berenice  
 Carmine Callimachi stellis illata serenis,  
 Certe etiam clari Lagidarum sanguinis una est.  
 His quondam signis virtus aegyptia magnos  
 Cœlo aequare duces aeterno suevit honore,  
 Cum starent prima celebres ab origine Thebae  
 Artibus antiquis, et cum pellaea iuventus *Egya*  
 Fortis Alexandri cognomine conderet urbem,  
 Et dites Asiae compleret Graecia portus.

( Sed me, ceu ver purpureum viridantibus herbis  
 Raptat apes, diversa locis simulacra morantur  
 Carpentem summos leviter per singula flores  
 En ut luce nova fundit se largior aether!  
 En alia ut nebulis apparent signa remotis!  
 Ne vero turba ingenti ne obsistite divi.  
 Ille mihi dulces inspirat solus amores  
 Egregium pario profert qui lumine vultum  
 Antinous, Telamon qualis vel mascula Ledae  
 Progenies forti nudabant brachia luctae.  
 Illum etiam gelidi positum prope Tiburis umbras (1)  
 Naiades Albuneae suspiravere sub antro,  
 Nectebantque rosis, mollique aspergine lymphae  
 Tingeabant, puros squalor ne laceret artus.  
 Nam quid ego memorem ut forma correptus amici  
 Helius eximium iuvenem dum Caesar in omnes  
 Heroum facies et centum numina vertit,  
 Ritibus hunc etiam phariis templisque dicari  
 Iusserit, et Latio memphiten fingere Osirin?

(1) Conclave ubi servantur cadavera exsiccata.

Utque inter lucos, Anio qua currit amoenus,  
 Dilectam effigiem tectis incluserit aureis ?  
 Semiferum circa vulgus mixtamque coronam  
 Cernere erat, saevis metuendum cornibus Apin,  
 Sphyngaue tergeminiam, et nigranti corpore Nilum.  
 Ipse, velut tremulos accendit Lucifer ignes,  
 Vel matutinum stillant ubi lilia rorem,  
 Altior Antinous coeli surgebat ad auras.  
 Nunc quoque romana melius tellure nitentem  
 Maximus Ausonidum rector florentibus hortis  
 Restituit, zephyrosque dedit, veteremque Canopum.  
 Spargite, io, frondes, et opacam innectite myrtum  
 Lactea colla super. Tu magnum robore vincis  
 Alciden : te mollis amat Cytherea ; suumque  
 Ipse tibi puer idalius concedit honorem.

Quod superest, taciti ingrediar penetralia Ditis,  
 Funereosque lares ; quamquam nec nocte profunda  
 Nec silvis nigroque lacu prohibemur Avernì,  
 Grata sed elysii circumstant otia ruris :  
 Sunt tamen hic manes aeternoque obsita somno  
 Corpora, sunt atra tecti ferrugine vultus,  
 Et capitum squalens etiam nunc forma videtur.  
 Cetera nosse vetat seclorum obscura vetustas.  
 Fallor ? an excitae stygiis de sedibus umbrae  
 Cum fremitu involitant ? Quid me terretis inani  
 Attonitum visu et gelida formidine mortis  
 Regales animae ? Non haec mihi dira cupido  
 Explorare oculis artus vel tangere dextra :  
 Nec placidos unquam didici violare sepultos,  
 Ossave in ignotis rimari antiqua cavernis.  
 Numina casta sequor Musas, coetusque piorum



Concelebro insignis phoebea tempora lauro.  
Quod si vestra nefas rupisse silentia cantu,  
Si tantum longae iuvat indulgere quieti,  
Discedam tectis, quo me veneranda Minervae  
Aegis et invicti defendat Apollinis arcus.

REGIA LEONIS X. <sup>(1)</sup>

A RAPHAELE PICTA

## EPIGRAMMA

## I.

Sparge rosis limen : divinae his aedibus umbrae  
 Involitant, Raphael, Iulius, atque Leo,  
 Centum alii pariter coniuncti foedere amici,  
 Flos italûm, antiquis artibus egregii.  
 Aspicias ? en Raphael : iucundum spirat odorem  
 Lenis et ambrosiam ventilat aura comam.  
 Pristinus huic amor est : opera immortalia, formas  
 Quas didicit coelo, visere gestit adhuc.

(1) Vulgo Conclavia Raphaelis. Regia magnanimi Pontificis, et Picturae romanae. — Cui par est nihil et nihil secundum. —

## II.

Quis fragor auditur pugnae? Quae tela coruscant?  
 Romana ad Tiberim certat utrinque acies.  
 Consortes video pedites, et corpora equorum  
 Saucia semianimis incubuisse viris.  
 Irruit in medios vibranti cuspide Caesar,  
 Quem sonipes cursu praepete sanguineas  
 Huc illuc galeas inimicaque scuta refringens  
 Victorem adversi portat in ora ducis.  
 Perfide Maxenti rapida iam naufragus unda  
 Prensus tenes frustra colla natantis equi,  
 Fulmineum pavitans hostem, totoque micantes  
 Aligeros coelo purpureamque Crucem.  
 Ludimur? Haec rerum facies expressa colore  
 Emicat? An vere miles ad arma ruit?  
 Nescio; sed cupide collustrans singula, miror  
 Quod nondum fugiat Caesaris hasta manu.

(1) Praeclarum hoc opus Iulii Romani ceteraque artis miracula in hisce  
 aedibus condita sublimiore carmine ac spiritu Virgiliano describenda essent.  
 Sed non ausim nisi modeste me inserere concilio tot animarum doctrina prin-  
 cipum, quae Leonis aulam circumstant. Summa rerum capita perstringam,  
 Constanti: praelium, scholam Atheniensem Heliodorum, Disputationem Eu-  
 charisticam, ubi cum theologis Dautes.

T  
MVSIVM VETVS  
IN LEONIS X. REGIAM  
A COLLE LATERANO TRANSLATVM

MVNIFICENTIA

PII IX.

III.

Ne te fervida distrahat voluptas  
Visendi cupidum. Tenere gressus  
Parumper moneo. Iuvat lapillis  
Instratum variis solum tueri;  
Iuvat flexilis ordines acanthi,  
Nymphas purpureo colore pictas,  
Maeandri et faciles obire ludos.  
Opus pulvere squalidum vetusto  
Nonus restituit Pius, deditque  
Hic in divite regia Leonis  
Pulcras inter imagines beata  
Solis luce frui, decenter aptans,  
Fulvo gemma velut ligatur auro.  
At tu, si sapis, aestimes utrumque,  
Laborem artificis, Pii que munus:  
Dein quo te rapit impetus volabis.

## IV.

Quales puniceis ubi florent arva rosetis  
Hyblaeum gaudent carpere nectar apes,  
Attica non alio pubes praegestit amore  
Noscere doctrinae germina palladiae.  
Socratis hic facilem sermonibus applicat aurem,  
Hunc rapit inscriptis circinus in tabulis,  
Arduaue invitant secreta Matheseos; illum  
Delectat blando Teïus ore senex.  
Pectora plebeio cinguntur stoica panno,  
Et cynici nudo procubuere solo.  
Altius heroes fulgent, quos nobile silvis  
Exercet studium docte Academe tuis.  
Non tamen ille Plato est, quem cernis fronte severa  
Prostantem graiis imperitare sophis;  
At missum Coelo fulmen, venerabile cunctis  
Oraculum Europae gentibus atque Asiae,  
Paulus at est: solem portans per achaidas urbes  
Dissipat ignotum quae tegit umbra Deum.

## HELIODORVS

TEMPLO DEPVLSVS

## V.

Ecce volat divinus eques : tu barbare praedam  
Redde ; procul sancto limine carpe fugam.  
Dic regi, qui te scelera haec admittere iussit :  
Est Deus, est vindex ; laedere templa cave.

## DANTES ALIGHIERIVS

INTER THEOLOGOS

—

## VI.

Civis ego sum Roma tuus. Miraris in aula  
Magnanimi Dantem cernere Pontificis?  
Non hic vulgus iners, non atro sordida limo  
Pectora, sed procerum docta corona sedet.  
Salvete illustres animae, sanctissima templi  
Lumina carminibus concelebrata meis!  
Vos ego stellanti meditans affabar Olympo;  
Vos mihi nunc comites vita secunda dedit:  
Et merito; nam quae vestris sapientia chartis  
Fronte micans rigida diva severa tonat,  
Floribus haec italıs varios induta colores  
Facta mihi est patriae rara magistra lyrae;  
Virtutemque docens cantu, qua vividus ardor  
Ire iubet, mecum per tria regna volat.

SEPULCRVM  
TORQVATI TASSI

IN CLIVO VATICANO

---

VII.

Arripe vicini mecum fastigia collis.

Torquati cineres angulus ille tegit.

Da lacrymas vati; tumulum nec despice: vincit

Exiguus regum magna sepulera lapis (1)

(1) In parvo lapide clarior imago aeternarum nostri vatis apparet quam  
in proximo monumento recens extracto aere publico Italorum.



## CARMEN

Quis te sacra ilex memorantem prisca Quiritum  
Secula, quis longae deiecit honore senectae,  
Pulvereoque solo truncum damnavit inertem?  
Nuper ab aërio surgentem culmine montis  
Lutea pingebat radiis aurora, levesque  
Cum zephyris imbres et mollia rura fovebant.  
Tu vaticanis nidum praebere columbis  
Sueta prius dulcemque choris iuvenilibus umbram,  
Nunc despecta iaces, immani pondere terram  
Amplexa, et vasta ramorum squalida sylvā.  
Luget nudus apex, moestae fugere volucres,  
Flent quoque subiectis Tiberinae Naiades undis.  
Certe aliquid laevum Romae portendere visa es,  
Armaque, funestamque luem, propiusque ruinae

(1) Hoc nomine appellata est quod Torquatus paulo ante obitum in divi Onuphrii coenobium secedens sub ea consederit. Vi turbinis cecidit mense septembri an. MDCCCXLII.

Imperium, et fractos damna inter mutua cives.  
 Nox illunis erat, pennisque humentibus auster  
 Volvebat densos tyrrheno ex aequore nimbos,  
 Cum me nec solita vigilem dulcedine Musae  
 Lactarent, nec blanda quies, sed tectus amico  
 Limine, quo pario de marmore spirat Apollo,  
 Mugitus venti tremere, saevaeque fragorem  
 Grandinis, et crebro labentem fulguris ignem.  
 Horrebant simulacra deum nunc abdita nigris  
 In nebulis, nunc flammato rutilantia vultu;  
 Perque cavas aedes misceri murmur et altos  
 Audieram gemitus, vocemque ululare profundis  
 Porticibus; laureta sacro circumscissa luco  
 Funereum dira sub tempestate sonabant.  
 Vix primum rubuit depulsis imbribus aether,  
 Ausus mane novo spoliatos visere campos  
 Te procul abrupto delapsam ex aggere, late  
 Saxorum cumulo radicibus incumbentem  
 Aspexi, laceroque sedens in cortice fusis  
 Haerebam lacrymis, uda ceu plorat in alga  
 Fluctibus hibernis demersam nauta carinam:  
 Cum iuvenis dulci frontem mihi perculit aura  
 Caeruleis fulgens oculis: viridissima pulcro  
 Serta inerant capiti, atque acies divina micabat  
 Ingenii; volucremque pedem qua ferret, obortae  
 Florebant violae. Paulum suspensus in ipsa  
 Strage tui, gelidoque locos horrore sepultos  
 Circumiens tremulas decussit vertice frondes.  
 Ast ego iucundae rapiebar imaginis ore;  
 Incertusque animi divum sectarer an umbram,  
 Tu-ne sacer Torquate venis? tu-ne optime vatum,  
 Clamabam, cineres et limina nota revisis,

Exuviasque tuas ? Nec te secura piorum  
 Gaudia, nec carpunt humani oblivia luctus ?  
 Restitit, et blandis adspirans flebile dictis,  
 Noscis, ait, noscis quanto dilectus amore  
 Hic mihi mons olim, quantum haec foret hospita quercus.  
 Eridanum fugiens, passus crudelia vincla  
 Carceris immeriti, silvarum per iuga praeceps  
 Iam deflorentes annos et amara potentum  
 Praemia, regales fastus longumque fremebam  
 Servitium indignans ; nec libertate recepta,  
 Aethere nec puro laetabar, Mantua donec  
 Acciperet fessum gremio. Lustrare iuvabat  
 Virgilii natale solum, gratissima Mincî  
 Flumina, et Aonidum myrteta sonantia cantus.  
 Cura sed infelix tristem per inania mentem  
 Somnia raptabat furiis ; iamque ire sub Alpes  
 Impulerat, iam strata gelu castella videre  
 Allobrogum, et canas mixta inter nubila rupes ;  
 Hinc Apennini transvectum saxa relabi  
 Ad mare Parthenopes desertaque busta parentum,  
 Atque exoptatae vultu pendere sororis.  
 Cara soror ! tegeres miseri tu lumina fratris ;  
 Tu caput extincti lacrymis complexa rigares.  
 Cynthus haec inter Capitolia ad alta vocabat (1)  
 Pollicitus celebris decus immortale coronae.  
 Arma pii celebrata ducis, Solymeque tyranno  
 Libera visa mihi tantas adscribere laudes.  
 Aeger eram, cum marmorea Clementis ab aula (2)  
 Grandia mirabar frondoso haec robora trunco

(1) P. Cardinalis Cynthus Aldobrandinus.

(2) Clementis VIII. Pont. Max.

Pandere se contra Tiberim : placuere beati  
 Otia tuta loci, collesque et lucidus aer.  
 Ut veni, ut facies antiquae apparuit urbis  
 Desuper, et moles vidi squalere superbas,  
 Hinc disiecta Foro ruptis delubra columnis,  
 Caesareaque domo nigras crevisse cupressus,  
 Inde novum tolli radianti culmine templum, <sup>(1)</sup>  
 Mortalis fluxit nubes; coelestibus alis  
 Ipse etiam tollebar humo; rerumque fugaces  
 Cernebam formas simulacraque turbida vitae  
 Sub pedibus fugere, et densa caligine mergi:  
 Non aliter quam si celsa de rupe viator  
 Prospectet ventosam hiemem, strepere omnia saevo  
 Turbine, perque imas volitantia fulmina valles,  
 At silvam supra coelumque silesce et auras.  
 Ante tamen quam membra sopor lethalis haberet,  
 Ille idem fulgens ostro sanctissimus heros,  
 Cynthus ille aderat, magno coeunte senatu  
 Romulidum, lauros promissaque munera portans.  
 Aspice (et haec dicens placidum subrisit) amici  
 Serta mei, non ignotis abiecta sepulcris,  
 Non corrupta situ aut virides oblita colores:  
 Scilicet aurato cingit quae sidere crinem  
 Musa, mihi quondam divini carminis auspex,  
 Aeternum frondere iubet. Felicior arbos  
 Haec quoque apud memores vixisset sera nepotes:  
 Procubuit dirae vobis heu nuncia sortis!  
 Extulit hinc sese templi ad fastigia vates  
 Ardua, purpureoque volans cum sole refulsit.

(1) Petri. Altera pars collis Urbem prospectat, altera culmen vaticanum.

At tibi, sparsa licet tellure miserrima quercus  
 Fortia demittas indignae brachia morti,  
 Nec furor insultet boreae, nec avara bipennis  
 Diripiat saevo laniatum vulnere corpus.  
 Germen adhuc superet matris de stirpe, virenti (1)  
 Quod nemore et campos et amoenum flumen inumbret.  
 Nos quae fata manent humili cervice feremus.  
 Omnia dura pati iampridem assuevimus; omnes  
 Nitimur in fluctus. Iampridem sontibus instat  
 Poena vigil, longumque tonans horrenda minatur:  
 Immemor at scelerum torpet gens impia somno,  
 Nec coeli flammam repetitave murmura curat.

(1) Non fallax augur haec cecini; siquidem e veteri cortice nova arbor tam late succrevit ut vere dici possit aemula matris.

## INSCRIPTIONES



ANIMAE <sup>(1)</sup>

GABRIELIS LAVREANII

DEDICATIO LIBRI

Ea mihi consuetudo tecum erat praeceptor atque amice suavissime, cum adhuc praesentia ac familiaritate tua fruerer, ut quidquid ex latina poesi decerperem, iudicii tui auctoritate probatum vellem; te unice observarem; tibi optimarum institutionum, quibus me Catulli Virgilique elegantiss ab adolescentia imbueras, peculiari studio atque officiis omnibus publice gratiam rependerem. Nunc vero sinas, obsecro, memoriae tuae flores hosce vaticanos dedicem, postquam cum ingenti animi mei dolore, cum tanta latinae linguae iactura mortalium infortuniis ereptus ad superos evolasti. Si deterrima hac aetate vigeret ille amor, illa aestimatio tui, quae praemia ob singularem innocentiam, ob eximiam ingenii venustatem fore immortalia tibi, vel saltem diuturna speraveram, minus certe dolerem videns imaginem Laureanii mei ca-

(1) Bibliothecae Vaticanae Praefectus latini stili venustate floruit. Vir egregius, utinam felicior!



rissimam apud praesentes coli, laudari egregia scripta, versari iuvenum manibus exemplaria, quibus in veterum gustu servando contra recentium librorum venena uterentur. Verum, sive fortunae ludus, sive humanae indolis error sit, plerumque excellentes viros oblivioni tradimus. Ubi pulcherrimae orationes tuae? Ubi versus Catulliano necitare illiti? Ubi varia inscriptionum supellex urbano decori comparata? Pauci labores tuos, veluti sparsas naufragio merces, colligunt, pauci in deliciis habent. Dignus inter praecipuos latinitatis iudices qui fere secundus a Cunichio <sup>(1)</sup> nostro esses, ingrato silentio premeris. Hanc tu quidem dulcis anima superbiam rides; atque ab ipso sempiternae beatitatis fonte delicias omnes in literis hic diu quaesitas large hauris. At mihi necessitudinis consiliisque tuis destituto in dies augetur moeror, nec suppetit quod cupio vehementer, pene oblitteratum et corruptum romanae linguae candorem a mendaci stilo vindicare. Utinam haec loquendi scribendique barbaries quam longissime exularet! Sed ea in visceribus est. Antiquae disciplinae vix primore labro delibantur. Ingenium irretire his laqueis absurdum videtur.

Iubet me tua modestia supervacuis huiusmodi querimoniis temperare, deque ipso libello meo cogitare severius, quem ingenuae linguae cultores (vigent enim licet rari florentque) parum fortasse

(1) Raimundus Canichius optimus omnium recentiorum nitore latino excellit; *Hiadem* ac *Theocriti Idyllia* versibus reddidit ita eleganter ut nil supra. Floruit cum Zamagua.

politum dicent. Sed tibi magistro indulgenti meique  
amantissimo non adeo esse iniucundum puto ple-  
raque me argumenta poeseos ex vaticanis aedibus  
collegisse, ubi simul coniunctissime versabamur,  
ubi in Pontificalis Bibliothecae thesauris placide  
senescebas. Quocirca parvum hoc munus libens  
accipe: mihi liberisque meis doctrinae, probitatis,  
virtutum omnium exemplar esto. Vive inter inno-  
centes felix!

✱ (1)

CIVES

GABRIELI . LAVREANIO

V . C . MONVMENTVM . PONITE

RARVS . TERENTIANAE . LATINITATIS . CVLTOR

AMABIL . INGENIO . ET . MODESTIA

VIXIT . AVREVS

AETATE . IN . FERRVM . PROLABENTE

---

ALTA . PETANT . AQVILAE . GAVDENS . FLORENTIBVS . HORTIS

DVLCE . SVSVRRAT . APIS . DVLCIA . MELLA . LEGIT

(1) Ibi.

A ✱ Ω <sup>(1)</sup>

DILECTE . AMICE  
 FELIX . VISCONTI  
 OCVLIS . MISERRIME . CAPTVS  
 INTEGRIS . ANNIS  
 FLEBAS . PERDITAM . GLORIAM  
 ET . LABORES . IRRITOS . FORI  
 SOLVTIS . TENEBRIS  
 VIGILA . IN . DEO  
 SAPIENTIAE . IMMORTALIS . COMPOS

(1) Ibi.

## IOANNI PACINIO

## TITVLVS

IOANNES . PACINVS . CATANENSIS . NOBILEM . INGENII  
 FLAMMAM . SICVLA . TELLVRE . INDITAM . PRIMORIBVS  
 ANNIS . AD . MVSICEN . CONTVLIT . EIVSQVE . MAGISTERIO  
 TAM . FELICITER . EXCELLVIT . VT . CLARIS . OPERIBVS . IN  
 SCENAM . EDITIS . INTER . QVAE . SAPPHO . PVLCHERRIMA  
 FLORET . COPIA . VENVSTATE . ROBORE . MODORVM . SCRIPTOR  
 EGREGIVS . OMNIBVS . ITALORVM . SENTENTIIS . HABERETVR  
 PRAETER . LAVDES . ARTIS . GRATIAM . EI . CONCILIABANT  
 ANIMI . CANDOR . MORVM . SVAVITAS . RELIGIO . MODESTIA  
 AMICITIA . NON . SENECTVS . NON . ADVERSA . VALETVDO  
 MENTEM . ALACREM . DEIECERE . LABORIBVS . VLTIMVM  
 CHRISTIANI . CYCNI . MELOS . ROMAE . SERVATVM . HOC  
 PRAEMIVM . VIRTVTIS . MERITVS . EST . QVI . MAGNANIMAM  
 LIBERTATEM . FIDEMQVE . PONTIFICI . MAX . INCORRVPTAM  
 PROFITEBATVR . VT . SACRIS . SOLEMNIBVS . PETRI . ET . PAVLI  
 IN . LVCE . AVLAE . CAPITOLINAE . CANTICVM . INTEXERET  
 SALVTATVM . PLAVSV . ROMANO . PAVCIS . POST . DIEBVS  
 APVD . THVSCOS . QVO . SE . CVM . FAMILIA . RECEPERAT  
 QVIEVIT . IN . PACE . CHRISTI . VII . ID . DECEMBRES  
 AN . MDCCCLXVII . AET . SVAE . LXXII

ITALI . QVIBVS . PATRIVS . HONOR . CORDI . EST . DIGNVM  
 CIVEM . PERENNI . MONVMENTO . CONDECORENT

A      ✠      Ω (1)

IOSEPHVS . VANNYTELLIVS  
 SAPIENTVM . AMICVS . ET . FAVOR  
 DOCTRINAE . FORENSI . LITERARVM . ELEGANTIAS  
 GRAECA . ET . LATINA . STVDIA . CONIVNXIT  
 THESAUVROS . OMNIGENAE . ANTIQVITATIS  
 PRAECIPVVM . INGENII . ET . ANIMI . SVI . EXEMPLAR  
 FAMILIAE . RELIQVIT  
 GENVTIANVM . IN . LATIO  
 NATALE . OPPIDVM . BENEFACTIS . ORNAVIT  
 VIXIT . AN . LXXIV.

---

AMORIS . PERPETVI . MONVMENTVM  
 CINERI . OPTIMI . PATRIS  
 DILECTAE . MATRI . SVPERSTITI  
 SCVLPTIS . IMAGINIBVS . ET . MEMORIA . VIRTVTVM  
 FILII . MOERENTES . POSVERE

(1) In templo SS. App.

Λ      ✕      Ω (1)

CLARA . GIROMETTI . F . VANNUTELLIA  
 MATERFAMILIAS . VIGIL . PLA  
 EXCVLTA . ARTIBVS . OPTIMIS  
 MVSICE . ET . PICTVRA . TEXTILI . EXCELLVIT  
 SEDVLA . IN . EGENIS . IVVANDIS  
 ANIMO . CONTRA . ADVERSAM . VALETVDINEM . INVICTO  
 PRAEMIVM . VIRTVTIS . ALTE . SVSPEXIT . IN DEO  
 QVIEVIT . AN . AET . S . LX . PRID . ID . AVG . MDCCCLXVII

(1) Ibi.

A  Ω (1)

THOMAE . MASSIO  
 PATRI . IN . FILIIS . EDVCANDIS  
 GRAVI . HONESTO  
 FIDE . CONSTANTI . ERGA . SEX . PONTIFICES . MAXIMOS  
 FRANCISCVS . F.  
 DISCIPLINAE . SEVERAE . MEMOR  
 GRATO . ANIMO . POSVIT

(1) In Agro Verano.



A  Ω (1)

QVO . TE . LOCO . INVENIAM . DVLGIS . MATER  
 PER . HAEC . SEPVL CRA . INCERTVS . HAEREO  
 TITVLVS . EGREGIAE . VIRTVTI . DEFVIT  
 ABSENTE . FILIO  
 PROFER . CARAM . IMAGINEM  
 FRANCISCO . TVO  
 ET . NEPOTIBVS . MASSIIS  
 QVI . TE . SALVTANT

---

AVE . FILI  
 HOC . IN . CESPITE . DORMIO  
 NON . INDIGA . MONVMENTI  
 PRAEMIVM . CHRISTVS

(1) In Agro Verano.

VIVE IN ✱<sup>(1)</sup>

ANNA . SIMEONIA

FORTIS . AD . AERVMNAS . MVLIER

DVO . TIBI . FILII . VIDVITATEM . SOLABAMVR

PRIOR . SACERDOS . OBITV . IMMATVRO . DECESSIT

ME . REBELLES . PONTIFICALI . REGNO

CARCERI . DAMNAVERE . OB . FIDEM

TV . PATIENS . DOMESTICI . LVCTVS

IN . EXTREMA . SENECTVTE

PLACIDA . MORTE . QVIEVISTI

ANNVM . AGENS . LXXX

MEMOR . SIS . INTER . COELITES

PII . SIMEONII . FILII . PEREGRINI

(1) Centamcellis.

A ✠ Ω (1)

ROSA . RAMARINIA  
 VIRGO . INNOCENTIAE . FORMAE  
 AMORIS . IN . SVOS . RARVM . EXEMPLAR  
 HORATIO . FRATRI . DVLCISSIMO . IVNCTA . QVIESCIT  
 FLEVIT . EIVS . OBITYM . VIGINTI MENSES  
 DOLORIS . ACERBITATE CONFECTA  
 PRID . NON . AVG . A . MDCCCLVII . AET . S . XXX  
 DILECTAM . ANIMAM . IN . DEO . REVISIT  
 OPTIMA . FILIA  
 PARENTES . MISERI . ET . DESERTA . DOMVS  
 LANGVENT . NVNC . DESIDERIO . TVI

(1) In Agro Verano.



ALOISIA . KIBELA  
 SVB . CRVCE . QVIESCIS  
 PVER . TVVS . LVGENS  
 COROLLAM . IMPOSVIT  
 MATRI . PRAEREPTAE . AETATVLAE . SVAE

(1) In sepulchris teutonicis prope templum Vaticanum.

A  Q

HEIC . DEPOSITVS . EST . IN . PACE  
 LUCAS . PAIELLA  
 VIR . SINGVLARI . INTEGRITATE . RELIGIONE  
 PVBLICA . LAVDE . VIRTVTVM  
 PATERFAMILIAS . DILIGENS . CARVS . SVIS  
 IN . RATIONIBVS . MVNICIPII . GERENDIS  
 SENATVI , POPVLOQVE . ROMANO  
 DIVTYRNAM . OPERAM . CVM . FIDE . PRAESTITIT  
 OB . HAEC . MERITA  
 VNIVERSVS . ORDO . MAGISTRATVS . CAPITOLINI  
 CIVI . EGREGIO . MEMORIAM . PONI . IVSSIT  
 QVIEVIT . IN . CHRISTO  
 PRID . ID . FEBR . A . MDCCCLXIX . AET . S . LXVI  
 AVE . ANIMA . RARI . EXEMPLI



(1)

LEOPOLDE . FLOSCVLE . NOSTER  
 E . CVNIS . PRAEVOLASTI . AD . INNOCENTES . DEI  
 RAPTVS . DELICHS . PARENTVM  
 ACHILLIS . ET . MARIAE . PAIELLAE  
 OPPIDO . HORTANO  
 FRANCISCVS . MASSIVS  
 AVVS . TVVS . ABSENS  
 HANC . TIBI . MEMORIAM . SCRIPSI

(1) Hortani.

A  Ω (1)

SIMON . FRANCHETTIVS  
 NEGOTIATOR . INDVSTRIVS . INTEGER  
 STVDIO . REI . FRVMENTARIAE  
 NAVITER . PARTAS . OPES  
 TEMPERANTIA . LABORE . AVXIT  
 CONCORDIA . DOMESTICA . FELIX  
 HEIC . DEPOSITVS . EST . III . ID . FEB . AN . MDCCCLVII  
 AET . SYAE . LXV  
 CAIETANVS . FILIVS  
 OPTIMO . PATRI . MONVMENTVM

(1) In sepulchris S. Spiritus in Saxia.

A ✱ Ω (1)

QVI . LEGIS . PIA . PRECE . ME . IVVA  
 CAIETANVS . ALTERIVS  
 PATERFAMILIAS . LOCO . HVMILI . FVI  
 MODICIS . NEGOTIIS  
 VXOREM . CARISSIMAM . CVM . TRIBVS . FILIIS  
 INTEGREGRE . ET . PVDICE . SVSTINVI  
 AD . ANNVM . AET . MEAE . LXXIV  
 QVI . MIHI . LABORIS . HVMANI . FINIS  
 DOMESTICVS . AMOR  
 HOC . ME . LAPIDE . TIBI . NOTVM . FECIT  
 VT . DICAS  
 REQUIESCE . IN . CHRISTO .

(1) In Agro Verano.



(3) HEIC IACENT SIMVL COMPOSITI

IN PACE ✠

IOSEPHVS TONTINIVS ET RAPHAEL FILIVS

---

PATER . PICENTINVS . SINGVLARI . MORVM . INTEGRITATE  
RELIGIONIS . CVLTV . AB . ADOLESCENTIA . FLORVIT . MAVRO  
CAPPELLARIO . PRIMVM . ABBATI . ORDINIS . CAMALDVLENSIVM  
DEINDE . S . E . R . PATRI . CARDINALI . SVMMA . FIDE  
FAMVLATVS . EST . EIDEM . GREGORIO . XVI . P . M . AB  
INTERIORE . CVBICVLO . ADMINISTER . SEXDECIM . ANNOS  
OPERAM . PRAESTITIT . NAVVS . INNOCENS . PIO . IX . P . M  
PROBANTE . VETVS . IN . AVLA . OFFICIVM . RETINVIT  
ASIATICA . LVE . CORREPTUS . PLACIDE . DECESSIT . VTI  
PIE . VIXERAT . VI . KAL . SEPT . AN . MDCCCLIV

---

FILIVS . EXIMIAE . SPEI . IVVENIS . BONIS . ARTIBVS  
DILIGENTER . INSTITVTVS . DIE . SEPTIMO . POSTQVAM  
DEFLEVERAT . PATREM . SORTI . PARI . CVM . EO . QVIEVIT

---

CONIVX . OPTIME . TVQVE . DVLCIS . FILI . VIDVAE . MATRI  
SOLATIVM . BREVE . VOS . HENRICA . INFELIX . IN . HOC  
MONVMENTO . CONIVNXI . HEIC . CITO . DORMIAM . CVM . MEIS

(1) In templo S. Mariae Gratiarum.

SPES MEA ✠<sup>(1)</sup>

HEIC . IN . PACE . DORMIO  
 CAELESTINA . VALLETTIA . ROMANA . VIRGO  
 TVVM . EST . ALOISI . GONZAGA  
 SI . FLORVI . PIETATE . ET . MORIBVS . INTEGRIS  
 TE . PRAECIPVVM . DILEXI . ET . COLVI . FIDA . CLIENS  
 SODALITIQ. QVOD . HAEC . ROCHLAEDES . TIBI . SACRVM . HABET  
 FREQVENS . OPERAM . DEDI  
 NVNC . BEATA . IPSO . IN . SACELLO . TVO . VBI . FVNDEBAM . PRECES  
 INTER . LILIA . CONDOR  
 HOC . ME . PRAEMIO . HONESTAVIT  
 SACERDOS . IO . BAPTISTA . VALLETTIVS . PATRVVS . CARISSIMVS  
 VIXI . AN . XVIII . DECESSI . V . ID . MAI . A . MDCCCLXI

(1) In tempio S. Rochi.

## DONVM

—

VINCENTIO . TIZZANIO . ROMANO  
 SACRI . ORDINIS . CANN . LATERANENSIVM  
 QVEM . SINGVLARIS . INGENII . VIGOR . IN . AETATIS . FLORE  
 MONVMENTIS . CHRISTIANAE . HISTORIAE . EXPLANANDIS  
 LYCEI . MAGNI . DOCTORIBVS . ADSCRIPSIT  
 RELIGIO . PRVDENTIA . INTEGRITAS  
 AD . INTERAMNENSEM . PONTIFICATVM . EVEXERE  
 AVDITORES . EIVS . AMANTISSIMI  
 VT . LEVIOR . FIAT . REPENTINI . DISCESSVS . ACERBITAS  
 COMPERTVMQVE . OMNES . HABEANT  
 QVANTAM . ILLE . BENEVOLENTIAM . ET . ADMIRATIONEM . SVI  
 QVADRIENNIO . EXCITAVERIT  
 SIVE . OB . EXQVISITAE . ERVDITIONIS . COPIAM  
 MENTIS . ACIEM . PERSPICVITATEM ELOQVII  
 SIVE . OB . FACILEM . INDOLEM  
 OMNIVM . APTAM . INGENIIS  
 FAVSTO . DIE  
 QVO . PONTIFEX . INTERAMNATIVM . CREATVR  
 CONIVNCTISSIMA . VOLVNTATE . GRATVLANTES  
 CRVCEM . AVREAM . GEMMIS . INSIGNEM  
 OB . MERITA . DEDICANT  
 ID . MAI . A . MDCCCXLIII \*

## ELOGIVM

P. CARD. BRIGNOLE

CVM CORPORE CONDITVM

IACOBVS . ALOISIVS . MARIA . BRIGNOLE . S . E . R . PATER  
 CARDINALIS . TIT . S . CAECILIAE . PRINCIPI . LOCO . GENVAE  
 NATVS . POSTREMI . EIVS . REIP . DVCIS . NEPOS . FAMILIAE  
 NOBILITATEM . SVMMIS . HONORIBVS . CVMVLAVIT . INEVNTE  
 AETATE . A . LEONE . XII . P . M . ANTISTES . CREATVS . POST . ILLIVS  
 OBITVM . LEGATI . VICE . FERRARIAM . MODERATVS . EST . PIO . VIII  
 PONTIFICATVM . ADEPTO . SEDIS . APOSTOLICAE . NVNTIVS  
 FLORENTIAM . MISSVS . DEINDE . BONONIAM . CVM . CETERIS  
 AEMILIAE . PROVINCIIS . EXTRAORDINARIA . PROCVRATIONE  
 REGENTEM . DIFFICILLIMO . TEMPORE . GREGORIVS . XVI . OB  
 NEGOTIA . BENE . GESTA . IN . VRBEM . REVOCAT . PVBBLICO  
 AERARIO . PRAEFICIT . IN . PP . CARDINALIVM . COLLEGIVM  
 COOPTAT . PLVRA . ILLI . HONESTISSIMA . MVNIA . DELATA  
 IN . QVIBVS . MAXIMA . SOLLERTIA . ATQVE . INTEGRITATE  
 EST . VSVS . PRAEFECTVRA . SAC . CONGREGATIONIS . LIBRIS  
 HAERETICAE . NEQVITIAE . DAMNANDIS . CONGR . PVBLICIS  
 RATIONIBVS . EXPENDENDIS . LARGITIONES . BENEFICENTIAE  
 CVRA . PIAE . DOMVS . ORPHANORVM . PVERI . AVDITV . AC  
 LINGVA . CAPTI . BONIS . ARTIBVS . INSTITVENDI . VITERBIIS


ET . ROMAE . APVD . THERMAS . DIOCLETIANEAS . PVLSIS  
 PERDVELLIBVS . SACRO . IMPERIO . RESTITVTO . PIVS . IX . PONT  
 MAX . PVBLICI . AERARII . DIFFICVLTAITBVS . TOLLENDIS  
 SAPIENTVM . VIROVVM . CONSIPIO . PRAESIDEM . CREAT . RE  
 FELICITER . INCHOATA . DIVTVENIS . LABORIBVS . EXANTLATIS  
 SVBITO . MORITVR . CONTRA . SPEM . OPTIMORVM . CIVIVM . FVIT  
 INNOCENTIA . AC . PIETATE . SINGVLARI . INGENIO . ALACRI  
 LIBERALITATE . SVMMA . IN . PAVPERES . VIRTVTVM . OMNIVM  
 NOBILE . EXEMPLAR . DECESSIT . ROMAE . 'AN . MDCCCLIII  
 AET . S . LVII .

## ELOGIVM

IACOBI IVSTINIANII S. E. R. P. CARD.

CVM CORPORE CONDITVM

IACOBVS.IVSTINIANIVS.S.ECCL.ROM.P.CARDINALIS.PATRICIA  
 STIRPE . GENVENSIS . ORTV . ROMANVS . IN . COLLEGIO  
 ALVMNORUM . CHRISTIANO . NOMINI . PROPAGANDO  
 SEVERIORIBVS . DISCIPLINIS . SVMMA . INGENII . LAVDE  
 PERCEPTIS . A . PIO . SEXTO . PONTIFICE . MAX . INTER  
 ANTISTITES . ADLECTVS . RAVENNAM . PROLEGATVS . PERVSIAM  
 PRAETOR . MISSVS . GALLIS . ITALIAM . OCCVPANTIBVS . EX  
 VTRAQUE . PROVINCIA . DISCESSIT . ROMAE . CAPTIVVS  
 ADSERVATVS . EST . DONEC . SVBLATO . EXTERNI . IMPERII  
 TERRORE . CONSILIO . REBVS . ADMINISTRANDIS . DELECTO  
 PRAEFVIT . QVVM . RES . ROMANA . NONDVM . INTEGRA . STARET  
 DELECTVS . PVBLICIS . NEGOTIIS . PEREGRINANDO . STVDIISQVE  
 INDVLGENDO . SAPIENTER . ADVERSA . TOLERAVIT . OB . FAVSTVM  
 FELICEMQVE . PII . SEPTIMI . REDITVM . AD . PRISTINA . MVNIA  
 REVOCATVS . PRAEFECTVS . VRBIS . CREATVR . GALLICI . MOTVS  
 FORMIDINE . ITERVM . INIECTA . PONTIFICIS . ABEVNTIS . IVSSV  
 PERSTAT . IN . PRAEFECTVRA . PACE . COMPOSITA . RESTITVTIS  
 PROVINCIIS . BONONIAE . REGENDAE . DELEGATVR . DEINDE  
 AVCTVS . SACERDOTII . ATQVE . EPISCOPATVS . DIGNITATE

ARCHIEPISCOPIVS . TYRI . SEDIS . APOSTOLICAE . LEGATVS  
 MITTITVR . IN . HISPANIAM . QVO . MVNERE . FVNGENS . DVM  
 PONTIFICIS . AVCTORITATEM . EGREGIE . TVETVR . CONTRA  
 HISPANI . REBELLANT . MATRITO . PVLSVS . BVRDIGALAM . SE  
 RECIPIT . INDE . IN . HISPANIAM . REVERSVS . REGI . LIBERTATEM  
 ADEPTO . GRATVLATVM . OCCVRRIT . CRVCEM . INSIGNE . CAROLI  
 III . DONO . ACCIPIT . OB . MERITA . AEDITVVS . ECCLESIAE  
 VALENTINAE . HONORIS . CAUSA . DICITVR . LEONIS . DECIMI  
 SECVNDI . PONT . MAX . NVTV . FOROCORNELIENSIS . EPISCOPIVS  
 DEHINC . CARDINALIS . CREATVS . TIT . SS . MARCELLINI . ET  
 PETRI . AB . HISPANIA . REDVX . FORVM . CORNELII . PETIT  
 POST . ILLIVS . OBITYM . COLLEGIO . PATRV . CARDINALIVM  
 ROMAE . IN . CONCLAVE . COACTO . SVFFRAGIIS . FERENDIS  
 ADEST . PIO . OCTAVO . SVMMO . PONTIFICE . RENVNCIATO  
 SVAE . DIOECESIS . CVRAM . GERIT . GREGORIVS . DECIMVS  
 SEXTVS . SAPIENTIVM . VIRORVM . PROVIDENTISSIMVS . IVDEX  
 IN . MAGNIS . NEGOTIIS . EO . FELICITER . VSVS . EST . ALBANENSI  
 EPISCOPO . S . ECCL . ROM . CAMERARIO . PRAEFECTO . LIBRIS  
 NOTANDIS . VATICANAE . BASILICAE . ARCHIPRESBYTERO . SVMMO  
 SCRINIARIO . A . LIBELLIS . DOCTRINA . FLORVIT . ROMANAE  
 ANTIQVITATIS . MONVMENTA . SPLENDORE . AVGENDA . CVRAVIT  
 EXIMIA . IN . DEV . PIETATE . MORIBVS . SVAVISSIMIS . VIRTUTE  
 HONORVM . FASTIGIA . MERITVS . OBIIT . IN .  . SEX . KAL . MAR .  
 AN . D . MILLESIMO . OCTINGENTESIMO . QVADRAGESIMO  
 TERTIO . AETATIS . SVAE . SEPTVAGESIMO . TERTIO

## PIO . IX . PONT . MAX .

QVO . DIE . PATEFACTA . AD . MARE . TYRRHENVM . VIA . FERREA

PISCES . SVNT . ILLI . PVBLICO . MVNERE

CENTVMCELLIS . DELATI

Maxime Piscator Cui Retia Credita Petri  
 Cymbaque Tartareis Nunquam Demersa Procellis  
 Has Tibi Primitias Offert Via Ferrea Piscem  
 Aequare Tirreno Captum Dum Surgit Ab Vndis  
 Virginis Alma Dies Stygium Quae Conterit Anguem  
 Accipe Sit Piscis Praedae Maioris Imago  
 Namque Per Ausonios Celeri Iam Tramite Campos  
 Vndique Transvectae Romana Ad Moenia Gentes  
 Largius Advenient. Tu Retia Mistica Tendes  
 Armaque Perfringens Caedem Quae Saeva Minantur  
 Divinum Tolles Optatae Pacis Olivum



## PIO . IX . P . M.

SOLIS . ECLIPSIS

XIV . KAL . AVG . A . MDCCCLX.

—

Sol Pallet Densaque Caput Sub Nube Recondit  
Terror Habet Gentes Moestis Animalia Campis  
Irrequieta Fremunt. Brevis Effugit Hora. Nigrantem  
En Sol Paullatim Formosior Executit Vmbram  
Laetitia Splendore Novo Perfunditur Orbis  
Haec Est Vera Pii Tenebras Vincentis Imago

## PIVS . IX . PONT . MAX.

LEONIANI . ATHENAEI . MAIESTATEM

TEMPLO . INSTAVRATO

AVCTIS . MVSEIS

PORTICIBVS . MARMOREO . PAVIMENTO . DECORATIS

SCALIS . IN . SPLENDIDIOREM . FORMAM . EXTRVCTIS

SAPIENTER . AB . INIVRIA . TEMPORVM . VINDICAVIT

CVRANTIBVS . VINC . SANTVCCIO . LOD . DE . ALTERIIS . S . E . R . PP . CARD .

AN . D . MDCCCLIX . S . P . XIII.

PIVS . IX . P . M. <sup>(1)</sup>

CIVIVM . ADVENARVMQVE . COMMODITATI  
 VIAM . FERREAM . CENTVMCELLIS . APERVIT  
 VRBEM . AVCTO . COMMEATV . FLORENTEM  
 NOVIS . MOENIBVS . PRODVCI . IVSSIT  
 OPVS . TRIENNIO . ABSOLVTVM  
 A . D . MDCCCLIX . S . P . E . XIII.

(1) Centumcellis.

## PIVS . IX . P . M. (1)

CLAVSTRA . PLANTIS . EXOTICIS . COLENDIS  
 HEIC . COEPTA . PII . VII . P . M . PROVIDENTIA  
 VBERIORE . COPIA . ARTE . ORNATV . AEDIVM  
 VIRIDARII . AMOENITATE . PERFECIT  
 AN . S . P . XVI

---

Ingredere O Princeps Tiberinae Limina Florae  
 Auspice Te Melius Rura Beata Nitent  
 Mille Tibi Crescunt Peregrino E Semine Plantae  
 Rebus In Adversis Crescit Vt Alma Fides  
 Post Hiemem Redeunt Flores. Post Impia Bella  
 Cingent Victrices Haec Tibi Serta Comas

(1) In Hortis Ianiculensibus  
 Botanicae Provehendae

## PIVS . IX . P . M.

HONESTIS . FEMINIS . INOPIA . LABORANTIBVS  
SEMOTVM . A . CETERIS . AEGRIS . CONCLAVE  
IN . NOSOCOMIO . LATERANENSI . EREXIT  
VBI . PARTVBVS . COMMODE . LEVARENTVR  
OMNI . SALVTARIS . ARTIS  
RELIGIONIS . HVMANITATIS . HABITA . CVRA  
SCIENTIAE . STVDIOSIS  
IN . PRAECIPVO . HVMANAE . VITAE . MOMENTO  
PROSPICIENDI . OPITVLANDI . COPIAM . PATEFECIT  
NOVVM . EGESTATI . MISERANDAE . AVXILIVM . TVLIT  
A . S . P . XVIII.

IVSIVRANDVM . FIDEI

ERGA . PIVM . IX . P . M.

DOCTORVM . DECVRIALIVM

MAGNI . LICEI . ROMANI

—

Leo Decimus Ceterique Ab Illo Pontt. Maxx.  
 Beatissime Pater Romanum Athenaeum Cum Impia  
 Bella In Religionem Arderent Firmam Velut Arcem  
 Esse Decrevit Vbi Ductu Auspicioque Christianae  
 Sapientiae Publici Magisterii Iura Imperarent. Eg-  
 gia Instituta Bonarum Artium Ac Disciplinarum  
 Omnium Perpetuo Tradita A Maioribus Tua Munifi-  
 centia In Splendidiorem Cultum Profecta Doctores  
 Decuriales Solemni Ritu Nos Integra Servaturos Iu-  
 ravimus. Hoc Sacramento Obstricti Ad Tuos Pedes  
 Provolvimur Vt Quam In Aula Leoniana Dedimus  
 Fidem Illustrius Atque Apertius In Principis Nostri  
 Conspectu Instauremus. Cum Enim Hac Infelici  
 Aetate Regni Pontificalis Hostes Partim Arma Nefa-  
 ria Partim Subdola Commenta In Illud Si Fieri Pos-  
 sit Evertendum Congerant Torpere Ignavia Deesse  
 Patri Et Regi Indignum Officio Nostro Arbitramur.  
 Ex Vltimis Pene Terris Communis Indignatio Contra  
 Nova Facinora Vehementior In Dies Erumpit. For-  
 tissimi Antistites Veterum Patrum Exempla Aemu-

lati Qui Christiano Nomini Praesidio Atque Ornamento Fuere Omne Ingenii Lumen Omnes Facundiae Nervos Adhibent In Mendaciis Detegendis Ne Imperiti Homines Errorum Laqueis Intercipiantur. Quidquid Sapientum Ac Bonorum Est Pro Sanctitate Publici Iuris Obniti Strenue Videmus. Tu Magnanime Princeps Non Humana Promissa Non Minas Sed Certissimum Tuae Causae Vindicem Testaris Deum. Saepius Eloquii Tui Flumen Scriptis Atque Concionibus Vberrime Promanavit. Nunc Vero In Tot Tantisque Fluctibus Altius Vocem Tollens Populos Ab Incerta Trepidatione Ad Invictam Illam Fortitudinem Quae Tuum Pectus Obarmat Mirifice Convertis. Ipsa Tantaе Virtutis Admiratio Faciet Vt Qui Legitimi Dominatus Fraena Proculcant Vel Ad Meliora Consilia Animos Adiiciant Vel Iustam A Caelo Multam Sibi Propediem Imminere Sentiant. Omnia Tibi Quidem Fausta Beatissime Pater Eventura Confidimus Neque Enim Victoria Romani Pontificis Ex Vicissitudine Temporum Aut Regum Voluntate Pendet. Divinitus Acceptum Imperium Immortale Liberum Est. Quo Pervicacius Tentatur Eo Fortius Assurgit. Haec Praecepta In Iuvenum Mentibus Defigenda Curamus Haec Nos Tenere Constanter Parum Esset. Operam Tibi Exhibemus Quaecumque Sacri Principatus Defensio Postulet Voce Scripto Consilio Rem Labantem Tueri Denique Omnia Malle Quam Regem Nostrum Libertate Deditum Vniuersi Profitemur Nimium Felices Si Publico Magisterio Fungentes Institutori Catholici Orbis Aliquam Partem Auxilii Deo Iuvante Conferamus.

## VOTVM

## PRO . INCOLVMITATE . PII . IX

DIE . FESTO . ALOIS . GONZAGAE

AN . MDCCCLXVII

—

Gonzagam Supplex Anno Redeunte Precabar :  
 Tempora Magnanimo Da Meliora Pio.  
 Cum Mihi Purpureo Iuvenis Castissimus Ore  
 Reddidit Haec: Spinis Lilia Mixta Vides.  
 His Ego Laetus Eram. Gaudet Certamine Virtus,  
 Nec Fortes Animas Omnia Fausta Decent.  
 Maior In Adversis Pius Eminent. Invidus Anguis  
 Candida Regali Quem Pede Virgo Premit  
 Nunc Aperit Caecas Vasta Tellure Ruinas  
 Nunc Raptit Accensos Ad Sua Bella Duces.  
 Irrita Sed Monstri Pellens Conamina Mater  
 Dilectum Caelo Protegit Alma Caput.  
 Dic Romae - Si Te Aggreditur Novus Attila Ferro  
 Ne Metuas. Gladio Vindice Petrus Adest.



Crede Ratem Pelago Nec Te Surgentibus Aether  
Caligans Nimbis Nec Terreat Impetus Vndae  
Iampridem Expertus. Dubio Regis Aequare Cursum  
Nauta Sacer. Zephyri Modo Spiravere Secundi  
Turbidus Incubuit Nigris Modo Fluctibus Auster.  
Tu Fidens Animi Semper Tu Praeside Tutus  
Virgine Quae Roseam Per Nubes Explicat Irim  
Scinde Fretum Victor. Vel Se Per Inane Resolvat  
Tempestas Vel Certa Cadat Sanctissima Puppis  
Transiliet Scopulos Donec Redimita Coronis  
Lintea Securos Intrent Felicia Portus.

---

CONTEMPLARE . HOSPES (1)  
 PORTAM . HANC . VRBIS . LEONIANAE  
 OPVS . ANTONII . A . SANCTO . GALLO . NOBILIS . ARCHITECTI  
 FLORENTINI  
 DEHINC . INGREDERE . PROXIMAS . AEDES . IN . RIPA . TIBERIS  
 ASYLVM . DEMENTIVM  
 LOCA . OLIM . SQVALIDA . ANGVSTA  
 PIVS . IX . AERE . PROPRIO  
 CELLIS . COMMODIORIBVS . LATE . PRODVXIT  
 OMNIGENA . SVPELLECTILE . ARTIS . SALVTARIS  
 MEDENTIVM . CVRIS . INSTITVTISQVE . ORNAVIT  
 IN . ARCV . SVPERIORE . PORTAE  
 VIAM . INFELICIBVS . APERVIT  
 AD . HORTOS . BARBERINIANOS  
 TELLVRI . COLENDAE . LIBERIORI . CAELO . FRVENDO  
 HAEC . ADDE . FASTIS . OPTIMI . PRINCIPIS  
 ET . VATICANVM . SCANDE

(1) Prope templum S. Spiritus in Saxia.

## CLAVSTRVM PVLVERI SVLPHVREO.

IN BELlicos VSVS CVSTODIENDO

Sulphureus Pulvis Iusta Hic Ad Praelia Seryor  
Non Mörtem Non Damna Fero Tristesve Ruinas  
Gentibus Innocuis Nec Me Violenta Superbi  
Principis Ambitio Miseras Accendit In Vrbes  
Relligione Sacer Tutari Moenia Romae  
Glorior Adversas Romae Disperdere Turmas  
Si Petrus Iubeat Sum Vindex Fulmen In Armis  
Sum Decus Et Columnen Regni. Procul Este Rebelles  
Pontifici Nolite Meos Acuisse Furores.

NOVVS PANIS AD VTILITATEM PVBLICAM

PIO IX PONTIFICI MAX. OBLATVS

## EXAMETRI

Panis Ab Igne Recens Cereris Non Arte Profanae  
Munere Sed Romae Populi Confectus Ad Vsum  
Candidus Et Sanus Venio Tu Maxime Pastor  
Accipe Tu Christi Vice Fungeris Erige Dextram  
Quacque Olim Portenta Manus Divina Peregit  
Commiserans Turbam Renova Si Tangere Gaudes  
Si Gustu Si Voce Probas Ego Largior Ibo  
Candidior Pretio Levior Gratissimus Vrbi  
Solamenque Inopum Te Felix Roma Paternis  
Addicta Imperiis Plausu Maiore Sequetur  
Grandia Monstrantem Divini Exempla Magistri



## DIVERSA



## DE STUDIO LATINITATIS

## ORATIO

HABITA IN ARCHIGYMNASIO ROMANO



Praeclarum illud in maxima sapientum celebritate latine dicendi munus, quod ex curia Quiritum ad hanc nobilissimam sedem optimarum artium divina mens Leonis Decimi Pontificis Maximi contulit, cum mihi primum studiis solemniter instaurandis demandatum videam, egregii rei literariae moderatores, ita iudicii vestri benignitate recreor ut quae diu multumque versare animo ac quotidianis sermonibus soleo, quae patrius amor suggerit, liberius in hoc temporis locique deprimam, ubi conventus splendidissimi taciturnitas nihil aequo animo patitur quod suae dignitati minus opportune respondeat.

Operae pretium est ab ipso disciplinarum omnium auctore Immortali Deo, a moderatrice totius sapientiae Deipara, cunctisque Caelitibus fausta ac felicia ineuntis anni curriculo adprecari: liceat deinde mihi paulo fasius in eam partem oratione provehi in qua cum romani nominis magnitudo vertitur, tum singularis momenti vestra auctoritas erit, ut vulnus in iuvenum visceribus alte defixum aliquando sanari possit, vel efficaci saltem leva-



mento foveri. Dico de latinae linguae prolapsa perditaue fortuna: de fonte illo elegantiarum qui unus e vetustissimo Imperio integer defluxit ad posteros; quem Christiana Religio poeticis fabulis expiatum casteque manantem ad severioris doctrinae latices derivavit; cuius denique aestimationem tribus ante seculis, aurea illa aetate, ea copia ingeniorum, vir absolutae eruditionis Muretus in iisdem hisce subselliis iuventuti florentissimae commendabat. Nolite adeo me inconsultum suspicari ut legum atque institutionum primarii huius Athenaei, ex quibus in ceteras urbes disciplinae optimae redundarunt, locoque ipsi Sapientiae nomen est inditum, maiestatem ac robur aliqua ex parte labefactatum putem. Video in coetu vestro imaginem pristinae amplitudinis: video quotidiana auditorum frequentia philologiam coli; tantam denique inesse praeceptis eloquentiae salubritatem, ut qui huiusmodi succos diligenter hauriant utilitati atque auxilio iis potissimum sint futuri quorum omnis labor in puriore literatura instauranda versatur. Proinde mihi facilius persuadeo, rem nobilem in sinu vestro positam strenue vos praestatueros, quam totius Italiae incitamento, bono ac laudi civitatis nostrae summopere idoneam fore contendo.

Saepe audiavi maiores natu commemorare, funestissimis bellorum turbinibus sexaginta ab hinc annis laborante Europa, veteres studiorum rationes militari dominatu permixtas in maximum incidisse discrimen: verumtamen illo incendio cum

(1) Cum haec scriberem, eloquentiae in Athenaeo tradendae e regiam dabat operam vir disertissimus Aloisius Maria Rezzj antecessor meus.

omnia arderent, non defuisse impigros homines, qui vel in hac urbana collium atque hortorum amoenitate, vel ubicumque facultas otii daretur, ad latina poemata exaranda se mutuo invitarent. Atque idem ego primores annos Bucolicis Virgilianis imbuens optima quaeque recentiorum scripta non mediocri delectationeolvebam; praesertim Iliadem atque Odysseam latinis Cunichii ac Zama-gnae versibus mirabar expressam: tum me ad Theocriti delicias ille meus amor Cunichius vehementer rapere consueverat. Nihil autem esse tam austerum aut rigidum explicatu quod non Ausoniae Veneres mollirent ornarentve, satis probare poterant nova quaedam comperta matheseos poetice a Staio descripta, quae mirum in modum nostris auribus insonabant. Itaque statuis, tabulis, codicibus eximiis ingenti praeda in Galliam ex hac urbe convectis, nulla praepotenti militi de romanis studiis victoria contigit. Postquam vero communi libertate a magnis regibus vindicata provisum est literariae reipublicae, omnes qui linguae italicae iura tuebantur in eam laudem conspiravere ut nativa illius inloles iam fere dilapsa restitueretur. Quo consensu vix dici potest quantum succi ac sanguinis domesticae eloquentiae accederet. Pulsis aliquando Celtarum deliramentis maxima nostri iuris exemplaria suspeximus. Futile atque imbecillum scribendi genus ad grandia inventa sensusque altiores erectum est: idem theatri additus vigor qui Graeciam Euripide ac Sophocle auctoribus inflammaverat. Atque haec praeclara incepta utinam eo venissent quo rectae institutiones natu-

rali cursu, velut ad portum navigia, delabuntur, ad latinos inquam scriptores, ad latinam frugem cum vernaculis floribus coniungendam! O lumina romanae vetustatis segnius inspecta quam deceat! Adeone vel optimarum rerum initia praepostero fine occupantur! Quod interdum fieri videmus in deducendis coloniis, aut in erroribus maritimis, ut advenae post longas iactationes in aliquam delati amoeniorem insulam navigandi terminos per ignaviam sibi praescribant in iis oris, neque maiores regionum tractus aspiciant, praecellente aëris temperie, agrorum ubertate, mitibus incolarum ingeniis, cum quibus necesse habeant commeatus instituere, quaerere defensionum adiumenta contra praedones, idem ferme patriis literis accidit communi consensione Itolorum ab alieno imperio vindicatis.

Primo Insubriam, Etruriam, Aemiliam, deinde Italiam universam fallax opinio pervasit, tantum esse operae latinitati navandum quantum demortuae linguae medioeris notitia ferat: ita cum paene e rhetorum ludo fueris egressus, omnem impetum in alia tibi studia coniiciendum, ex quibus in media luce famam assequaris. Hisce delinimentis magna iuvenum pars labare paullatim atque averti coepit. Remotis Tullii Virgiliique exemplaribus, promptiores aestimabant ad scribendum aditus quam si arduum ac salebrosum iter veteri instituto aggrederentur. Hac inquam mora tironum mentibus obiecta, longe diversam a quavis disciplina licentiam profiteri ausi sunt vecordes quidam fabularum milesii generis fictores; qui dum praedicant

populari se uti stilo, dum popularia commenta (seu scelera ut verius dicam) e latebris eruunt, omnes thesauros non ex avitis opibus atque hac paene infinita varietate, sed stipe ab exteris libris mendicata facilius comparari docent. Primo quidem huiusmodi nubeculae delatae ab Alpibus nostros ante oculos provolare coeperunt, ac nescio quid peregrinum instrepere, deinde vero quot fluctus in rebus civilibus, quot in bonis artibus procellas excitaverint nemo est qui non sentiat, nemo qui non indignetur hodiernam stultorum arrogantiam, ingenua documenta pro nihilo habita, adolescentiam, cuius maxima commendatio posita est in verecundia, elata fronte incedentem, venena librorum domi ab ipsis pueritiae manibus tractata, in scena cum plausu accepta, degustata, veluti neectar divinum sapiant. Taceo de publicis aerumnis; unum dieo, nihil aliud esse causae cur longe a vera cogitandi scribendique methodo nostra aetas aberret, nisi novam superbiam, laboriosae doctrinae fastidia, ac praesertim latinae philologiae oblivionem atque contemptum. Haec illa est labes quae vel coniunctis omnium nostrum viribus in abditissimos hyperboreos pulsa deeedet, vel certe germina ipsa pulcri honestique corrumpet.

Inest profecto inest huic urbi pulcherrimae dos quaedam peculiaris, non ab ineertis fortunae vicibus, aut communi mortalium conditione, sed caelestis Providentiae beneficio commissa; quam praeteritarum laudum memoria exornat, amplificat humanarum divinarumque rerum potestas, illustrent artes, scientia antiquitatis, omnigena eruditionis

materies propalam effusa monumentis, simulacris, lapidibus inscriptis, ipsa denique tellus incredibilem doctrinae segetem omni ex parte progignens. Nonne cum Romani Fori vestigia, ac tramites ingenti ruina sepultos admiramur, ipsa tua Marce Tulli vox e Rostris personare videtur? Quid si vaticanas aedes, Musea collustres? Non marmora nominibus titulisque in vasto ambulacro discretis oberrare oculo, sed antiquas hominum facies intueri credas; extare milites equo publico donatos, magistratus testimonio provinciarum insignes, imperatores, consules, cives bene de patria meritos; pene ipsos attolli fascēs atque insignia dignitatum. Tum vero quae lacrymae parentum in complorandis liberis! quae pietas in fratres! quo desiderio defleri coniuges! laudari cum fide exactos annos! puerorum ac virginum tumulis inspergi flores! denique in tanta multitudine tamque diversis animorum motibus atria porticus, conclavia murmure ac vociferatione compleri!

Pontificum Bibliothecam in fronte habes, claro situ atque excelso, sapientum imaginibus mirifice ornatam: ubi si parum consederis, quid tibi primum apericimus? membranasne vario colorum artificio distinctas? aureos characteres? historias minio pictas? an potius squalore obscuros atque adhesos codices, quorum ipse color vetustatem indicat? En grande aetatis nostrae repertum, philosophorum oratorumque principis Ciceronis Reipublicae fragmenta, quae diu tenebris obsita vir doctissimus et acerrimus antiquitatum investigator Maius cum summa gratulatione omnium gentium summisque

honoribus in lucem explicuit. (1) Virgilius prae ceteris eminet; in proximior loco Terentius. Agnosce veterum manus, nomina frontibus inscripta Politiani ac Bembi, qui paginas immortales apud se fuisse glorianur. Vos mihi vos Italarum clarissimi testes atque adsertores eritis quo in pretio vestris temporibus latina exemplaria haberentur sive in Regia illa Medicea quae byzantinis libris foedissimae barbarorum rapinae obnoxiiis asylo ac perfugio fuit, sive in hoc universi orbis principatu, domi, ruri, inter delicias nobilissimarum aedium vel familiares amicorum invitationes. Vestrae tunc laudes erant non iuvenilis tantum prolusio sed omnis aetas in Augustalis aevi scriptoribus aemulandis occupata, multiplex elegantiarum viriditas ad vernaculum solum translata atque insita. Vobis gratia auctoritate pollentibus decorum fuit, qua gravissimis allocutionibus, qua iocis ac lepore attico distineri principum aures, eminere in publicis negotiis verbo aut scripto gerendis speciem romanae maiestatis atque facundiae, florere artes non exan-gues ac ieiunas sed plenas virium, cum ex intima eruditione ad singula quaeque seu penicillo seu scalpro repraesentanda impellerentur. Sentio me natalis loci dulcedine prolixius rapi auditores quam vestra humanitas aut angustiae temporis ferant. Non tamen a conspectu carissimae domus, earumque rerum memoria quae commune hoc lumen caelumque intuenti mihi flammam poeseos iniecere,

(1) Vido fragmentum Virgilii Georgicon, (praeter Aeneida) quo nil pulcrius aut antiquius.

sine incredibili moerore divellor. Scimus eundem seculi sexti decimi beatissimum auspicem Leonem in Aula Pontificali eximiis graecorum romanorumque artificum operibus, in hoc vero Athenaeo doctrinis optimis domicilia constituisse: pro quibus meritis fundatori munifico exequias cum laudatione quotannis maiores nostri decrevere. Is mihi hodierna die, hac pompa nobis ad recte religioseque docendum iureiurando obstrictis versari ante oculos cum illa doctissimorum hominum corona videtur quam in gravioribus consultis ac legibus ordinandis adiutricem habuit; coniunctionem hanc nostram fronte nutuque comprobare, dein silentia rumpere his vocibus. Satis feliciter in Religionis sacrario statum fortunasque studiorum collocavimus, cum vetus docendi ratio ad vos quam longissime delata pervenerit, novisque successoris nostri decretis aucta florescat. In praesens viri optimi quid sedulitas vestra postulet considerate. Nam quantum curae ac laboris, dum inclusi corporibus teneremur, ad puriora latinitatis semina perpetuo cum fructu excolenda contulerimus, hi parietes hae porticus clara voce testantur. Atque eo seculo quod ab Iulio Secundo inchoatum accepimus nulla urbs, nullum oppidum huiusmodi eruditione carebat: quo fortasse minus erat timendum ne consensus ille voluntatum praecipiti lapsu dissolveretur. Nunc vero in re tanta quae mutatio, quae vicissitudines tam subito irrepserunt? Cur quod in laude ac deliciis erat ad neglectum et desuetudinem recidit? Aeque animo feremus intra Italiae fines latinae linguae decus quotidie

imminui, robur debilitari? iuvenum mentes necessario hoc lumine destitutas verti ad inanes umbras, atque ineptiarum luto demergi? Enimvero si mihi, si huic sodalium meorum concilio creditis, tanta diutius iactura toleranda non erit, imo quo licentius propagatur, eo fortius non ab hoc solum limine, sed ab omni civitate, ab omni romana ditione propulsanda. Hic hic exempla detis oportet, in quibus etiam inviti defixos oculos habeant. Apud Germanos consuetudo inolevit ut iuventus ingenio praestantior graecas tragoedias ac iuxta latinas fabulas in scena recitet. Fit undique ab eruditis concursus: Aeschyli terrores, Euripidis lacrymas sequuntur Plautini sales ac puritas Terentiani sermonis: vigent plausus, admiratio, palestrae literariae certamina, in quibus ea gens aut excellere aut emori propositum habet. Romam vero, terrarum caput, quis unquam alienis indigere exemplis merito affirmabit? Annales, monumenta, fasti sole clarius demonstrant, quidquid ubique beneverit incremento doctrinae iam hic antea exploratum a nobis vulgatumque extitisse.

Non enim illae aedes antiquitus extractae atque ornatae, illa rura quae nunc aut solitudini, aut equitationibus, choreis, ebrietati relicta videtis, ad haec ludibria vacabant, sed Musarum otia commoditatibus ac delectatione fovebant. In iis arcibus, in iis fontium silvarumque recessibus omnes literaturae nervi velut in campo exercebantur. Erit igitur providentiae vestrae laurcas latinae gymnadis atque honestissima praemiorum incitamenta ad Lycei nostri splendorem opportunius revocare,



ne patrii sermonis incunabula post barbarorum illuviem tot impensis totque laboribus restituta per nos atque firmata, iusta cum vituperatione sapientum in ipsis nepotum manibus evertantur.

Haec verba sanctissimi Pontificis nolim poetico more conficta arbitremini. Nondum enim bonorum omnium fletus ac desideria quiescere, fuisse hic non ita pridem egregios iuvenes qui latinam Academiam in Othobonianis hortis iam ante fundatam summa utilitate, summa spe ac voluptate senum coniunctissime celebrarent; cuiusque coetus dignitatem, ad quam tuendam atque amplificandam cum privata studia tum publicas opes conferri aequum erat, sine tali praesidio, sine calcaribus, penitus excidisse hoc temporis cum apud Rhenum theatra ipsa abundare huiusmodi exercitationibus soleant. Quae conversio fortunae si longe aliena a virtute maiorum, si deploranda parentibus, quos liberorum caritas sollicitos tenet, si pro deminutione ceterarum laudum est habenda, signum bene moratae iuventuti ad pristinum iter ineundum attolite. Utram denique partem tot calamitatibus speramus auxilio futuram? eorum quos passim volitare cum ingenti spiritu videmus, polliceri grandia huic aetati, famae libertatisque se dicere arbitros? At nihil unquam boni a turbulentis ingeniis oriri solet, iique maxime sunt timendi hostes qui nova quotidie somnia, novos de veterum ignorantia, ut aiunt, triumphos cogitant. An paucorum, in quibus modestia vitae cum perspicuitate mentis ac nitore doctrinae praefulget? His certe defensoribus utemur cum illud Theocriti diligenti cura perpende-

mus, iacere Gratias loco humili atque obscuro, nisi forte puellae inopes liberali hospitio recreatae in publicam lucem admirationemque deducantur.

Quod igitur unum superest, quodque omnibus votis Religio, literae, iura civitatis poscunt, vos ad huius praeclarissimi consilii fidem ac tutelam vindicabitis. Tunc demum illa auctoritas qua semper bonis artibus moderandis praecipiendisque intentos animos adhibere consuevistis, amplioribus cumulata ornamentis exemplo erit universis, pollere hanc urbem optimarum institutionum genere antiquo ac stabili, cuius robore innixa nihil exteris gentibus invideat, omnia imitanda proponat.

## DESCRIPTIO VETERIS SAMNII

## SERMO

Dum Latii me rura tenent, nemorumque salubres  
Demulcent aerae tacitas Anienis ad undas,  
Frigidus autumnum dulcem otior, aut vago hospes  
Qua iubet ire animus: comites per singula Musae  
Adveniunt, scribuntque brevi memoranda libello.  
Forte inter iuvenes cum pauca iocarer amicos  
Garrula producens hilari convivia versu,  
Flaminius possessor agri samnitis, et idem  
Doctus et urbanis imbutus moribus, aurem  
Vellere mihi coepit, risum tollente corona:  
Heus bone, namque tuos semper laudare Quirites,  
Semper delicias Romae, monumentaque gaudes  
Heroum canere, et Tiberim quae propter amoenum  
Vaticana domus claro se vertice tollit,  
Haec etiam regio, vastis licet horrida saxis,  
Nomina adhuc veterum non aspernanda locorum  
Servat, et insignis populi vestigia: Ni te  
Haec mecum pigeat superare cacumina (montem  
Cautibus abruptis longe ostendebat opaca

Vndique conseptum nebula) mirabere forsan  
 Romulei quibus inuideant spectacula colles.  
 Mene, inquam, ludis? — Sic tu florentia Pindi  
 Culmina possideas: cyathum depone, viamque  
 Arripe; nil dignum fama sectantur inertes.  
 Haec meus ille, praeitque gradu festinus. Abibat  
 Sera dies; raptim venatica sumimus arma:  
 Turba canum longe practervolat. Ecce profundas  
 Ingredimur silvas longo declivia gyro  
 Carpentem: caeci anfractus et saxa minantur  
 Praecipiti revoluta iugo. Sub vesperis horam  
 Venimus oppidulum, cuius magalia raro  
 Cognita vix fumo et pecorum balatibus, alte  
 Montis inaccessi fastigia prima coronant:  
 Pronus apex nigra circumdatus ilice pendet  
 Rustica tecta super, boreaeque nivalis ad ictus  
 Horrendum sonat, et nutantibus ingruit umbris.  
 Hic ego, ceu pallet viso lemuris puer ore,  
 Suspenso molem gressu speculabar, et ingens  
 Captabam trepidus murmur: sed rorida caelo  
 Prodierat clarum diffundens luna nitorem.  
 Angulus agrestis tugurii parca dape fessos  
 Et leni iuvit somno: fugientibus astris  
 Surgimus, et roseo cum lumine solis apertum  
 Prospectum petimus. Digito prior indice monstrans  
 Flaminius loca; non adeo quam cernimus, inquit,  
 Naturae faciem mutavit longa vetustas  
 Vt patrias laudes desperet cura nepotum  
 Eruere ex latebris. Si docta volumina Livii  
 Digna fide memorant, stetit hic fortissima quondam  
 Attollens bello celebres Aquilonia turres,  
 Samnitum gentis caput: hic feralibus aris

Terribiles Diti se devovere cohortes  
 Contra romanum nomen : praedura iuventus  
 Arva Palumbini et gelidae dumeta Volanae  
 Et glebas Cominî crebris findebat aratris.  
 Nec procul aëria candeat ab arce Trifernum.  
 Centum urbes populorum animis ac divite terra  
 Sub iuga finitimos audebant mittere, et ipsos  
 Aeneadas. Viden obscura convalle iacentes  
 Silvarum tractus, et saxa imposita superne  
 Vertice nubifero? (Caudinas noscere furcas  
 Parfacile est: gemini saltus latera hispida iungunt  
 Rupe sub angusta; medium tenet herbida campi  
 Planities; salebrae circum scopulique recurvi:  
 Serpit in ambiguum trames, quo consul uterque  
 Clausus ab insidiis nudo cum milite fascēs  
 Exuit accipiens victoris iussa superbi.)  
 Quid frontem obstringis? Certamina dura vicissim  
 Exercere fuit virtus: meliore Quirinus  
 Imperium obtinuit fato: sed proterit aetas  
 Splendida facta virûm, et sternit mortalia regna.  
 Ecce Ferentinum patrio de culmine surgit,  
 Quamquam impar veteri, matutinaque rubentes  
 Vestit luce domos: contra Murgantia nusquam  
 Apparet, caecis sub humo congesta cavernis;  
 Moenia Romuleae nusquam: vineta oleaeque  
 Prisca tegunt castella; et ruptis fossor in arvis  
 Ingentes tumulos abrosaeque detegit aera;  
 Forsitan et putribus Deciorum condita glebis  
 Ossa per aggestos audet dispergere sulcos.

Talia dum loquitur, meque huc obvertere et illuc  
 Saepe oculos iubet, argutis latratibus omne

Instrepuit nemus, et saltu per devia cervus  
 Effugit; insequimur; raptat me concitus ardor.  
 Diversi erramus qua mons asperrimus: aegre  
 Lubrica dum supero, dum nitor crure manuque  
 Grande supercilium et lapidosos vincere calles,  
 Liberior tandem patuit via. Tum nova rerum  
 Emicuit species: nam late purpureum sol  
 Lustrabat clivum surgenti mitior aura:  
 Largus ager; rivis et dulci uligine prata  
 Florebant circum innumeris depasta iuven-  
 cis. Provehor in culmen; nec iam amplius ulla cupido est  
 Vestigare feram, liquidi sed carpere visum  
 Aetheris, inque omnes obiter describere partes  
 Cûrvantem longis se flexibus Apenninum.  
 Namque hinc belligeros Marsos et saxa videbam  
 Hernica, inaequali nec non regione Sabinos;  
 Hinc procurrebat frondenti Appulia dorso,  
 Notaque Gargani querceta, et dictus Horati  
 Carminibus Vultur: Lucana ac Bruttia tellus  
 Ibat in ancipites vergens sinuosa recessus.  
 Cacrula sed contra fulgebat linea thusci  
 Aequoris; et iuxta tiberinos humida colles  
 Nubila inumbrabant austro collecta maligno.  
 Quos ubi prospexi, et dulci mihi pectus amore  
 Improvisa loci tetigit natalis imago;  
 Maia nate, levi qui transilis aëra cursu,  
 Clamavi supplex, vatum si cura piorum  
 Villa tibi, nunc dexter ades pernicipibus alis,  
 Arreptumque palatino me culmine sistas.  
 Risit vota pater Cyllenius, ac mihi virga  
 Stravit iter: placide lapsus de monte redibam  
 Sospes in occursum longe revocantis amici.

## B. VIRGINI

IMMACVLATAE AB ORIGINE

## EPIGRAMMA

Pura nites Virgo, qualis sine labe Tonanti  
Ridebas dio fulgida Sole caput,  
Clausa sub antiqua cum nocte Aurora lateret,  
Nec iubar aetherium sidera mota darent.  
At malus ille Erebi serpens, cui figere plantis  
Haud licuit morsu nigra venena tuis,  
Ecce iterum stygia sparsit caligine terras;  
Funereamque luem, saevaue bella ciet.  
Diva potens, tu solve umbras; tu redde salutem;  
Tu preme virgineo tela cruenta pede.

## EPICEDION

## IN MORTE CHRISTI

Magdalis, et fidae tacita sub nocte sorores  
Divinum imbuerant fragranti corpus amomo.  
Cui postquam gelido posita est in marmore cervix,  
Linaque sanguineos texerunt candida vultus,  
Tristia ducebant longo suspiria fletu,  
Crinibus incomptis, tunulo caput acclinantes.

Siccine quae miseram lactabant unica matrem  
Gaudia deliciaeque, inopis solamina vitae,  
Perdita funereas tecum cecidere sub umbras?  
Illa tuo sese vix tandem ex ore resolvit  
Marmoreae similis, vix sustinet halitus aegram.  
Infelix! non has lacrymas non talia nuper  
Vulnera sperasti, cum raptas undique palmas  
Sparsimus et virides urbis per compita frondes,  
Voce Deum fassae: tu nimbo septa rosarum  
Dilectam effigiem et caelestia lumina euntis  
Prospiciens, tacitis ardebas tota medullis:  
Qui nunc trajectus ferro, crinemque revinetus  
Vepribus insertis, regalis more coronae,



Proh scelus! exanimis trunco demissus ab alto est,  
 Ceu flos quem rapida disperdit grandine turbo.  
 Saltem aliqua immemores pietas tetigisset amicos!  
 Ecce, metu quales fugiunt per devia cervi,  
 Huc illuc trepidi rerum vestigia portant  
 In latebras: super unus hic est, quem paupere cymba  
 Aequoreos circum scopulos et stagna vagantem  
 Retibus eduxit patriis, sanctoque locavit  
 In gremio, quantum nec virginis ire puellae  
 Gaudet in amplexum sua nutrix. Hoc tibi mater  
 Dulce caput natus morienti voce reliquit:  
 Vnicum habe primi qui partem reddat amoris.  
 Heu! male, dum gliscens animo vetus insidet ignis,  
 Fingere consilium miserae conamur amantes.  
 Nec quidquam pulcrumve oculis vel amabile, postquam  
 Deplorata semel visus effugit imago.

Audin? tela sonant; fremitus crebrescit equorum:  
 En adsunt; tremulis collucet semita flammis.  
 An gnato ut geminent maternum funus, et una  
 Sternamur, raptae ceu vulturis ungue columbae?  
 O qui fronde nova semper vestiris olivae  
 Mons sacer! O florens praecelso vertice Thabor!  
 Altaque Iordanis palmeta tegentia ripas!  
 Nunquam cheu vestram posthac veniemus ad umbram  
 Divinum iuvenem cara cum matre secutae?  
 Non dabitur sancto dulces e pectore voces  
 Accipere, aut myrrham niveis effundere plantis?  
 Nuncius hinc iam aliquis Solymae digressus ab urbe  
 Virginibus ferat haec, roseo quae vere nitentes  
 Nazaridum colles habitant, Galilaeaeque rura,  
 Et Chanaam, rarisque humilem Bethsaida tectis:

Flevimus heu miserae crudeli morte peremptum  
Flevimus unigenam Iesseidos heroinae!

Talibus obscuras rumpebant questibus auras:  
Cum subito adveniens denso ruit agmine miles,  
Fumantesque manu quatiens ad marmora taedas  
Disiecit longe turbam; dein limine custos  
Sedit in adverso, et tumulum circumstetit armis.

## IVDAS ISCARIOTES.

## CARMEN

Postquam concilio procerum despectus abivit  
Proditor, et solis posuit vestigia campis,  
Multa memor secum tristi sub pectore volvens  
Urbem inspectabat longe, penitusque fovebat  
Vocibus his trepida conceptum mente furorem.

Ergo illum morti scelerata per oscula demens  
Obieci pretio? nec se venientibus armis  
Eripuit, fuditve hostes, aut vincula solvit?  
Cur faciles vultus dextramque tetendit amicam?  
Debuerat prohibere manus, capitisque nefandi  
Pellere contactum, fictae mendacia linguae,  
Vendita amicitiae iura incusare, fidemque  
Posthabitam argento, et complexus fraude petitos  
An pietas subit ulla mei, nec funditus omnis  
Cessit amor? Memini quam se daret ante benignum.  
Par erat hospitium nobis, communis egestas:  
At mihi subsidium vitae quandoque licebat  
Carpere; nec deerat furtivi copia nummi,

Sola ministerii quae taedia longa levaret.  
 Infelix! non haec sceleris sunt praemia, non haec  
 Blanda tibi nequidquam animo solaminaingas.  
 Nescis, heu, nescis ut quondam perfidus ille  
 Qui prior ante aras fraterno sanguine telum  
 Sparsit, et horrenda tremefactus caede refugit,  
 Orbe vagus toto moestis habitaverit antris,  
 Ipsa in fronte Dei non exorabilis iram  
 Nigraque fulmineae portans vestigia flammae?  
 Ipsum etiam telo perhibent cecidisse nepotis.  
 I, fuge conspectus hominum, fuge lumina matris,  
 Quae natum exanimem de te miseranda reposcet:  
 Vel pete getulas deserta per avia tigres,  
 Vel committe mari vitam et disperge per undas.

Talia fundebat gemitu, lucosque silentes  
 Horridaque altorum nemorum dumeta subibat:  
 Qualis ab alpinis hiberna nocte latebris  
 Proripuit sese nebulas lupus inter opacas;  
 Ille diu tacitis occultus vepribus errat,  
 Vestigatque greges, et notum captat odorem:  
 Tum, si forte ignem sparsis ardere favillis  
 Pastorum vidit, coniuratique repente  
 Latraverere canes, submisso corpore terram  
 Pressit, et arrecta sonitum procul accipit aure.  
 Hic aliud misero longe crudelius omen  
 Spes animi rupit dubias, mentemque labantem  
 Accendit furiis diraeque cupidine mortis.  
 Namque iter accelerans obscuri tramitis orbes  
 Dum sequitur, vento similis volucrive sagittae,  
 Vel fortuna tulit, vel saeva coegit Erinnyes  
 Vipereum quatiens post impia terga flagellum,

Nescius incertusque viae iuga proxima montis  
 Attigerat, cui silva facit pulcherrima nomen  
 Germine luxurians semper frondentis olivae.  
 Iamque dies tacitam pellebat ab aethere lunam;  
 Turbida sed caeli facies et nubilus aer  
 Certa dabant terris venturae signa procellae,  
 Et nemora insuetum miscebant devia murmur.  
 Restitit adverso deprensus luminis ortu;  
 Agnovitque locum quo venerat ante per umbram  
 Vincula inimica ferens et militis arma profani.  
 Purpureus viridi sanguis stillabat in herba;  
 Qui modo rore levi collapsam in pulvere frontem  
 Aetheriam sanctasque comas et languida tinxit  
 Ora, Patris cari caelo quaerentia vultus.  
 Nec procul hinc iactaeque faces et sparsa recentis  
 Signa fugae, male quam timidi rapuere sodales,  
 Telaque multa solo passim gladiique micabant.  
 Vt vero ante oculos inopina refulsit imago,  
 Saxeus extemplo caeca formidine torpor  
 Corripuit gelidos artus; riguere capilli;  
 Non aliter quam si ruptae telluris hiatu  
 Tartareis pallentem umbris Acheronta videret  
 Murmure misceri, et torvos emittere manes:  
 Mox vultus alio vertit, gressumque retorsit,  
 Praecipitem sese penitus convallibus imis  
 Per salebras per lustra ferens silvamque profundam,  
 Labitur obscurus rauco qua gurgite Cedron.

Quercus erat, ventis et crebro fulminis ictu  
 Parte revulsa sui, medioque nigerrima trunco;  
 Quam neque vere novo frondes nec laeta volucrum  
 Agmina complebant; sed nuncia funeris ales

Infelix bubo, et tristes cum vulture parrae  
 Servabant positos latebroso in vertice nidos:  
 Ipsa viae medium pendentibus ardua ramis  
 Desuper incumbens vasta radice tenebat.  
 Incidit huic, pressitque pedes, et lumine torvo  
 Fixus in horrenda stetit arbore: tum subito mens  
 Consilia in diversa ruit; ceu turbidus altis  
 Fluminibus vortex cum saxa frementia circum  
 Volvit, et attonitos celeri rapit impete nautas.  
 Haec, ait, haec tandem subito me fine resolvet:  
 Quandoquidem effugii nusquam via; semper acerbus  
 Hostis adest tergo; voxque importuna per aures  
 Singultus gemitumque iterat morientis amici.  
 Me poenae ultrices sub tartara nigra sequantur,  
 Dum tristes auras atque illaetabile lumen  
 Ex oculis aeterna meis nox auferat. Ibo  
 Spiritus infelix, caelo terrisque relictis,  
 Perque domos Erebi mersus caligine condar.

Dixerat; ingenti cum protinus omne fragore  
 Intremuit nemus, et tenebris exhorruit atris.  
 At variae umbrarum facies, cocytia monstra,  
 Sedibus exierant imis lucoque volabant.  
 Ille manu trepida nectens in vincula funem  
 Iactavit ramo; tum scabri robora trunci  
 Amplexus propero adscensu et pernicipibus alis  
 Inseruit laqueo guttur, dein lenta remisit  
 Brachia, et elisa correptus fauce pependit.  
 Immanem veluti si forte bipennibus ursam  
 Perculit aëria venator ab ilice summos  
 Stringentem pedibus ramos morsusque parantem;  
 Dentibus illa ferox et toto corpore pugnat

Cortice in arboreo, donec labefacta resolvit  
Membra gelu, retroque cadens cervice supina  
Corruit, et multam traxit cum pondere quercum.

Reliquias turpes exsecratumque cadaver  
Reppulit a gremio tellus: non ulla volantum  
Visceribus foedis tristisque assueta rapinae  
Insedit capiti, vel sanguine polluit ungues.  
Tantum deformes artus squalentiaque ossa  
Aëra per medium lapidosa grandine mixtus  
Imber et assiduo pulsabant turbine venti.

## PHILIPPO SCHIASSIO

## EPIGRAMMA

## I.

O latiae rarum decus et flos candide linguae,  
Tune mihi iucundo in gremio Charitum  
Suades amplexuque tuo promittis amorem?  
Dî bene! Ut ex animo contigit ista fides!  
Nunc nostrae color est Veneri, (1) nunc avolat a me  
Qui steterat penita fixus in aure culex.  
Nam Bavii, pecus indocile invisumque Minervae,  
Te metuunt, nocturnum ut pueri lemurem;  
At quibus ingenium est, qui mel hausere Catulli  
Omnes te dicunt nomine Quintilium.  
Venisti pius et spe maior. Quae mihi profers  
Munera! felsineo munera digno solo.  
Pro quibus exiguum hoc dircaeae mittimus uvae  
Doliolum, agrestes qualia vina bibunt.  
Rura sequor; Musas inter felicia rura  
Me vaticanae progenuere domus;

(1) Poemation est de quo Schiassius benigne sensit.



Florida dehinc aetas in montibus acta sabinis;  
Nunc maris adriaci litora sola placent.  
Vita mihi simplex, simplex dilecta poesis,  
Ceus rosa virgineae iuncta sine arte comae.  
Tu vero sapiens iuvenis moderator amici  
Culturam et mores perge docere tuos.  
Sic grandem Alcaeus cecinit qui carmine Martem  
Garribat caro dulcia verba Lyco.

## PALLAS AMICA BACCHO

## II.

Vinea mî, sacro Pallas quam textit olivo,  
Sospes ab infesta grandine floret adhuc;  
Quamvis et iaceant aliae rubigine vites,  
Et malus assiduo Iuppiter imbre tonet.  
Munere pro tali felicem stratus ad umbram  
Palladii nemoris pocula larga bibam.  
Fer puer antiquum caelo cratera Myronis.  
Evohe Bacche! calix aureus ille mihi est,  
Ludit ubi parvumque super delphina Cupido  
Torquet in aequoreos spicula saeva deos.

## DE HISPANICO BELLO

CONTRA MAVROS

CARMEN <sup>(1)</sup>

Ecce iterum lento surgens Hispania somno  
 Excitat indomitas ad bella antiqua phalanges.  
 Non ut civiles irae fraternaque rursus  
 Crudescant odia, atque exundet sanguine Iberus.  
 Sed maurae ut gentes, et inhospita litora discant  
 Vltricem Europam Lybiae non ferre tyrannos  
 Ruptores fidei, et dextra sua iura tueri.

Pandite fulmineae classes victricia vela;  
 Herculeum superate fretum: vos ardua Calpe  
 Barbarico assultu et crebris foedata ruinis,  
 Vos medio disiuncta mari castella salutant.  
 Haec loca romanas aquilas videre peremptos  
 Vlscisci fratres, et nectere vincla Iugurthae: (2)  
 Haec eadem patriae pro libertate ferocem  
 Scipiadem, et fortes Pompei occumbere amicos.  
 Terra sinu vasto sub montibus Atlantaeis  
 Non placidos portus, non sanctis legibus urbes  
 Continet. Effraeni nomades nunc aspera saxa

(1) Scriptum mense Octobri a. 1859.

(2) Adherbalem et Hiempsalem.

Collustrant, nunc desertis latuere cavernis.  
 Tum, si qua infelix ventorum a turbine puppis  
 Effugium explorat, subito de rupibus altis  
 Praecipitant, stringunt remos, atque alite cursu  
 Circumeunt praedam: fert naufraga corpora fluctus:  
 Infames oras prospectat ab aequore nauta  
 Territus, et longe caecas dat vela per undas.

At non hispani, liberrima pectora, turmas  
 Foedifragas passi volitare impune per omnem  
 Oceanum, ac prope vicinas incurrere Gades:  
 Ingentes turres, ingentia claustra superne  
 Imposuere, ipsi Alcidae miranda. Fremebat  
 Magnanimus de monte leo, piratica tela (1)  
 Rumpens dente fero. Victoribus ille britannis  
 Invitus cessit, telluris parte relicta;  
 Partem fortis adhuc lybico defendit ab hoste.  
 Quin etiam veteris regni memor altius audet  
 Tollere rugitum, quo personat arduus Atlas,  
 Nec soli pallent numidae, getulaque pubes,  
 Tota sed horrescit venturas Africa sortes.  
 Quare agite egregii iuvenes, revocate parentum  
 Virtutem. Iam tempus adest quassare profani  
 Maumethis sedes, et sceptrum inamabile ponti  
 Mergere sub latebris, aut vastis condere arenis.

Tuque potens regina, gravem florentibus annis (2)  
 Quae mentem, atque animos ad grandia facta viriles  
 Ostendis, sparsam si pulvere non decet arma

(1) Leo Castellae.

(2) Isabella secunda id temporis Hispaniae Regina, nunc exul, supremum ducem O Donnellum huic bello praefecerat.

Stringere, foemineae dextrae si pugna negatur,  
Fide tuis. Satis est in saeva pericula Martis  
Invictum legisse ducem. Non mille carinae,  
Sed virtus pretium belli. Cum prisca vigeret  
Gloria militiae, longe fortissimus heros,  
Quem vos hispanum merito dixistis Achillem,  
Sternebat saeva Rodericus cuspidе mauros.  
Quinque simul reges, torrentum more, vetustae  
Bilbilis urgebant portas: interritus ille,  
Paucorum comitante globo, perculsa gigantum  
Corpora, marmaricos arcus, versasque pharetras  
Calcabat victor: dein moenia celsa Toleti  
Expugnans dominam rapuit praedonibus urbem.  
Terga dabat fugiens mixto gens nigra tumultu:  
Ceu, cum montivagus lucos venator opacos  
Ingreditur, pavidі huc illuc per lubrica cervi  
Desiliunt, vallemque procul glomerantur ad imam.  
Barbarie pulsa frangebant horrida cives  
Vincula; sole novo splendebat purior aether;  
Pulcraque Chimene felicem Boetis ad undam  
Coniugis optati dulces cantabat amores.

## FRANCISCO GANDVLPHO

CORNETI ET CENTVMCELLARVM PONTIFICI

Tarquiniae tellus etruscis clara sepulcris,  
Asper ubi Minio sylvis flexibus errat,  
Nos Gandulphe tenet constanti foedere iunctos  
Dulcis amicitiae, quae coepta virentibus annis  
Firmior usque viget iam canescente capillo.  
Splendida te virtus, gravibusque exercita curis  
Ad magnos templi sapientia tollit honores;  
Me beat exiguum libertas aurea vatum.  
Dissimiles vitae sortes amor aequat et usus.  
Fallimus aetatem per saxa antiqua vagantes;  
Miramur pictis regum monumenta figuris,  
Aut rapimur celeri vicina sub oppida curru.  
Laeta dies sine nube cadit, noctemque serenam  
Coena hilarat non spumanti producta falerno,  
Sed vario sermone. Iocamur versibus ambo;  
Ridemus cives quos diro armata flagello  
Ambitio torquet, miseros ridemus avaros.  
Luna super nigras oriens nitidissima turres  
Disiectos populos in pulvere monstrat, et umbram  
Mortalis fastus. Pariter sic ducimus horas  
Felices prisco sapientum more. Quid ultra

Sit mihi sperandum ? Quid fortunatius optem ?  
En meus hic prodit pudibunda fronte libellus :  
Accipe : tu censor, tu iudex candidus esto.  
Latrantes cerno Bavios, qui dente maligno  
Carpere scripta solent. Fidum tutamen amico  
Porriges ; da crinem viridanti cingere lauro,  
Si tantum pretii nostri meruere labores.

## PELAGIO ANTONIO LAVASTIDAE

PONTIFICI VRBIS MEXICI

Te fera bellorum rabies, crudele tyranni  
Arbitrium, et praeceps in mutua funera vulgus  
Pastorem egregium dilecto arcebat ovili,  
Arcebat dulci patria rebusque gerendis,  
Lavastida. Tenax iusti servator, et alta  
Mente vicens fraudes ac regna petita cruentis  
Caedibus et vanas fortunae despicias iras;  
Gaudia doctrinae, sapientum praemia quaeris.  
Sume novos animos: Petri tibi limina pandunt  
Concilium augustum pro Relligionis honore,  
Magnanimi pro sede Pii, qui regia iura,  
Civile imperium libertatemque tuetur.  
Insere te Patribus. Facundae gratia linguae  
Intemerata fides et strenua pectora nomen  
Eximium peperere tibi. Felicior ibis  
Nunc ad romani decora expectata triumphi.  
Quod si forte meis advertere cantibus aurem  
Non piget, ac summo paullum descendere Olympo,  
Ecce deae faciles adsunt. Prope Tibridis undam  
In nemorum secreta veni, neu respue Musas  
Heroum lauros et munera sacra ferentes.



Liber ego vates ausus contemnere turbam  
 Non sequor indecores venali carmine nugas,  
 Somniaque errorum, gaudet queis degener aetas.  
 Virgilii iubet umbra mei per florida rura  
 Ausoniam pulsare lyram, celebrare parentum  
 Exempla, et cultas annis melioribus artes,  
 Pingere turrito fulgentem vertice Romam.



# INDEX RERVM



<u>Eruditae inventuti.</u>	PAG.	6
<u>Bonarottius de templo Vaticano.</u>	»	9
<u>Novissimum Dei Iudicium in sacello sixtino pictum</u>	»	13
<u>Pinacotheca.</u>	»	17
<u>Divi Hieronymi laudatio.</u>	»	22
<u>Bibliotheca.</u>	»	26
<u>De Terentii et Virgilii codicibus</u>	»	27
<u>De Musei origine.</u>	»	28
<u>Cariatia.</u>	»	33
<u>Captivus Dacus.</u>	»	37
<u>Silenus.</u>	»	35
<u>Augustus et Poeta.</u>	»	36
<u>Lucius Vernus.</u>	»	40
<u>Minerva Medica.</u>	»	41
<u>Pudicitia.</u>	»	35
<u>Titus.</u>	»	47
<u>Nilus.</u>	»	48
<u>Fortuna et Bias sapiens.</u>	»	49
<u>Antonia Germanici mater.</u>	»	51
<u>Clementia</u>	»	53
<u>P. Sylla.</u>	»	55
<u>Euripides</u>	»	56
<u>Demosthenes</u>	»	57
<u>M. Antonius</u>	»	58
<u>Amazon</u>	»	59
<u>Fabula Alcestes</u>	»	60

<u>Fragmen sculpturae ex Parthenone</u> . . . . .	Pag. 61
<u>Augustus iuvenis</u> . . . . .	» 62
<u>Tiberius iuvenis</u> . . . . .	» 53
<u>Cato</u> . . . . .	» 64
<u>C. Marius</u> . . . . .	» 65
<u>De eodem Mario</u> . . . . .	» 66
<u>Hercules puerum Aiace sinu gerens</u> . . . . .	» 71
<u>Hercules truncus</u> . . . . .	» 72
<u>Cornelius Lucius Scipio</u> . . . . .	» 73
<u>Meleager</u> . . . . .	» 74
<u>Apollo</u> . . . . .	» 75
<u>Laocoon</u> . . . . .	» 79
<u>Antinous sen Atletæ</u> . . . . .	» 80
<u>Persens et pugiles</u> . . . . .	» 81
<u>Cleopatra</u> . . . . .	» 82
<u>Cupido Praxitelis</u> . . . . .	» 83
<u>Danaïs</u> . . . . .	» 84
<u>Penelope</u> . . . . .	» 85
<u>Apollo sauroctonus</u> . . . . .	» 86
<u>Posidippus et Menander</u> . . . . .	» 88
<u>Isis</u> . . . . .	» 90
<u>M. T. Cicero</u> . . . . .	» 91
<u>Caracalla imperator</u> . . . . .	» 92
<u>Aiax</u> . . . . .	» 93
<u>Scipio Africanus</u> . . . . .	» 94
<u>Venus Anadiomene</u> . . . . .	» 95
<u>Adonis</u> . . . . .	» 96
<u>In aula Musarum Musae et Poeta</u> . . . . .	» 97
<u>Diogenes et Poeta</u> . . . . .	» 98
<u>Miltiades</u> . . . . .	» 102
<u>Themistocles</u> . . . . .	» 103
<u>Socrates</u> . . . . .	» 104
<u>Aeschines</u> . . . . .	» 105
<u>Pericles</u> . . . . .	» 106
<u>Aspasia</u> . . . . .	» 107
<u>Lycurgus</u> . . . . .	» 108
<u>Tragoedia et Comoedia</u> . . . . .	» 109
<u>Iupiter</u> . . . . .	» 110
<u>Adrianus et Nerva Caesares</u> . . . . .	» 111

<u>Hercules aeneus . . . . .</u>	» 112
<u>Antoninus Pius . . . . .</u>	» 115
<u>Iuno . . . . .</u>	» 116
<u>Duo Discoboli . . . . .</u>	» 117
<u>Sextus Cheronensis et Poeta . . . . .</u>	» 118
<u>Museum Aegyptium . . . . .</u>	» 119
<u>Regia Leonis X. . . . .</u>	» 126
<u>Praedium Constantini . . . . .</u>	» 126
<u>Musirum vetus . . . . .</u>	» 127
<u>Schola Atheniensis . . . . .</u>	» 128
<u>Heliodorus . . . . .</u>	» 129
<u>Dantes Aligherius . . . . .</u>	» 130
<u>Sepulcrum Torquati Tassi . . . . .</u>	» 131
<u>Quercus ejusdem Torquati . . . . .</u>	» 132

# INSCRIPTIONES

<u>Animae Gabrielis Laureanii dedicatio . . . . .</u>	» 139
<u>Eidem Laureanio . . . . .</u>	» 142
<u>Felici Viscontio . . . . .</u>	» 143
<u>Ioanni Pacinio . . . . .</u>	» 144
<u>Iosepho Vannutellio . . . . .</u>	» 145
<u>Clarae Vannutelliae . . . . .</u>	» 146
<u>Thomae Massio . . . . .</u>	» 147
<u>Mariae Massiae . . . . .</u>	» 148
<u>Annae Simeoniae . . . . .</u>	» 149
<u>Rosae Bamarinae . . . . .</u>	» 150
<u>Aloisiae Kibolae . . . . .</u>	» 151
<u>Lucae Paiellae . . . . .</u>	» 152
<u>Leopoldo Paiellae . . . . .</u>	» 153
<u>Simoni Franchettio . . . . .</u>	» 154
<u>Caetano Alterio . . . . .</u>	» 155
<u>Iosepho et Raphaeli Tontiniis . . . . .</u>	» 156
<u>Coelestinae Vallettiae . . . . .</u>	» 157
<u>Donum Vincentio Tizzanio Antistiti . . . . .</u>	» 158
<u>Elogium P. Card. Brignole . . . . .</u>	» 159
<u>Elogium P. Card. Iustinianii . . . . .</u>	» 161
<u>Donum Pio IX P. M. . . . .</u>	» 163

<u>Eidem Solis Eclipsis . . . . .</u>	» 164
<u>Eidem de Leoniano Athenaeo instaurato. . . . .</u>	» 165
<u>De novis moenibus Centumcellarum. . . . .</u>	» 166
<u>De Claustro plantis exoticis alendis . . . . .</u>	» 167
<u>De Nosocomio Lateranensi . . . . .</u>	» 168
<u>Jusjurandum Fidei Doctorum Decurialium Magni Lycei Romani</u>	» 169
<u>Votum pro incolumitate Pii IX die festo D. Aloisii Gonzagae.</u>	» 171
<u>Idem. . . . .</u>	» 172
<u>De aucto Asylo dementium. . . . .</u>	» 173
<u>Clastrum pulveri sulphureo custodiendo. . . . .</u>	» 174
<u>Novus panis ad utilitatem publicam Pio IX P. M. oblatus. .</u>	» 175

#### DIVERSA

<u>De studio latinitatis oratio. . . . .</u>	» 179
<u>Descriptio veteris Samnii. . . . .</u>	» 190
<u>B. Virgini Immaculatae ab origine. . . . .</u>	» 194
<u>Epicedion in morte Christi. . . . .</u>	» 195
<u>Judas Iscariotes. . . . .</u>	» 198
<u>Philippo Schiassio . . . . .</u>	» 203
<u>Pallas amica Baccho. . . . .</u>	» 205
<u>De Hispanico bello contra Mauros . . . . .</u>	» 205
<u>Francisco Gandulpho Corneti et Centumcellarum Pontifici . .</u>	» 209
<u>Pelagio Lavastidae Pontifici urbis Mexici . . . . .</u>	» 211

Tag 2008586



